

UANËN DADA UAID

Nuquin Papa tantiamanquid chiaid

1 ¹Ëndenquimboshë matses uabi yec abitedimbo uabi yequi Nuquin Papabëd Esus icpampic. Nuquin Papapadquidquiobidi yec: —Nadquio Nuquin Papa iquec —quec tantiamanquidquio nec. ²Aidëmbi Nuquin Papabëd icquin ³abitedimbo uapampic. Abubëdta nidaid uashun aidën icquidtedi uapampic. Ambi uacmaid utsi nibëdec. ⁴Aidquio Nuquin Papa yacno tabadmianquid nec. Nuquin Papapadquidquiobidi yec: —Nadquio Nuquin Papa iquec —quequin paposhquiacbimboecnuc tantiamanquidbidi Esus nec. ⁵Adembidi matses ambi icsamboen naid tantamequid nec. Adquid icquin: —Con Pamboen bëdamboshë icquidquio nendac. Aidën chiaid niac-niaquec mibi icsamboec tabadec —quequin chuisho tantiatiapimbo icquin matsesën Esus chieshëmpondash.

⁶Aden Esusën chuibeniyabi icnuc con shënision acten mentoanquidëmba Nuquin Papan chiacpadomboen ambi chiaid chuibampondash. ⁷—“Nuquin Papa yacnuësh abi tantamequidquio choendac,” quequin Uanën chuibancho tantiashun ma dadpeshun ambi chuiboed tantianu —quequin Nuquin Papan con shënisio abi chuibanquid icmepanëdash. ⁸Nuquin Papa yacnuësh choacmaidëmbi con shënision:

—Nuquin Papan chomiaid Esus nec —quequin chuibampondash. ⁹Aden ambi chuiboedquio Nuquin Papa tantiamenuec matsespanëdash Esus.

¹⁰Adash matsesbëd tabadsho ambi matses uaidombi tantienquio icquin chieshëmpondash. ¹¹Aden con matses isadaidbon Esus tantienquio iccondash. —Isadaidbo con matses nec —Nuquin Papa quenëdacpadquiec: —Isadaidbo con matses nec —queoapondash Esus. Adsho ambi con matses caidonquiobi dadpeshun Esus tantienquio icpondash. ¹²Utsibombien daëdpactsëcshun: —Nuquin Papan Madombo Esus nec —quequin tantiasho Nuquin Papan: —Con mado nec. Con champi nec —cabempanëdash. ¹³—Con matsesuidien Nuquin Papan: “Con mado nec. Con champi nec,” capec —¿quequidta adopanëdash? Padenquio. —Nuquin Papan mado nebi —quequin ñambëmbi chuiquidta con mado capanëdash? Padenquio. Nuquin Papan Mayanën tantiamiacpadomboen aton Madombo Esus tantiasho dada con mado caquin chido con champi capanëdash. Adembidi Esus tantiasho adoendac.

¹⁴Adec Nuquin Papa tantamequidquio Esus matsespanëdash. Nuquin Papan Mado abentsëqui yec bëdamboshë icpondash. Ëbëd tabadquin nadatiambo icquin nabanquin matses bëdamboen nashumbampondash. Aden

Nuquin Papambo tantiamepondash Esusën. ¹⁵Aid con shënision chuipondash. —Ëmbi chuiboedquio nec. “Ëbi icsaquid icnuc bëdamboshë icquidquio choec,” ëmbi caboedquio nec. “Ëmbia Nuquin Papan chiaid chuibambon aidëntsen tsyuec choshon chuibanendac. Ëbi bëyuc tishaidi tishabi icnubi aid ënden icpampic,” ëmbi caboedquio Esus nec —quepondash con shënisio.

¹⁶Con shënision chiacpadquidquio icquin abi tantiaquido Nuquin Papan bëdamboen isaido icmeshun adenuidi Nuquin Papa nuqui bëdamboen ismec. ¹⁷Ëndenquimboshë Nuquin Papan chiaid dada uaquin Moisesën Nuquin Papan matses icsaido cuidte tantiamepampic. Padnuen Esuquidistun Nuquin Papan bëdamboen iste tantiamequin: —Nadquio Nuquin Papa iquec —quequin matses bëdamboen tantiamepondash. ¹⁸Ambi isacmaidquio icsho matsesën Nuquin Papa bëdamboen tantiatiapimbo iquec. Padnuen aton Mado abentsëcshunquio aton dayun tsadquidënguio matsesun Nuquin Papa bëdamboen tantiamepondash. Aidquio chuinu. Tantia.

Tsusiobon chuimiac Uan acten mentoanquidën chiaid

(Mat. 3.11-12; Mad. 1.7-8; Duc. 3.15-17)

¹⁹Con shënisio Nuquin Papa tantiabenuid acten mentobenequid niondash. Aden acten mentobenesho isash Moisesën chiampid namequido aid chuimenuc cho-chopondash. Edusaden yacnocquido isadaidbo tsusiobon: —Chuimetan —cac cho-choquin con shënisio chuituidpondash. ²⁰—¿Tsuntsin chiac nai? ¿Mimbembida nai? “Bëdamboshë icquidquio Nuquin Papan chomendac,” quequin nuquin tsusedpan

¿dada uapampidta ne? —catuidpondash. Adoquien: —Padenquio. Aidpenquio nebi —quepondash. ²¹Adshobien: —¿Tsumintsi ne? ¿“Naden naindambi,” quequin Nuquin Papan chiaid chuibanquidquio unëspampid Edias uincuenaidta ne? —caquien: —Padenquio. Aidpenquio nebi —queoapondash. Adshobien padpiden: ¿Tsumintsimbo ne? “Moisespadquidquio choendac,” ¿capampidta ne? —caquien: —Padenquio. Aidpenquio nebi —queoapondash con shënisio.

²²Adshobien padpidemboen: —¿Tsumintsimbo ne? ¿Mimbenquibienda nao? Ëbi: “Chuimetan,” caboed chiec nidnu. Baded ëbi chui —caquien: ²³—Nuquin Papan tantiamiac nuquin tsusedpa Isayasën naden chuiampid nebi.

“Nuquin Papan bëdamboshë icquid chomiabi icnuc aid bëyuec utsiba choendac. Aidën shubu nibëdacno capucuenequin chuibanendac naden.

‘Chuiquid dapambo choeque.

Podqued andëdbanshunta,’

quiacbimboen chuiquin: ‘Nuquin Icbo choeque. Icsaid ënash bëdamboec tabadta,’

quequin chiendac bëyuc choshon,” quequin chuiampid nebi —quepondash con shënisio.

²⁴Adnubien con tsusedpabon chiampid namequidon padiseyobo caidontsen aton chuiquid dapan chiacpadomboen con shënisio chuituidpondash. ²⁵—Utsibon: “¿Adquidta ne?” cac: “Adquidpenquio nebi,” queuidequi mibi iccoc. “¿Mitsipadquidquio icquin acten mentobano?” mibi caimbi —caquien: ²⁶—Nuquin Papan chiacpadomboen abi tantiabenuid acten mentobenec nebi. Ëmbi aden bëdamboen nanuc utsimbien

bëdamboenshë naindac. Aidi mibëdi tabadshobi ma mimbi tantienquoio icboc.
²⁷Ëmbia Nuquin Papan chiaid chuibanombi. Aidëtsen tsyuec choshon comapenen tantiaquin Nuquin Papan chiaidquoio chuiquin Nuquin Papambo tantiamendac. “Aidi bëdamboshë icquid icnuc ëbi icsaquid icsho ðatotsieshun: ‘Aid choec,’ quequin chuiquidquoio Nuquin Papan icmioshi?” quec tsadebi —quepondash con shënisio padiseyobo chieci. ²⁸Acte Odan caid uquë cuëmatiucueh shubu dadpen icquid Betania caid yacnuësh adpondash.

Abided cuidadtequid nendac, Esus caid

²⁹Badiadshun padpiden con shënisio mases acten mentobanoapondash. Aden mentobanubien Esus chopondash. Chosho isashien: —Is. Nuquin Papan namiaidquoio obeca bacuëbimboecquid choeque. Aidi isadaidbon obeca bacuëded cuidquin unës uacbimboec mases icsaid bedshunec abided cuidadec unësendac. ³⁰Ëmbi chianeboedquoio nec. “Ëbi bëyuc tishaidi tishabi icnubi aidi ënden icpampic,” quiash: “Ëbi bëdapabi icnuc bëdamboshë icquidquoio choendac,” quepobi. ³¹Aid chosho con mases isadaidbo tantiamenuen Nuquin Papan acten mentobenequid icmiondashi. Adondaidëmbi ëmbibi badedquoio tantienquoio iccombi. “Nuquin Papan chomiaid nec,” quequin tantienquoio iccombi —quepondash con shënisio.

Esus mentoaid

(*Mat. 3.16-17; Mad. 1.9-11; Duc. 3.21-22*)

³²Adashic abi onquec: —Nuquin Papan naden ismiac tantiabenombi. Aton Mayan aton dada nibëdquieci dëbimbimboec budec: “Matsadtoendac,” quebocpadequi Esus matsadtocho ispombi. ³³Adsho isash: “Adquidshenda

caposh Nuquin Papan: ‘Acten mentoanquid icta,’ ëbi caboedën. ‘Con Mayan dëbimbimboec budec matsadtoboeedën abi tantiaquidobëd con Mayan tabadmendac,’ Nuquin Papan caboedshenda nepec,” quioibi Esus caic. Ëmbembi tantienquoio ictsenombi.
³⁴Aden ismiac: “Nuquin Papan Madombo Esus nec,” quequin tantiombi. Aden tantiahsun: “Nuqui caimboed Nuquin Papan chomiaidquoio Esus nec,” quequin mibi chieci nebi —quepondash con shënisio.

Nëid dada uaquid Uan Esusbëd yanaid

³⁵Adashic badiadash ambi acten mentobambocno con shënisio nidoapondash. Aid tsibanequi nidoapondabi. ³⁶Adec nidquin isquien Esus cuempec. Cuensho isashien con shënisio: —Is. “Nuquin Papan namiaidquoio obeca bacuëbimboecquid nec,” ëmbi caboed cueneque —quepondash.

³⁷Adsho tantiatanequini con shënisioobëd iccondaidd utsibëd Esus chinunec nidpondac. ³⁸Nidquin chinunac bidiadquin istanequien: —ðAtotsi quec ne? —quepondash Esus. Adshobimbi: —Mibi iseci nebi, Dabi. ðMitsimbo mibi ushaque? Isnu —capondambi. —Chuiquidquoio nec —quequin con onquetembi Dabi caondambi. ³⁹Adoac: —En iseci cho —cac abi ushacno iseci nidondabi. Ushë abucquoio icnuc puduedash yueci tabadeci onquetaniash inchështsëcnubi chondabi.

⁴⁰Ëbëdtan Esus chinunondaid Andedes niondash. Shubu dadpen icquid Betsaida caid yacnuësh caniquid niondash. Aton buchi Petedo niondash. Petedobidi Simon capondash.
⁴¹Adnubien Andedes aton buchi chieci nidpondash. Adec nidquin Petedo istuidash: —Nuquin tsusedpabon

chuiampid Nuquin Papa yacnuësh choquid Mesias caid istuidombique. En isec cho, buchi —capac caondash. Nuquin Papa yacnuësh choquid Quidistu cashumbic con onqueten Mesias caic.

⁴²Aden chiaquien aton buchi Esus isec chopondash. Chosho isash Esus: —Uanën mado mibi nec. Mibi Simon nec. “Nidaid moco utsi uatiapimbo yacbibmoec mibi chieshtoenquio icquid yanendac,” quequin mibi nidaid moco cuënendambi —quepondash Esus Petedo caic. Con onqueten nidaid moco cain Sepas capondash Esusën. Quidieco masesën onqueten Petedo capondash.

Esusën Uedipebëdta Natanaid istuidaid

⁴³Badiadash: —Con nidaid Cadidia caid yacno nidnu —quianec nidpondash Esus. Adec nidquimbi Uedipe istuidpondash. Istuidshun: —Nuquibi icnu. Cho —caquien Uedipe chopondash. ⁴⁴Betsaida yacnuësh caniquidbidi nepondash aid. ⁴⁵Esusbëd icquid yanashic dada utsitsen Natanaid caid chiec nidpondash Uedipe. Adec nidquin istuidshumbien: —Isec cho. Moisesën chiampicpadomboen chuiquin nuquin tsusedpabo utsibon:

“Bëdamboshë icquid choendac,” quequin dada uapampicpadequi choshe. En isec cho. Shubu dadpen icquid Nasaded caid yacnuësh caniquid neque. Osen mado nec —quepac caondash. ⁴⁶Adsho tantiasht: —¿Nasaded yacnuështa dada bëdambo icquid chopatsiasht? Auëshquio dada bëdambo icquid chotiapimbo iquendac —quepac caondash Natanaid. Adsho tantiasht: —En isquiech cho —quepac caondash Uedipe.

⁴⁷Adoac choshobien Esusën: —Is. Isadaidbombo neque. Muesambo nec —caquien ⁴⁸Natanaidën: —¿Mitsipaden

ëbi tantie? Mabi mimbi isacmaidquio nepayoc —capondash. Adoaquien: —Uedipen bedtanabi icnubi mibi cuëte icueda caid tayun tsadsho tantiombi —capondash Esusën. ⁴⁹Adsho tantiashtumbien: —Nuquin Papan Madombobien mibi nec. Comapenen tantiaquid yec nuquin mases isadaidbo chuiquid dapambo mibi nendac —capondash Natanaidën: —Istiapimbo yacno chiosh —quequin tantiashtun. ⁵⁰Adoaquien Esusën: —“Cuëte icueda caid tayun tsadsho mibi tantiombi,” ëbi queshto ¿tantiashta: “Nuquin Papan Madombobien nec,” badedquio que? Padpiden comapenen tantiaquin nabansho isun mimbi ëbi tantiaquitosiandac. ⁵¹Tantia. Mibi chuinu. Isadaidbo tsusedpa Acobon Nuquin Papan abi yacnoshon uaido mayan bëdabo Nuquin Papa yacno dectatonesho isash: “Aidbëd tabadte Nuquin Papan ëbi tantiametiadquio iquec,” quequin tantiapampicpadomboen mimbi ëbi tantientac. “Matesun Nuquin Papan Madon mases abëd tabadte tantiamec,” quequin mimbi ëbi tantientac —quepondash Esus abëd icquido chiec.

Esusën ambembi actequid uaid

2 ¹Aden Natanaid chiasht aton nidaid Cadidia caid yacnobi Esus tabadpondash. Ambo tabadec daëdec ushtsambi shubu dadpen icquid Cana caid yacnocquidën isadaidbon aton chido bedquin ismequin pemenuen aton shubuno mases dadpen cho-chomepondash. Adoac cho-chomiaidobëd Esusën tita puduedpondash. ²Esustsen puduedpondash. ³Adec puduedash tabadquin uba chinaid actequid uesquin acbededpondash. Adsho isumbien anin Esus chuipondash. —Actequid

naimëdoshe. Comapenen tantiaquid icquin mimbi tantiacpadomboen nata, mado —capondash. ⁴Adoaquien: —¿Atotsi quequin mimbi ëbi chuipe, tita? Chiata. Con Pan tantiacpadënquio naimbique —quepondash Esus. ⁵Adsho tantiatanquin anin yuabo actequad cushtobanquido chuipondash. —Con madon chiacpadomboen nata —capondash.

⁶Ambobi tëchu dapa 6tedi tabëcaid icpondash. Mëpamëdtembo acte nua 120 ditedos cactembi anidboedi acte naimëdaid icpondash. ⁷Adnubien Esusën: —Në tabadquidën acte cushtoban —cac cubu-cubuctsëcquio icnuc acte cushtobampondash yuabon. ⁸Cushtobanacsho isun Esusën: —Ueshun buanshun mibi ancaquid acmetan —cac acmetampondash.

⁹Adoac acquin tanaquien actequad bëdamboshë icquid icpac caondash acte icboedi. —Nibëda damboedquio žmitsimbo bedpash? —quepac caondash yuabo ancaquid. Adsho tantiahsun yuabon: —Esusënuquibien naccosh —quequin tantiapac caondash. Adnubien yuabo ancaquidën chido bednuequid chuipondash: —Aidën actequad bëpash —qeshun. ¹⁰—Nuquin matsesën actequad bëdambo icquidba isedanquido acmequid nendac. Adquid acmiac matses nua cubudacsho isash: “Actequid icsactsëcquidtsen acmenu,” quequid yendac. Aden mimbi nambo. Bëdambo icquidquio ma mimbi nëbi acmianeyoc —quepondash yuabo ancaquid chido bednuequid chiech. Adnubien yuabon actequad bëdamboshë icquid abitedi acmebampondash.

¹¹Aden comapenen tantiaquid icquin ambembi actequad uaquin Esusën tauamboen ismebempondash. —Nuquin Papa yacnuësh choquid yec comapenen tantiaquidquio nebi —quequin aden

tauamboen ismebenondash nidaid Cadidia caid yacnoshon shubu dadpen icquid Cana caid yacnoshonquio. Adosho isun: —Con matsesën chiampid Nuquin Papan chomiaidien nec —quequin tantiabenondambi.

Esusën chushcaquin cuemiaid
(*Mat. 21.12-13; Mad. 11.15-18;*
Duc. 19.45-46)

¹²Aden ambembi actequad uatanec nidec shubu dadpen icquid Capednaun caid yacno Esus nidondash. Aton tita yec aton buchi yec abëd icquido yec ëbi yec quec Esusbëd nidaniondabi. Ambo daëdpactsec ushec tabadondash.

¹³Ambo ushcuidanec nidequi shubu dadpen icquid Edusaden yacnotsen Esus nidaniondash. —Nuquin matses tsusedpabo unës uainquio icquin Nuquin Papan matamiampid inchësh tantiaquin obeca bacué pec nëbi tabadeque. Isec nidnu. Nid —quianec nidanepondash. ¹⁴Nidashic Nuquin Papa tabadte shubu uashunaid dapa daquënë uaidën puduedondash nuntanquio puduedabi. Puduedshun isquien matses dadpen nëish yua chedobëd tabadpec. Baca bënë yec obeca yec dëbimbimboecquid quënëmpin sauedaid yec quec tabadpondash. Aton yua menequin piucquid bednuec utsibo tabadnubi utsibo ambi tabëcaid dayun tabadpondash. Aido nidaid utsi yacnuësh choquido aton piucquid dadpen bedshun ampeshunquin daëdpactsëc menequido niondash.

¹⁵Adec tabadsho istanquimbien Esusën cueshcate badedquio nacentanquin cuesquin niacumpondash umanuc abitedimbo. Aden umanuc niacuntanquin tabëcaidtsen bidiacbanquin piucquid siabudshumbampondash.

¹⁶Adotanquimbic dëbimbimboecquid yuaquidotsen chushcapondash. —Baded mitsana buanec nid. ¿Piucquid bednuen shubu uaidta nedic? Ma con Pa tantiata shubu neyoc —quequin chushcapondash.

¹⁷Adsho isun naden tantiondambi. —Adquidshenda Nuquin Papan chiaid chuiquin con tsusedpan dada uapampic. “Aton Papan shubu cudasquidquo nendac,” quequin Esusën nate chuiquin dada uapampic —quequin tantiondambi.

¹⁸Aden nicacsho isumbien con matses chuiquidon: —¿Tsuntsin chiac nao? “Nuquin Papan chomiaid icquin naombi,” quequin comapenen tantiaquin nabanquin ëbi isme —caquien ¹⁹ismenquio icquin ompoac bimboen Esusën chuipondash. Abibi cadequi: —Mimbi nëid shubu icsa uabocsho padpiden nacenoinambi bëdambo icnuc. Daëdec ushquin nacnenquin nainendambi —quepondash Esus. ²⁰Adsho tantiash Nuquin Papa tabadte shubu uashunaid dapa ca danec: —¿Badedquioda nacenmpatsia? Nëid nacnenquin seta dadpenquioshë 46tedquiobi matamiac cadenec —quepondash con matses chuiquido.

^{21,22}Yuecquio ictaneshun Esusën aden chiaid tantiondambi. Unës uacsho chococac daëdec ushash Esus uincuenaccondash. Uincuenacsho isash: —Abibi cadecshenda Esus nepondash. Abibi cadec: “Daëdec ushquin nacnenquin nainendambi,” quecshenda nepondash. Aden chuiquinshenda con tsusedpabon dada uapampic —quequin tantiondambi.

Dadpenshun Esus tantiauidaid

²³Nuquin Papa tabadte shubu uashunaid daquënë uacnoshon cuemeshumbic Edusaden yacnoshontsen

comapenen tantiaquin nabanquin Esusën ismepondash. Adsho isun matses dadpenshun: —Nuquin tsusedpabon chiampid Nuquin Papan chomiaidien Esus nechitec —queshun Esus bëdiactsëc tantiatsëccondash. ²⁴Aden tantiatsëcsho ambembi tantiash: —Ai, ëbi tantiaquidquo nec —quenquio icquin: —Ëbi bëdiactsëc tantiatsëc —quequin tantiapanëdash. ²⁵Utsin chiambobi ambembi tantianëdash. Aden matses abitedishun otacquo tantiaid ambembi tantiaquidquo Esus niondash.

Esusën Nicodemo caid chiaid

3 ¹Adnubien Edusaden yacnobi Nicodemo caid icpondash. Tsusedpabon chiampid namequido padiseyobo chuiquid dapa niondash. Tsusio utsibobëdtan aton matses namequid niondash. ²Inchëshën Esusbëd onquenuc chopondash. Choshombic aidëmbi: —“Nuquin Papan icmiacpadquid chuiquidquo mibi nec,” quequin tantiambi. Mimbi comapenen tantiaquin nabansho isun: “Nuquin Papan namiaidënuidtsëquien adotsiash,” mibi caombi —quepondash.

³Adsho tantiashun: —Ai, adquid nebi —quenquio icquin Esusën ompoac bimboen chuipondash naden. —Tantia. Mibi bëdamboen chuinu. Chuca uac Nuquin Papa yacno tabadtequid mibi ictsianac. Chuca uabi yec mibi padenquio ictsiac ⁴—quesho tantiashien: —¿Mitsipaden tsusiobi chuca uapatsiash? Chidon padpiden usundoshon tsittiapimboen iquec —quepondash Nicodemo. ⁵Adsho tantiashun Esusën: —Nuquin Papan Mayanën tantiamic: “Nuquin Papa tantiaquin ëbi icsaid ëntiadquo iquebi,” quiaish bëdamboec tabadquid Nuquin Papabëd tabadtequid nendac. Adquid chuca uaid caimbi. Chuca uabi icquid

Nuquin Papa yacno tabadtiapimbo iquendac. ⁶Chidon tishaiduidsëqui yec Nuquin Papabëd tabadtiapimbo iquendac. Nuquin Papan Mayanën chuca uaid Nuquin Papabëd tabadendac. ⁷“Chuca uaiduidsëqui Nuquin Papabëd tabadendac,” ëbi quesheo tantiash: “¿Midapaden chie?” quepequien mibi iquec. ⁸Tantia. Mibi chuinu. Cunquequid isadenquo icquid nec. Isadenquo icquimbi cuncac cuëte ishcutdsho isash: “Abi cunquec,” mibi quepec. Adquiobidi isadenquo Nuquin Papan Mayan iquec. Isadenquo icquimbi aidën chuca uaid bëdamboec tabadsho isun: “Nuquin Papan Mayanën nac,” quequin mimbi tantiatsiac. “Nëid utsitsen natsiash,” quequin mimbi tantienquo icnubi Nuquin Papan tantiapadomboen aton Mayanën utsitsen chuca uatsiandac —quepondash Esus.

⁹Adsho tantiash: —¿Midapadec? —quepondash Nicodemo. ¹⁰Adoaquien: —¿Tantienquioda ique? Ma isadaidbo Nuquin Papan chiaid chuibanquid mibi neyoc. ¹¹Ënden ushë utsin mibi chedo chiombi. Ëmbi isondaidquo chuiquinc ëmbi tantiondaidquo chuiquinc caombi. Adsho tantiash: “Tantiadenquo iquec,” ma mibi quebec. ¹²Ëmbi chuiboed tantiadenquo icnubi padpiden chuiquin ëmbi Nuquin Papan abi yacnoshon naid chuishomenda tantiatsia? ¹³Nuquin Papa yacno matses nidtanambo iquec. “Ístanombi. Nadquo iquec,” quequin chuitiapimbo matses iquec. Ëmbien Nuquin Papa yacnuësh chondaidënquo: “Nadquo iquec,” quequin Nuquin Papa tantiamendac. ¹⁴¿Atotsi canuen nuquin tsusedpa Moisesën nisibimboecnuc shocosh nacnenaid dectampampic? “Nuquin Papan chiapadec ma aid isec nisin piad bëdanu,” quequin cuesten dectampampic. Adomboembidi matses

cuidmenquo icnuec cuesten dectamëdendabi ëbided cuidadec unësec. ¹⁵Ëbi tantiaquido unësacsho cuidenquo icquin Nuquin Papa yacno ëbëd tabadmenuc adendabi —quepondash Esus Nicodemo chiec.

Nuquin Papan matses abitedi tantiaquin naid

¹⁶Aden Esusën abided cuidadec unëste chuipondash. Nuquin Papan: —Ma adec abided cuidadec unësnu —quequin Esus chomepanëdash. —Unësquo iquec —quequin matses abitedi tantiaquidquo icquin Nuquin Papan cudasenquo icquin matsesmeshun aton Mado abentsëcquiobi abided cuidpanëdash. —Ëmbi adoaid con Mado tantiaquid unësacsho icsaido cuidacno nidmenquo icquin ëbëdi tabadmendambi —quequin aton Madoded cuidpanëdash. ¹⁷¿Matses cuidnuenda Nuquin Papan Esus matsesmepanëdash? Padenquo. Matses cuidenquo icnuen napanëdash.

¹⁸Aden aton Mado Esus tantiaquido cuidenquo icquin Esus tantiesabo cuidendac: —Con Mado chieshëmpec —qeshun. ¹⁹Nuquin Papan matsesmiadën Esusën abi icsaid chuisho matses icsambo icquidon tantiatiapimbo iquec. Ambi icsamboen naid ëntiapimbo icquin Esus tantiatiapimbo iquec. ²⁰Adquidon: —Ëbi icsaid Esusën utsibo tantiamenushe. “Ícsambo iquec,” ëbi canushe —qeshun Esus chieshëmpec. ²¹Nuquin Papan chiapadec tabadquidombien Esus chieshënenquo iquec. —Nuquin Papan namiapadec tabadquid nebique. Ma Esusën ëmbi bëdamboen naid chuibampanuna —quiash Esus tantiatie bumpec.

Uan acten mentoanquidën Esus chuioaid

²²Adec Nicodemobëd onqueboshien Esus nidpondash. Edusaden yacnuësh

nidec aid nidaidëmbi Udeya caidën capucueniondash. Abëd nidshobini Nuquin Papan chiaid Esusën chuibampondash. Adec nidshun Nuquin Papa tantiabenquido acten mentobeniondambi. ²³Adnubien adomboembidi con shënisionsen acten mentobeniac caondash. Enon caid yacnoshon Sadin caid anoentsëqui chunquen diadacnoshon matses dadpen acten mentoac caondash con shënision. ²⁴Chieshëmënkuidon quënën naudedabi adoac caondash.

²⁵Adnubien con shënisio bëd icquido con matses utsibëd: —Mimbi icsamboen chiec —quec chushcananac caondash. Con shënisio bëd icquido: —Uanën Nuquin Papa tantiabenquido bëdamboen acten mentobamposh —quesho tantiash: —Padenquio. Esusëmbien bëdamboen acten mentobaniosh —quepac caondash. ²⁶Adshumbien con shënisio bëd icquidon: —Nuqui chuiquid chiec nidnu. Nid —quianec nidquin con shënisio chuituidpac caondash. —Acte Odan caid uquë cuëmatsiucshun ïmitsicquid: “Nuquin Papan chomiaid nec,” mimbi cadio? Aidën mimbi naid dëniacquin matses dadpenquio acten mentobeniac caosh. ¿Ada bëda icpec? —caquien: ²⁷—“Nuquin Papan chiacpadomboen Esusën nash. Adomboembimbi naic,” qeshun Esus chieshëntiapimbo iquendabi. ²⁸“Nuquin Papan chomiaidpenquieni nec,” quequin mibi chiondambi. “ ‘Nuquin Papan chomiac bëdamboshë icquid choendac,’ quequin bëyuc choshon aid chiec nebi,” quiondabi mibi chiec. ²⁹“Ëmbi chuiboed nec,” quia sh Esus chosho istanec cuishonquepobi. “Con matses aton chido bedmiombi,” quia sh cuishonquiacbimboec cuishonquepobi. ¿Aden chido bedmequidën: “Min bënëbëd nidenda,” caquinda ictiosh?

Padenquio. Bënëbëd nidmiash bëdambo yacbimboec Esusbëd nidanesho isash bëdambo iquebi. ³⁰Ëmbi Nuquin Papan chiacpadomboen Esus tantiamequin ënquin chuibanuc ëmbi acten mentoaido daëdpactsëc yanendac. Ëmbi chuiboedquio Esus tantiaquidoen dadpenquio yanendac. Aidquio bëdamboshë iquec —quepac caondash con shënisio abëd icquido chiec.

Nuquin Papa yacnuësh choquid chiaid

³¹Adshumbic con shënision naden chui pac caondash. —Esusquio bëdamboshë iquec. Nuquin Papa yacnuësh choquid abipadquid utsi nibëdec. Padnueni matses yec: “Nuquin Papa isondambi. Nadquio iccondash” quequin chuitiapimbo iquebi. Esusëmbien ³²ambi isondaidbëdta ambi tantiondaidquio chuipec. Aden chiaqui matses dadpen: “Abimbo caic,” quenquio icpec. ³³Esus tantiaquidon: “Nuquin Papa muesambo nec. Ambi: ‘Bëdamboshë icquid choendac,’ quequin dada uamepampidquio Esus nec,” capec. ³⁴Nuquin Papan chomiaidquio icquin Nuquin Papan chiaidquio Esusën chuibanec. Nuquin Papan aton Mayan abëd tabadmiaid icquin comapenen tantiaquin ismebanquin chuibanec. ³⁵Ambi tantiaidquio icscho aton Papan abitedishun Icbombo icmiac. ³⁶Adnuc: “Abitedishun Icbombo Esus nec,” quequin aton Mado tantiaquido unësacsho Nuquin Papan abëdi tabadmendac padpidec unësenquio icnu. Esus chieshënkuido en Nuquin Papa yacno isenquio yec icsaïdo cuidquiacono nidendac —quequin con shënision chui pac caondash.

Acte uequid chido Esusën chiaid

4 ¹Esusbëd icquin Nuquin Papa tantiabenquido acten mentobanondambi. Adnubien con

matses chuiquido padiseyo caidon:
—“Uan acten mentoanquidën naid
dëniacquin Esusën matses dadpenquo
acten mentobanosh,” quiosh —queshun
Esus chieshëmpac caondash. ²Esusën
nainquo icnuc ëmbimbo nasho isun
chiaqui aden Esus chieshënac caondash.
³—Mibi adosh —cac: —Con nidaidën
nidnu —quianec nidondash Esus. Aid
nidaid Udeya caid yacnuësh nidec aton
nidaid Cadidia caid yacno nidondash.

⁴Aid podquedën nidequi nidaid utsi
yacno Samadia caid yacno nidpondash.
^{5,6}Adec nidquin ushë cuembo icnuc
shubu dadpen icquid Sicad caid yacno
istuidpondash. Aid anoentsëqui con
tsusedpa Acobon tied uampid
icpondash. Aid tied caic: —Ëbi nësan
nëid tied: “Con na nec,” cata, mado
—quequin aton mado Ose chiampid tied
niondash. Ambo aidën uëdëshcampid
acte uete icpondash. Aid dayunquiobi:
—Tiboquenu —quec Esus
tsadtuidpondash. ^{7,8}Adec
tsadtuidnubini: —Pete bedtanu
—quianec shubuno nidanepondac. Esus
abentsëqui nianec nidaniondabi. Adec
nidan Samadia yacnocquid chido acte
uec choquin Esus tsadsho
istuidpaccondash. Choshobien Esusën:
—Acte beccho. Acnu, champi
—caquien: ⁹—“Acte beccho,”
¿caquindabi ique? Ma isadaidbo mibi
nepayoc. ¿Isadaidbo icquindabi: “Acte
beccho,” cai? capac caondash acte
uequid chidon. —Samadia
yacnocquidbëd onquesambo isadaidbo
nec —quequin tantiec adac caondash.

¹⁰Adshobien Esusën badedquo
cuembo chienquo icquin chuipac
caondash. —Nuquin Papan bëdamboen
isquin naidbëdta ëbi tantiaquin: “Acte
beccho,” mimbi ëbi catsiac. Adsho acte
bëdambo icmianquid mibi acmetsiambi
—quepac caondash Esus. ¹¹Adoaquien

acte uequid chidon actembo ca danquin:
—¿Mitsipaden acte ueshun ëbi
menetsia? Ma min tëchu nibëdpayoc.
¿Midapaden mimbi uetiapimboen acte
uquëducquio iquec? ¿Mitsimbo acte
bëdambo icmianquid ueshun ëbi
acmetsia? ¹²Nëid acte nuquin tsusedpa
Acobon uëdëshcapampid nec. Aton
yuabobëdtan aton bacuëbon acpampid
nec. Nuquin tsusedpa bëdambo icquin
nampid icnuc ¿mitsipadquidquio icquin
nai? ¿Bëdamboshë icquid icquinda
mimbi acte bëdamboshë icquid ëbi
acmepatsia? —capondash acte uequid
chidon. ¹³Adoaquien: —Nëid acash mibi
bundoaic. ¹⁴Ëmbi acmiac mibi
bundoenquo ictsiac. Acte bëdambo
icmianquid acmiac ënëdenquo yec
tabadquid mibi yantsiac —quepac
caondash Esus badedi cuembo
chienquo yec. —Ëbi tantiaquidobëd
con Mayan tabadmiac bëdambo yanec
unësacsho ëbëdi tabadmendambi
—quequin tantiec adac caondash.

¹⁵Adsho tantiashun padpiden acte ca
danquin: —Adquidquio ëbi acme.
Bundoenquo yec nëmbo acte uec
choenquo ictsiabique —caquien:
¹⁶—Min bënë bedtan —capac caondash
Esusën. —Nuquin Papan chomiaidquio
yec comapenen tantiaquid mibi nec
—camenuen adoac caondash. ¹⁷—Min
benë bedtan —caquien acte uequid
chido: —Con bënë nibëdec —quepac
caondash. Adshobien Esusën: —Abimbo
mimbi caic. Min bënë nibëdec. ¹⁸Dada
mëdante auc abentsëctedquiobi min
benë icpadenec. Aidon mibi
niambudnian nëbi mibëd icquid min
bënëpenquo nec. Abimbo mimbi caic
—quepac caondash Esus.

¹⁹Adsho tantiash: —Isambobi
comapenen tantiaquidien mibi nechitec.
Mibipadquidquio chiec: “Nuquin Papan
chomiaidquio nendac,” quepec con

matses. Adquid icquin en ëbi chui.
 ¿Mitsishunquiemi Nuquin Papa
 bédamboen tantiapē? ²⁰Con matses:
 “Nēmboen Nuquin Papa iquec. Nēid
 macuēsh dapanshunuidtsēqui Nuquin
 Papa tantiac bédambo ictsiash,” quepec.
 Min matsesien: “Edusaden
 yacnoshonuidtsēqui Nuquin Papa
 tantiac bédambo ictsiash,” quepec
 —quepac caondash acte uequid chido.
²¹Adsho tantiashun Esusēn: —Tantia.
 Mibi bédamboen chuinu. Nēbi nēid
 macuēsh dapanshunuidtsēqui Nuquin
 Papa tantienquo icquin Edusaden
 yacnoshonuidtsēqui tantienquo icquin
 nidaid utsi-utsiec yacnoshon adembidi
 Nuquin Papa tantiabededendac. ²²Min
 matsesēn Nuquin Papan chiaid
 daēdpactsēc tantiatsēcshun Nuquin
 Papa bēdiactsēc tantiatsec. Con matses
 isadaidbombien Nuquin Papan chiaid
 dadpen tantiashun: “Nuquin Papan
 chomiaid nuquin matses bédambo
 icmianquid nuquin matsesēn tishendac,”
 quequin bédamboen tantiec. ²³Nēbien
 utsin-utsinquien muainquo icquin:
 “Con Icbo nec,” quequin Nuquin Papa
 tantiendac. Ambi chiacpadec
 bédamboec tabadsho isash: “Adquid ëbi
 tantiaquidquo nec,” quetsiash Nuquin
 Papa. ²⁴“Nuquin Papa tantiaquid
 ictiadquo iquebi,” quequidēn Nuquin
 Papan Mayanēn tantiamiacpadomboen
 abi tantiaquin ambi chiacpadomboen
 naquid nendac —quepac caondash Esus
 acte uequid chido chiec.

²⁵Adsho tantiash chido: —“Nuquin
 Papan matses bédambo icmequid
 chuiquid dapa chomendac,” quequin
 chuisho tantiondambi. Aid mesias caidi
 utsibon quidistu caposh. Aidēmbi nuqui
 tantienquo yaidtedi tantiametsiash.
 Aidbimboecquidien mibi nechitec
 —caquien: ²⁶—Mimbi chiaidquibini nec
 —quepac caondash Esus chido chiec.

Esus Samadia yacnocquido chiec tabadaid

²⁷Adnubini pete bedtanec chopondac.
 Adshun isquien chidobēd onquepec.
 Adsho isash: —¿Atotsi chiec chidobēd
 onquepec? —quepondabi utsibēd
 otacquo onquec. —¿Atotsi chiec
 chidobēd onquo? —cainquo
 iccondambi Esus. ²⁸Adec ëbi chonobi
 tēchu nianec acte uec choquid chido
 nidpondash aton matses chiec shubuno
 nidec. ²⁹—Isec cho. Ēmbi isacmaid
 dadan ěmbi naid abitedi chioshi.
 ¿Nuquin Papa yacnuēsh choquid
 Quidistu caidta nioshe? En isec cho
 —catuidac: ³⁰—En isnu. Nid. Aidien
 nechitashe. Isnu —quianec matses
 dadpen cho-chopondash.

³¹Aido choabi icnubi: —Nē pete, Icbo
 —ěmbi caquien: ³²—Padi. Mimbi
 tantienquo yaid con na utsi iquec
 —quepondash Esus petepenquo
 chiequi. ³³Adsho tantiashini pete ca
 danec: —¿Utsibonda pete bēshumpash?
 —quecuededpondac ěbitedi. ³⁴Adsho
 tantiash Esus: —Ēbi cuishoncamete utsi
 iquec. Ēbi chomiondaid Nuquin Papan
 chiacpadomboen naic bédambo iquebi
 pete piacbimboec. Ambi chiaidtedi
 nainuec dayacquio iquebi
 —quepondash. ³⁵Adashic padpidec:
 —“Ushē daēd-daēdquiecncuc nidmeshun
 nadquid adosbiecquid ēshēacsho
 bedembi,” quepec nuquin matses.
 Adosbiecquid ēshēacpaden čyuecshunda
 nēmbo icquidon ěbi tantiabempec?
 Padenquo. “Nēidon Esus tantiendac,”
 mimbi cacmaidobi cho-choeque. Is.
³⁶Acte uequid chido ěmbi chuiboedēn
 chiac matses dadpen cho-choeque.
 Chuibanuna. Ēbi tantiash Nuquin
 Papabēd tabadtequid yanendac. Adsho
 isash nuqui cuishonquendac piucquid
 bedashbimboec. ³⁷Tied icbon: “Con na
 peta,” cac ambi nidtsinacmaid matsesēn

bedec. ³⁸Aden ambi nitsinacmaid bedacimboen mimbi naic. Utsibomba Nuquin Papan chiaid chuibanëdaido nëmbo icquido mimbitsen chuibanec. Adoac nëmbo icquidon Nuquin Papabëdta ëbi tantiabenec. Cho-choeque. Is. En chuiban —capondash Esusën abëd icquido chuiquin.

³⁹Adnubien Esusbëd onqueboed chidon chuitanaido cho-chopondash. —“Comapenen tantiaquin ëmbi naid abitedi chioshi,” quioshe. Nuquin Papa yacnuësh choquidien nechitashe. Isnu. Nid —quianec cho-chopac caondash. ⁴⁰Cho-choquimbi badedi: —Ëbi yacno ushquin chiec cho —quequin beduanac Samadia yacno tabadquin chuibampondash Esusën. Aid matses chiec ambo daëdec ushpondash. ⁴¹Aden Esusën chuisho tantiashien: —Nuquin Papa yacnuësh choquid Esus nec —quiampondash anocquido dadpen. ⁴²Adashic acte uequid chido chiec: —Mimbi chuishouidi tantiaboedëmbi nëmmbi aidënquio chuisho bëdamboen tantiaquioc. “Nuquin Papa matses bëdamboen ismequid nec,” quequin tantiembi —quiampondash Samadia yacnocquido dadpen.

Chuiquid dapan mado Esusën bëdamiaid

⁴³Daëdec ushanec Samadia yacnuësh Esus nidondash. Abi caniondacno nidaid Cadidia caid yacno nidpondash. ⁴⁴—Ëmbi chiacpaden abi caniondacnoshon Nuquin Papan chiaid chuibanquidën chuisho aton matsesën tantienquio iquec. Con nidaidën nidsho con matsesën abi chuiquid dapa icmetiapimbo icpebi —quianec aton nidaidën chopondash. ⁴⁵Adsho isun: —Tantiesia nendac —Esusën caboedombi abi bëdiactsëc tantiatsëccondash. —¿Choecta icco?

Nuquin Papan nuquin tsusedpabo unës uainquio icquin matamiampid inchësh tantianuec Edusaden yacno nidshun mimbi nadatiambo icquin nabansho isondambi —quepondash abi bëdiactsëc tantiatsëcquido Esus chiec.

⁴⁶Adec aton nidaidën nidequi ambi actequid uaondacno Cana yacno nidpondash Esus. Adnubien shubu dadpen icquid utsi Capednaun caid yacno con matses chuiquid dapa icpac caondash. Aidën mado unës-tiadtsëcquio yampac caondash.

⁴⁷Adashic: —Esus Udeya yacnuësh choac caoshe. Istanu —quianec chopac caondash unëstiadtscquio icquidën papa. Adece Esus yacno choshombien: —Con mado unëstiadtscquio iccoshe. Bëdamec cho —caqui ⁴⁸nidenquio yec abi datsidadquido chiec: —Ëbimbo mimbi tantienquio iquec. Ëmbi bëdameteuidtsëqui mimbi tantiec. Ëmbi comapenen tantiaquin nabansho isunuidtsëqui: “Nuquin Papan chomiaidien nechitec,” quequin mimbi tantiec —quepondash Esus.

⁴⁹Adec onqueshobien abi niacbidanquin padpiden: —Baded cho. Con mado unëstiadtscquio iccoshe —capondash. ⁵⁰Adoquien Esus: —Padi. Min mado unësenquio ye. Nidec nid —quesho tantiash: —Abimbo caic —quianec nidpondash. ⁵¹Adec nidquimbi abi chuinuec cho-chosho aton yuabo bëquedac caondash. Aden bëquedaqui yuan: —Min mado bëdanosh —quesho tantiashun: ⁵²—¿Mitsimbo ushë icnuc con mado bëdanosh? —cac: —Ënden ushë yaquëduidsëcnubi da una yantsëcnubi bëdanosh —quepac caondash aton yuabo. ⁵³Adsho tantiash: —Adënquioshendabi: “Min mado unësenquio ye. Nidec nid,” caposh Esusën —quepac caondash

unëstsemboedën papa. Adshun:
—Nuquin Papan chomiaidquio yec
comapenen tantiaquin nabanquidquio
Esus nec —quequin aton shubun
icquidobëdtambi Esus tantiapac
caondash. ⁵⁴Adec Udeya yacnuësh
choash Cadidia yacnobidi ambi uba
chinaid actequid uaquin ismequin
tauaondacnobidi tabadquin
bêdamequintsen Esusën ismepondash.

Esusën dada icsatsaid bêdamiad

5 ¹Yuecquio ictanec Esus:
—Edusaden yacno cuëdënuec
nuquin matses cho-choeque. Nuquitsen
nidnu. Nid —quianec nidanepondash.
²Shubu dadpen icquid Edusaden caid
dacuenadquin daquënë uaid puduedte
shëcuë dadpen icnuc abentsëc obeca
puduedte caid icpondash. Aid
anoentsëqui acte tiquidimbo icquid
icpondash. Aid con onqueten Betesada
capondash. Ambobi daicsaido tabadte
shubumpi mëdantetedi icpondash. ³Acte
nënantanquio icnuc dacuenadquiec
shubumpi tabadquidën matses dadpen
tabadpondash daicsaidouidquio.
Bëshuaido yec capuenquio icquido yec
canite tsasiaido yec quec tabadpondash.
⁴—“Nuquin Papan abi yacnoshon uaid
mayan bêdan tèccuascaid acten abia
mentoadquid bêdanquid,” quedeneque.
Tèccuascaic ma chobono —quiash
cainec tabadpondash.

⁵Adnubien Esusën ënden caniaidquio
ambobi uesho istuidpondash.
Ëndenquimboshë aton dada icsabudash
seta dadpen 38tedquiobi matamec
capuenquio yec icsabudtsaidquio
nepondash. ⁶Adsho istuidshun:
—Ëndenquio daicsabudaid nec
—quequin tantiashun: —¿Bêdanteda
bune? —catuidpondash Esusën.
⁷Adoaquien: —Ai ¿mitsipadequini
bêdampe? Èbi bêdiactsëcquio nidnuc

utsiba badedquio mentoadteniosh. Èbi
buanquin mentoquid nibëdec
—quepondash daicsatsaid. ⁸Adshobien
Esusën: —Min ushte nacnentanquin
buanec nid —cac ⁹badedquio aton dada
bêdantanquin aton ushte buanec
nidpondash. Aid ushë chonoadenquio
icte ushë niondash.

¹⁰Aden buanshobien con matses
chuiquidon: —¿Chonoadenquio icte
ushënda ushte buampaid? Chonoadte
ushëmbien ushte buanquid.
Tsusedpabon dada uapampid ma mimbi
niacpayoc —quequin chushcapac
caondash. ¹¹Adoaquien: —Èbi
bêdameboedën: “Buanec nid,” cac
mambi naiyoc —quepac caondash
Esusën bêdameboed. ¹²Adsho
tantiashun: —¿Tsuntsin naosh?
—caquien: ¹³—Tsaudi. Èmbi isacmaid
ëmbi isquiamboi badedquio nidaccosh
matses dadpen icnuc —quepac
caondash bêdameboed.

¹⁴Adshumbic Nuquin Papa tabadte
shubu uashunaid daquënë uacno
puduedshun ambi bêdameboed
daicsacboed Esusën istuidpondash.
Istuidshumbien: —Tantia. Mibi chuinu.
Èmbi bêdameboedquio mibi neque.
Mimbi icsamboen naid ënash bêdambo
icta. “Nuquin Papan cuidquiac
bêdanenquio yec
daicsabudquiochitomane,” quiash adta
—capondash Esusën.

¹⁵Adoaquien bêdameboed abi:
“¿Tsuntsin naosh?” caboedo chiech
nidpac caondash. Nidshumbic: —Èbi
bêdameboed Esus niosh —quequin
chuituidpac caondash. ¹⁶Aden chuisho
tantiatanequien: —Chonoadenquio icte
ushënuidi bêdamepac caosh. Icsambo
iquec —quequin con matses chuiquidon
Esus chieshëmpac caondash.
¹⁷Adnubien: —Mibi adosh —quesho
tantiashun abi chieshënuquido istuidshun

Esusën naden chuipondash. —Mimbi Nuquin Papa caid con Pa ënenquo icquin matses nashunquidquo nec. Adecbidi ënenquo icquin matses nashunquidquo nebi. Chonoadenquo icte ushëmbidi con Pabëdtan adoquid nebi —quepondash Esus. ¹⁸Adsho tantiatanequien: —“Chonoadenquo icte ushën naquid icsambo iquec,” nuqui caboedquo: “Nuquin Papambo con pa nec,” quioish. Adquid icsamboshë iquec. “Nuquin Papapadquidquo nebi,” quechitequien nioshe. Cuesunequimbien ictiad —quepac caondash con matses chuikuido.

Nuquin Papan Mado nebi, quiaid

¹⁹Adec abi chieshënkuido abi cuesunete bunshobien padpiden istuidshun chuipondash Esusën. —¿Ëmbimbo naidtambi nadio? Padenquo. Con Pan nasho isun aidën nacpadomboen mambi naboc. Adomboembidi Con Pan nacpadomboen naimbi. Ëmbentsëqui natiapimbo iquebi. ²⁰Ëbi tantiaquin Con Pan ambi naidtedimbo ëbi tantiamec. Ambentsëqui nainquo iquec. Aidën tantiamiacpadomboen bëdiactsëc naquin nëid capuenquo icquid bëdamiombi. Adembidi ambi tantiamiacpadomboen naquin dacuëdampamboecnuc naindambi ma isquionoeshun. ²¹Con Papadquidquo yec unësaid uincumequidquo nebi. Matses ëmbi tantiaidotedi ëbëdi tabadmenuen uincuemendambi. ²²Ëbi tantiesabo cuidnuen ambiuidtsëqui chuikuidta con Pa nedic? Padenquo. Ëmbien ambi chiacpadomboen naden chiendac. “Nëid nuqui tantiaquid neque. Nuquibëdi tabadmenuna. Nëid ëbi tantiesa icsambo icscho cuidnuna,” caindambi con Pa. ²³Aidëmbi: “Ëbi tantiacpaden ma con Madotsen

bëdamboen tantianu,” queshun aden matses cuidte chuiquid icmiondashi. Ëbi adquid icmiondaid icscho ëbi tantiatiapimbo icquidon ëbi chomiondaid Nuquin Papatsen tantienquo iquec. ²⁴¿Muectabi nedi? Abimbo chuinu. Tantia. Ëbi chomiondaid con Pabëdtan ëbi tantiaquid unësacsho cuidenquo icquin ëbëdi tabadmendambi. Cuidtequid icboedi ëbi tantiaish ëbëdi tabadtequid yanendac —quepondash Esus.

²⁵Adashic padpidec onquec: —Tantia. Mibi padpiden chuinu. Unësaidën tantienquo yacimboen ëbi tantienquo icboedombi ëbi tantiabensho bëdamboen tantiamequin bëdamboec tabadquid icmendambi. Adshun aido unësacsho uincuemeshun ëbëdi tabadmendambi. ²⁶Con Pan icmiacpadequi unësaid uincumequid nebi. Abibi unëstiapimbo icquid icquin unësaid uincumequidquo con Pa nec. Ambi icmiacpadequiqui abi yacpadquidquo iquebi. ²⁷Adec unëstiapimbo iccondaidi matsesash icsaisambo icscho Con Pan matses icsaido cuidquid icmiondashi. ²⁸Ëbi adsho tantiaishun: “¿Abimbobida capeba? Muequien nechitec,” ëbi cainda. ¿Muectabi nedi? Padenquo. Con Pan tantiacpadënquo ëmbi cuënac unësaidotedi uincuenendac. ²⁹Adec uincuenacsho ëbi tantiaquido ëbëdi tabadmequin ëbi tantiesabo icsaido cuidacno nidmendambi. ³⁰Ëmbentsëqui nainquo iquebi. Con Pan chiacpadomboen naquin matses cuidte chiendambi. Matsesën naidtedi tantiaquid icquin adoendambi. Ëmbi naid nainquo icquin Con Pa bëdambo icmenuen aidën chiacpadomboen naimbi —quepondash Esus abi chieshënkuido chieci.

**Utsintsen ëbi chiec,
quequin Esusën chiaid**

³¹Adshumbic Esusën abi chieshënquido chuiopondash. —Nuquin matsesën naden chiec. “Abentsëcshun chiaid icsambo iquec. Daëdshun chiaid abimbo iquec,” quequin chiec. Aden chiaid tantiec ëbiuidtsëqui: “Nuquin Papan Mado nebi,” qesho tantiashun: “Abimbo mimbi caic,” mimbi ëbi catiapimbo iquec. ³²Ëbi tantiaquin abimbo chuiquid ma utsi iqueyoc. Nuquin Papambini: “Con Madombo nec,” caindac. ³³Aden ëbi chuiquid utsi acten mentoanquid Uan pado icpadenec. Aidëmbi ëbi abimbo capadenec. “¿Nuquin Papa yacnuësh choquidta ne?” quequin mimbi chuitanac: “Padenquio. Esusuidi Nuquin Papa yacnuësh choquid nec,” quepadenec Uan pado. ^{34,35}Aden chieshtoenquio icquin bëdamboen chuipadenec. Chuiho tantiatsash mibi bëdambo icuidtsëccondac. “Ëmbi Uan padon naid chuisho tantiashun: ‘Abimbo mimbi caic,’ ëbi capashun. Ëbi adosho bëdamboen istsiambi,” quequin mimbi tantiondaid Uan caombi. Matses icquimbi Uanën ëbi bëdiactsëc tantiaquequin chuipadenec. ¿Adquid matsesënuidsëquidabi abimbo chuipec? ³⁶Con Pambien: “Con Mado neque. Matses ismenu,” qeshun comapenen tantiaquidquido icmepondashi. Ambi adomiaid icquin comapenen tantiaquin nabanquin ëmbi ismesho isash: “Ai, adquid nec,” quetiadquidi mibi nec. ³⁷Ëbi chiecbidi onquequin Nuquin Papan nuquin tsusedpabo dada uamepampic. Adecbidi Nuquin Papa onquesho ¿ada mimbi tantiapadio? ¿Nuquin Papada istio? Padambo mimbi iquec. ³⁸Adembidi ambi dada uamequin chiampidquido ma mimbi bëdamboen

tantienquio yoc. Aid bëdamboen tantiashumbien Nuquin Papan chomiondaid ëbitsen mimbi tantiatsiac. ³⁹Mibi nadpec. “Nuquin Papan chiaid nuquin tsusedpabon dada uampid tantiaquidquido nebi. Aid isbanquid yec Nuquin Papabëd tabadtequid nebi,” mibi quepec. Ma ëbimbo chuiquin Nuquin Papan dada uamepampid neyoc. ⁴⁰Aden dada uamepampid isbanquidombi mimbi ëbi tantienquio iquec. Ëbi tantiashoembi mibi Nuquin Papa yacno ëbëd tabadmetsiandac. ⁴¹“Ëbi adsho tantiashun ma matsesën ëbi: ‘Bëdambo mibi iquec,’ canu,” ¿quectabi ique? Padenquio. Con Pan chiacpadomboen nanuembimbi aden chioc. ⁴²Ëbi tantienquio icscho isun: “Nuquin Papa tantiesabo nec,” quequin mibi tantiembi. ⁴³Ëmbien Nuquin Papan chiacpadomboen naic. Aden nasho mimbi ëbi tantienquio iquec. Utsi: “Nuquin Papa yacnuësh choquid nebi,” quec muaquidien mimbi badedi tantiatsiac. ⁴⁴Mibibi tantiadec: “Mibi bëdambo iquec,” cananteuidi bunquin mimbi Nuquin Papa tantiatiapimbo iquec. Aden mimbi Nuquin Papa: “Mibi bëdambo iquec,” cametiapimbo iquec —quepondash Esus abi chieshënquido chiec.

⁴⁵Adashic padpidec: —¿Ëmbentsëquidambi: “Ëbi tantiesabo neque. Cuidnuna,” quequin mimbi naid Nuquin Papa chuipe? Padenquio. Mimbi tantiaidënquio Moisesëtsen: “Nëido icsambo iquec,” mibi caindac. ⁴⁶Aidën chiampid bëdamboen tantiaquimbien mimbi ëbi tantiatsiac. Aidën chiampidi mabi neyoc. ⁴⁷Aden Moisesën chiampid tantienquio icquin ëmbi chuiboedtsen mimbi tantiatiapimbo iquec —quequin Esusën abi chieshënquido chuipondash: —Moisesën chiampid tantiaquidquido nebi —quequido chuiquin.

Esusën Pete uatanquin 5000tedi pemiaid
(*Mat. 14.13-21; Mad. 6.30-44; Duc. 9.10-17*)

6 ¹Yuecquio ictaniash Edusaden yacnuësh nidec Cadidia yacnobidi Esus nidpondash. Ambo nidash chian dapa Cadidia caidbidi budash cano antabëdtoshon potiacpondash. Aid chiambidi matses utsibon Tibedias capondash. ^{2,3}Poteshun nandoash pudundoanec macuësh dapa dectatoash macuësh poctsebi tabadtuidpondash. Ambo tabadquin ëbi chedo chuipondash. Adnubien Esusën matses dadpen bëdamesho isboedo Esus isnuec cho-chopondash. ⁴Nuquin Papan isadaidbo unës uainquio icquin matamiampid inchësh tantianuec pec tabadte ushë nëbi yanuc niondash.

⁵Aido cho-chosho istanequien Esus: —Uedipe, piucquid buanshun ðmitsimbo Pete bedtane nëido pemenun? —quepondash Uedipe chiec. ⁶—¿Atoda queque? Tantanu —quiash adpondash Esus. —Pete bedabi icnuc ëmbibi Pete uanu —quequin otacquio tantiequi adondash. ⁷Adoquien Uedipe: —Ma aidtedquio pemetiapimbo yoc. Inchëshën ushë 8tedquiobi nidmec chonoadshun bedaidtedimbo piucquid menequin Pete bedshun: “Pemeni,” cac aidtedquio pemiadenquio ictsiash —quepondash Uedipe.

⁸Adnubien Andedesën Petedon utsin: ⁹—Ma në madompin panëmpi 5tedtsëc icpayoc, Icho. Nuëcquidëmpi daëdquiobi ictsec. Matses dadpenquio iquec. Aidtedtsëcquid pemetiapimbo iquec —caquien ¹⁰Esusën: —Padi. Aidi bëdambo iquec. Abitedi: “Nëmbo tabad,” caban —cac: —Nëmbo tabad —cabanac sebad-sebadpambo icquidën uasinën matses dadpenquioshë tabadbudpondash. Dadauidtsëqui tambanac 5000ted icpondash. Chido

bacuëbobëdta tambanambo icpondambi.

¹¹Adshumbien Esusën madompin Pete pamba bedtanquin Nuquin Papa chuipondash. —Pete uaquid yec mibi bëdamboshë iquec. Mimbi uaid nëid Pete bëdambo iquec, Papa —quec onquetanquin: —Meneban —cac abëd icquidon tabadquido abitedi menebampondash. Adotanquimbic nuëcquidëmpitsen bedtanquin ademibidi Nuquin Papa chuitanquin menebanoapondash. Adoac utsibon ambi piactembi pebedednubi utsibon ambi piactembidi pebededpondash.

¹²Aden ambi piactembi pebededacshobien Esusën: —Napi uaid secainda. Sandoshon dayun ua —cac ¹³tsitsan dapan napiuaid sandoshon dayun uapondambi tsitsan 12tedquiobi sandoaid icnuc.

¹⁴Aden pemiaquien pemiaido: —Comapenen tantiaquin Esusën Pete dadpenquio icmiac. Moisesën chuipampidshenda nepec. “Nuquin Papan bëdamboshë icquid chomendac,” capampidshenda nepec. Aidien nuqui chuiquid dapa icmetiad —quepac caondash Esus tantiamenquio yec. ¹⁵Adsho ambembi tantiashien: —Abi chuiquid icmenuen ëbi “Bednu,” caique. Nëbi abi chuiquid ictiapimbo iquebique. Cuenu —quianec abentsëqui cuempac caondash Esus macuësh dapa dectatoec nidec.

Esus acte bëntse choaid
(*Mat. 14.22-27; Mad. 6.45-52*)

¹⁶Esus cuembon inchëshbudtsëqui chian budondabi ëbitedi.

¹⁷—Capednaun yacno nidnu —quec cano antabëdtoshon potenubi inchëshpondash Esus acte bëntse chopanushta. ¹⁸Adnubien cunquequid dapa cunquetuidpondash. Acte

comapenec tëccuasquenuc
¹⁹uncadenquo yampondash. Ēnapen
 nidabi nēbi 6 quidometedos
 cactiontsēqui nidshun isquien
 matsesbimboec acte bēntse chopec.
 Adsho istanec dacuēdquiondabi.
²⁰Adshobini: —Ēbi neque. Dacuēdenda
 —capondash. ²¹Adoac: —Esus nec
 —quetanquin badedi
 antsadtomiondambi. Aid
 antsadtometanquin badedquo
 potepondambi. Nandoash ambobi
 ushondabi Capednaun yacno.

Pemiaidon Esus istuidoaid

²²Adnubien abi pemebocnobi matses
 ushpac caondash. Badiadnuc
 isucunshun isaquien Esus nibēdec.
 Nibēdsho isashien: —Ma cano
 abentsēcquidēmbi abēd icquidon
 potepaboc. Ma aidbēd nidenquo
 icpaboc. ĒMitsimbo nidpash? —quepac
 caondash pemiaido. ²³Adnubien shubu
 dadpen icquid Tibedias caid
 yacnocquidon cano dadpen bē-bēpac
 caondash. Pete pemebocno anoentsēqui
 nando-nandosho isash:
²⁴—Potequimbien Esusēn yashe. Nēid
 canobi antabēdtoshon potenuna
 —quetanec antabēdtoshon
 potiac-potiacpac caondash.

Potiac-potiacash Capednaun yacno
 pudundoshon ²⁵Nuquin Papan chiaid
 chuibante shubun abitedi puduedshun
 Esus istuidpondash. Istuidshun:
 —ĒMitsipaden potio, tsusio? —caquien:
 —Naden —quenquo yec: ²⁶—Tantia.
 Mibitedi chuinu. ĒĒbimbo tantianueta
 chodio? Padenquo. Ēmbi pete uasho
 isash: “Nuquin Papan namiaidēn
 naoshe. Istanu,” Ēquecta ictio?
 Peteuidtsēqui tantiaquin ma mimbi Ēbi
 nibēneyoc. ²⁷Peteuidtsēqui tantiaquin
 pete bednuen naquidquo ma mibi
 neyoc. Aidquo chodquetequid nendac.

Chodqueteapimbo icquid tantiaquin
 bēdamboen nata. Aden nash Ēmbi
 icmiacpadquiec Nuquin Papabēd
 tabadtequid mibi yanendac. Nuquin
 Papan: “Con Mado neque. Ismenu,”
 quequin namiacpadomboen comapenen
 tantiaquid icquin mibi adquid
 icmetsiambi —quepondash Esus.
²⁸Adsho tantiash: —“Nuquin Papan
 chiacpadomboen nata,” quepequien
 mibi iquec. Adomboen natiadquo
 icquin Ēatotsimbi nape? —caquien:
²⁹—Nuquin Papan chiacpadomboen
 natiadquo icquin ambi
 chomiondaidquo tantiata
 —quepondash Esus ambi pemiaido
 chiec.

³⁰Adoaquien: —ĒMimbi aden
 chuishouididambi: “Adquid nec,”
 quequin tantiape? ĒAtotsi utsi
 comapenen tantiaquin mimbi Ēbi
 ismepatsia? ³¹“Ēendenquimboshē pete
 nibēdacnoshon Moisesēn con
 tsusedpabo nibēdbēdi sequiaid pete
 pemiaepampic,” quequin dada
 uapampid isombique. Adquid
 nacnenquin Ēbi isme —quepondash
 pemiaido peteuidtsēqui tantiec.

³²Adoaquien Esus: —Nuquin tsusedpa
 Moisesēn nainquien icpampic. Con
 Pambien aden pemepampic. Nēbi ambi
 chomiondaid petebimboecquid utsien
 Nuquin Papan mibi tantiametiadquo
 iquec. ³³Aid petebimboecquidēn matses
 bēdambo icmetsiash pete
 piacbimboecnuc —quepondash Esus
 abibi cadequi.

³⁴Adsho tantiash petembo ca danec:
 —Ēnenquo icquin adquid Ēbi pemeta
 —quepondash pemiaido ambi
 peboeuidtsēqui tantiec. ³⁵Adshobien
 Esusēn: —“Ēbiuidtsēqui
 petebimboecquid icquin matses
 bēdambo icmequid nebi,” caimbi. Ēbi
 tantiaquid Ēnenquo icquin bēdambo

icmendambi petebëdi acte bundoenquoio yac bimboecnuc. ³⁶Ëmbi chuibocpadomboen ma mimbi ëbi tantienquoio icboc. Ëmbi comapenen tantiaquin nabansho isumbi ma mimbi ëbi tantienquoio icboc. ³⁷Utsibombien ëbi tantiendac. Nuquin Papan tantiamiaidtedishun ëbi tantiasho bëdamboen isquin cacumenquoio iquendambi. ³⁸¿Ëmbi tantiacpadomboen naquidtabi nedi? Padenquoio. Nuquin Papan chiapadomboen nanuec mabi abi yacnuësh chondac. ³⁹Aden aidën chiapadomboen nanuen ëbi tantiaquido unësacsho uincuemeshun cuidenquoio icquin ëbëdi tabadmendambi. Unësaid abitedi uincumete ushën adoendambi. ⁴⁰Nuquin Papa bunacpaden ëbi tantiaquido uincuemeshun Nuquin Papa yacno ëbi tabadacnombo tabadmendambi —quepondash Esus ambi pemeboedo chiec.

⁴¹Adec: —Nuquin Papa yacnuësh chondaid yec petebimboecquid nebi —quesho tantiasien con matses chuiquido; ⁴²—¿Adquidida nepec? Ma icsamboen chuipayoc. ¿Nuquin Papa yacnuësh choaidta nedic? ¿Nuqui isacmaidta nedic? Ma Esus cuëmédquid neyoc. Ma Osen mado neyoc. Anitsen tantiemi. Matsesën tishaid Nuquin Papa yacnuësh choquid ictiapimbo iquec —quecuededpondash.

⁴³Adshobien Esusën: —Shoshquetsëcquin ëbi icsamboen chienda. Abimboemi caoc. ⁴⁴Ëbi chomiondaidën Nuquin Papan tantiamiabi yaido icquin mimbi ëbi tantiatiapimbo iquendac. Nuquin Papan tantiamiaid icquin mimbi ëbi tantiatiasiac. Aden Nuquin Papan ëbi tantiamiaido unësacsho unësaid uincumete ushën uincuemendambi. ⁴⁵Aden Nuquin Papan tantiamete

chuiquin nuquin tsusedpan dada uapampic. “Nuquin Papambien ambi bëdamboen iste matses tantiamendac,” quequin chuiampic. Aden Nuquin Papan tantiamiaido ëbi tantiaquido yantsiash. ⁴⁶“Ambi tantiamiaidën matsesën Nuquin Papa ispash,” quenquoio iquebi. Ëmbiuidtsëqui abëd icquin Nuquin Papa isondambi. Aden abëd icquin abi isondaidi matsesondabi —quepondash Esus: —Matsesi nec —abi caquido chiec.

⁴⁷Adashic padpidec: —Abimbo caombi. Ëbi tantiaquido Nuquin Papa yacnombo ëbëdi tabadmendambi.

⁴⁸Petebimboecquid icquin aden tabadmendambi. Adecbidi bëdamboec tabadmianquid nebi. ⁴⁹Nuquin tsusedpabon pete utsi nibëdacnoshon mana caid pepampic. Aid pequidi tsusiobudash unëspampic unëstiapimbo icquid yanabi. ⁵⁰Petebimboecquid utsien Nuquin Papa yacnuësh chondaid nëmbobi iquec. Aid piash ëmbi chiapadquiec padpidec unësenquoio yec Nuquin Papabëd tabadtequid yanendac. ⁵¹Adquidquid nebi. Con nami piash matses unëstiapimbo icquid yanendac. Adquidquid matses icmenuc ëbided cuidadquin con nami menendambi —quepondash Esus ompoac bimboen chiec. —Ëbi tantiaquido nëbi bëdamboen tabadmeshun unësacsho Nuquin Papa yacno ëbëdi tabadmendambi padpidec unëstiapimbo icnuc —quequin tantiec:

—Petebimboecquid icsho ëbi piash matses unëstiapimbo icquid yanendac —quepondash Esus. —Ëbi tantiaquido cuidmenquoio icnuec ëbided cuidadec unësendabi —quequin tantiec: —Con nami menendambi —quepondash Esus.

⁵²Adec: —Con nami piash matses unëstiapimbo icquid yanendac —quesho tantiasien namimbo ca danec con

matses chuiquido onquecuededpondash. Utsi-utsiec: —¿Mitsipaden Esusën aton nami nuqui pemepatsiash? Aidquio tantiatiapimbo iquebi —quecuedednubi utsi-utsiec: —¿Atotsi chuitiadquio yec niosh? Chuisho tantianu —quecuededpondash.^{53,54} Adsho tantiashun Esusën ambi chiacpadomboembidi chuiopondash. —Tantia. Mibi chuinu. Matses tantiaquidquio nebi. Aden tantiaquiec ëbided cuidadec unësendabi. Ëbi adec unëso isun con nami pequinc con intac acquinc cash nidaidënuësh bëdamboec tabadquid yanash Nuquin Papabëd tabadtequid mibi yanendac. Adquid icsho unësaïdo uincuemete ushënquio uincuemendambi ëbëdi tabadmenuen. Ëmbi chiacpadomboen nainquio yash Nuquin Papabëd tabadtiapimbo mibi iquendac.⁵⁵ Ai, con nami petebimboecquid nec. Con intac actebimboecquid nec. ¿Petebëdi acte naimëdanda mibi bëdambo icpatsia? Adecbidi con intac chididiquec con nami icsabudec ëbided cuidadec unësaïd tantienquio yec mibi bëdamboec tabadtiapimbo iquendac.⁵⁶ Aden ëmbi namibëdta intac chuisho bëdamboen tantiashun ëmbi chiacpadomboen matsesën natiadquio yanendac. Adsho isun aidbëd tëshnanenquio icquin bëdamboec tabadquid icmendambi.⁵⁷ Nuquin Papa unëstiapimbo icquid yec matses uincuemequidquio nec. Aidën chomiac ambi namiacpadomboenuidi naquin ëbi tantiec tabadquid unësaçsho uincuemequin unëstiapimbo icquid icmendambi.⁵⁸ Aden ëmbi naid tantiamenuec: “Nuquin Papa yacnuësh chondaid petebimboecquid utsi iquec,” quiobi. Ëbi adquid icsho isash ëbi tantiaquid Nuquin Papabëd tabadtequid yantsiash. Nuquin tsusedpabon

pepampidpadquidpenquio nebi. Adquid pequidi tsusiobudash unëspampic. Ëbi tantiaquidien padpidec unëstiapimbo icquid yanendac⁵⁹—quepondash Esus Nuquin Papan chiaïd chuibante shubunuësh Capednaun yacnuësh.

Abi tantiauidquidon Esus nianondaid

⁶⁰Adec: —Con nami pequinc con intac acquinc cash mibi bëdambo ictsiac —Esus qesho tantiashien abëd icquido utsi-utsiec: —Aidën chiacpadomboen natiapimbo iquebi. Icsamboen chiec —quepondash Esus tantiamenquio yec.⁶¹ Adec onquesho ambembi tantiash Esus onqueoapondash. —¿Ëmbi chuiboed tantiash chieshtotiadquioda ique? ⁶²Nuquin Papan matsesmiaïd yequi unësash ëbi iccondacno ëbi nidacsho isash ¿atoda mibi quendac? Abimbo caombi. Nuquin Papa yacnuësh chondaidini nec.⁶³ Namimbo intacquiobëdta ca danequien mibi nec. ¿Namimbo pequinc intacquo acquinc cashta mibi bëdambo icpatsia? Padenquio. Nuquin Papan Mayanën ëmbi chuiboedbëdta ëbi tantiamequin matses bëdamboec tabadquid icmetsiash. Adoaid unësash Nuquin Papa yacno ëbëdi tabadtsiash —quepondash Esus cuembo chiec.⁶⁴ Adashic padpidec: —Ëmbi aden bëdamboen chiaqui utsin-utsinquien mimbi ëbi tantienquio yanendac —quepondash abi tantiauidquido chiec. Aido tauamboec abëdi nidnuc: —Nëidën ëbi tantienquio yanendac. Nëid utsin ëbi chieshënkquido ëbi bedmendac —quequin ambembi Esusën tantiaapanëdash.

⁶⁵Adashic padpidec: —Ëbi tantiauidquido tantiaquin naden chiombi. “Nuquin Papan tantiamiabi yaidën ëbi tantiatiapimbo iquendac. Nuquin Papan tantiamiadënquien ëbi

tantiatsiash,” quequin chiombi —quepondash Esus. ⁶⁶Adsho tantiashun dadpeshun Esus nianondash. ⁶⁷Aden nianaquien Esusën abëd icquido 12ted icquid chuipondash. —¿Mimbitsendabi niampe? —caquien ⁶⁸Petedo: —Padenquio. ¿Tsudabëd icnuendambi mibi nianuc? Mibipadquid utsi nibëdec. Mimbuiidtsëquien: “Èbi tantiaquid bëdamboen isquin unësacsho uincuemeshun ëbëdi tabadmendambi,” quequin chuipoc. ⁶⁹“Abimboen caosh,” quequin mibi tantiambi. “Nuquin Papa yacnuësh chonëdaid yec bëdamboshë icquidquien nec,” caombi mibi. Mibi niantiapimbo iquebi —quepondash Petedo Esus caic. ⁷⁰Adoquien Esus: —Ai, mibi adquid icnuc utsien icsambo iquec. Mibitedi: “Nuquibi icnu. Cho,” cabampondambi. Èmbi adondaid abentsëc Satanasën namiaidquio yec icsamboshë iquendac —quepondash Esus. ⁷¹—Simon Iscadioten mado Udasën ëbi chieshënkuido ëbi bedmendac —quequin ambembi tantiash adondash Esus.

Aton utsibon Esus tantienquio yaid

7 ¹Abi tantiauidquidon nianac Cadidia yacnoudi yuec Esus capucuenepondash. —Nidaid Udeya caid yacnocquido con matses chuiquidon ëbi cuesunetiadquio iquec —quiash Udeya yacno nidenquio icpondash. ²Adnubien con matses abitedi: —Edusaden yacnuësh cuëdëntanu —quiampondash. Adanec nidaid utsi Udeya caidën nidec 7tedec ushec cuëdënuéc matses dadpen nidacno Edusaden yacno nidanepondash. Cuëdënuéc Esus nidenquio icpondash. ³Adec nidenquio icsho isumbien aton utsibon: —Edusaden yacno nidec nid. Mibëd ictiadquio icquid ano icnushe.

Comapenen tantiaquin nabanquin aido ismec nid. ⁴¿“Ma matses dadpeshun ëbi tantianu,” quequinda matses daëdpactsëc yacnoshonuidi napec? Matses dadpen yacno nidshun comapenen tantiaquin nabanquin ismec nid —capondash aton utsibon. ⁵—Nuquin Papan chomenëdaidquio nec —quequin tantienquio icquimbi adopondash aton utsibon.

⁶Adoquien Esus: —Matses dadpen nidnuc nidtiadquio yec mibia nidta. Abitedishun isnuc nëbi nidtiapimbo iquebique. ⁷Mibien anocquidon chieshëntiapimbo ye. Mibia nidta. “Nuquin Papan chiaid niac-niaquec mibi icsaic,” ëmbi cac chieshënondashibique. ⁸“Cuesunenushë,” quiash nëbi nidtiapimbo iquebique. Mibia nidta. Nuquin Papan tantiacpadec nidendabi ⁹—quiash anobi Cadidia yacno Esus tabadpondash.

Esustsen Edusaden yacnuësh cuëdënuéc nidaid

¹⁰Aden aton utsibo nidanemiash yuec-yuecpactsëc ictanec abitsen Esus nidpondash Edusaden yacnuësh cuëdënecc nidec. Abitedi ismenquio yec tsyuec Esus nidpondash. ¹¹Adnubien con matses cuëdëncuededacnoshon abi chieshënkuidon Esus nibëmpac caondash. —¿Mitsimbo icpec? ¿Ada nëmbo chosh? —quequin chuibenepac caondash. ^{12,13}Adsho tantiash con matses Esus chieshënkuido dacuëdënecc utsibo tantiamenquio yec sho-shoshquetsëcquiecc onquepac caondash. Utsi-utsiec: —Esus bëdamboshë icquid nec —quenubien utsi-utsiec: —Ma icsambo icquid neyoc. “Nuquin Papa yacnuësh chondaidini nec,” quec ma muequi neyoc —quec onquecuededpac caondash.

¹⁴Adnubien con matses cuëdënecc taëbon abentsëc choec ushash Nuquin

Papa tabadte shubu uashunaid daquënë uaidën Esus puduedpondash. Puduedshumbic Nuquin Papan chiaid chuibampondash. ¹⁵Adsho tantiash: —¿Mitsipaden tantiashun chuiopen naic? Nuquibëdtan Nuquin Papan chiaid isbanambo aidën iquec —quepondash con matses chuiquido. ¹⁶Adsho tantiash Esus: —Ëmbembi chienquo icquin ëbi chomiondaidën chiaidquo chiec nebi. ¹⁷Nuquin Papan chiapadomboen natiadquo icquidën bëdamboen tantiatsiash. Ëmbi Nuquin Papan chiaid chuisho tantiash: “Nuquin Papan chiaidquo chiec nec,” quequin tantiatsiash. Ëmbembi chuisho tantiash: “Ambembi chiaid nec. Nuquin Papan chiaidpenquien nec,” quequin tantiatsiash Nuquin Papa tantiaquidën. ¹⁸Ambembi chuiquidën: “Mabi matsesën bëdambo canu,” quequinuidtsëqui chuibantsiash. Adquidpenquien nec. Ëmbien: “Ëbi chomiondaidquo ma matsesën tantianu,” quequin ambi chiaidquo chiendac. ¹⁹Mimbien adoenquo iquec. Mimbi tantiaid nuquin tsusedpa Moisesën: “Cuesunenda,” quequin Nuquin Papan chiaidquo dada uapampic. Ëbi: “Cuesunenu,” caquin aidën chiaid ma mimbi niac-niaqueyoc —quepondash Esus abi chieshënkuido chiec.

²⁰—Mimbi ëbi: “Cuesunenu,” caoc —Esus qesho tantiashumbien ano tabadquidon: —Podobitsi icsa dapuededash mibi tantiadenquo yec onquepec. ¿Tsuntsin mibi cuesunepatsiash? —capondash. ²¹Adoquien Esus: —Nëidën ëbi cuesunetsiash —quequin chienquo yec: —Chonoadenquo icte ushën comapenen tantiaquin dada bëdamepondambi. Aden bëdamiacsho isash: “Adopenshenda naic. Chonoadenquo icte ushën daicsatsaid

bëdamequin Nuquin Papan chiaid niac-niacposh,” ma mibi quepondac. ²²¿Ëmbentsëquidambi chonoadenquo icte ushën nadi? Ma min matsesën adoapaboc. Mimbi tantiaid Moisesën chiaid tantiaquin dada bacuë tishacsho 7tedec ushun shui dëbid dëteshunequid mibi nec. Moisesën aden tauambo iquec. Moises tishabi icnubien Nuquin Papan chiapadomboen naquin: “Nuquin Papan yuambo nebique. Ismenu,” qeshun Abadauanëmbien shui dëbid dëteshunequin tauapampic. Yuecquo ictaneshun adembidi Moisesëntsen adopampic. Nëbi adembidi naic chonoadenquo icte ushëmbi chonoadquimbi ma mimbi shui dëbid dëteshunequid. ²³Aden Moisesën chiampid niaquenquo icquin shui nacnenquin mimbi bëdamboen naic. Ëmbitsen daicsatsaid dada abichobi bëdamequin mambi bëdamboen naondac. ¿Atotsi quequin ëbi chushcai? ²⁴Chonoadenquo icte ushën dada bëdamequid icsa: “Icsambo mibi iquec,” mimbi ëbi capec. Aden ëbi bëdamboen tantienquo icquin mimbi icsamboen chiec. Ëbi bëdamboen tantiaquioshon ëmbi naboed bëdamboen chui —quepondash Esus abi chieshënkuido chiec.

Esus bedshun cuesunetiad, cauidaid

²⁵Adec Esus: —Chonoadenquo icte ushën naondambi —quesho tantiashien anocquido Edusaden yacnocquido naded onquecuededpac caondash. —Nuqui chuiquidon: “Cuesunetiad,” caboedien nëid nechitec. ²⁶En is. Abi chieshënkuidobëdi tabadquin chieque. Chuisho ma chuiquidon chushcainquo icboc. “Nuquin Papa yacnuësh choquid Quidistu caid Esus nec,” quequin tantiashumbien nachitec —quetanequien ²⁷aidobidi: —Nuquin

Papa yacnuësh choquid ictiapimboen aid iquec. Abi caniacno tantiembi. Nuquin Papa yacnuësh choquid abi caniacno tantiadenquo ictsias —quepondash ano tabadquido.

²⁸Adsho tantiashun Esusën Nuquin Papa tabadte shubu uashunaid daquënë uacnoshon chuibanquin abitedi tantiamenuen naden chuipondash. —“Ëmbi isondaid nec. Aton nidaid Cadidia caid yacnuësh caniquid nec,” ðquequindabi bēdamboen tantiapadi? Ma mimbi padenquo yoc. Ëbembī chondaidpenquo nebi. Ëbi chomiondaid abi iquec. Ma mimbi aidquiobi tantienquo yoc. ²⁹Ëmbien aidquo tantiendac. Aidbēd tabadondaidquo nebi. Adsho aidēn: “Nid,” cac chondaid nebi —caquien ³⁰—“Con pa Nuquin Papambo nec,” quechitequien nec —queshun abi chieshēnquidon: —Cuesunemenuembien bedtiad —quetanquin: —Bednu —caqui bedadenquo icpondash. —Nēbi ma Esus unēs uainquo icnu —Nuquin Papa quenuc bedmenquo icquin Esusën mētampañēdash. ³¹Esus cuesunetiadquo icnubien utsibon dadpenshun Esus tantiabempondash. —Nēidpadquid utsi nibēdtsiandac. Nuquin Papan chiaid chuiquin nuquin tsusedpabon dada uapampicpadomboen comapenen tantiaquin Esusën matses bēdamebamposh. Nuquin Papa yacnuësh choaid Quidistu caid Esus nec —quequin dadpenshun Esus tantiabempondash.

**Ëbi istuidenquo iquendac,
quequin chiaid**

³²Aden Esus chiec sho-shoshquetsēcquiec onqueshobien Esus chieshēnquidon padiseyo caidon tantiapac caondash. Adshun abēdtan chuiquid utsibo chuipac caondash.

—Ëmbi chuibocpaden Esusien bedtiad. Icsamboec onquioshe —cac: —Ai, adembien ictiad —quepac caondash. Adshumbic abēd icquido sondado chuiquin: —Baded bedtan —capac caondash. ³³Adoac nidanequin tantiatuidaquien nadec Esus onquepondash. —Yuec-yuecpactsec mibēd icashic ēbi chomiondaidbēdtsen tabadoaic nidendabi. ³⁴Ëbi nibēnquin ēbi istuidenquo mimbi iquendac. Ëbi nidacno mibi nidtiapimbo iquec —quepondash Esus.

³⁵Adsho tantiash abi chieshēnquido: —Nuqui istuidmenquo icnuec ðmitsimbo nidpanuec nec? Matses utsi yacno tabadnuec con matses utsi-utsiec nidequi nidaniondacno nidshun ðanocquidoda chuipatsias?

³⁶Tantiadenquo yec onquepec. ðAtotsi quepec? “Ëbi nibēnquin mimbi ēbi istuidenquo iquendac. Ëbi nidacno mibi nidtiapimbo iquec,” quepequien iccosh. ðAtotsi quepash niosh? —quepac caondash Esus chieshēnquido.

**Aton Mayan abi tantiaquidbēd
tabadmēte chiaid**

³⁷Adnubien cuēdēnec ēnēdte ushēnquiobi con matses abitedimbo cuēdēnuec cho-chopondash. Cho-choash tabadbudnubien nidtoash comapenec onquequin Esusën chuipondash. —Acte natia bunacbimboec Nuquin Papa tantiate bunquin ēbi bēdamboen tantiata. ³⁸Adsho Nuquin Papan chuiquin dada uamepampicpadomboen naindambi. Nuquin Papa tantiamequid utsi ēbi tantiaquidobēd tabadmendambi. Adoac mibēd tabadquin mibi bēdamboen tabadmequin utsibotsen Nuquin Papa tantiate bumetsias —quepondash Esus. ³⁹—Nuquin Papabēdta ēbi tantiamequidquo Nuquin Papan Mayan nec —quequin tantiec

adondash. Adquid abi tantiaquidobëd tabadmequin chomiabi aden chuipondash Esusën. Nuquin Papa yacno nidambien abi tantiaquidobëd Nuquin Papan Mayan tabadcuenondash.

¿Nuquin Papan chomiaidta nepeba? Esus caid

⁴⁰—Nuquin Papa tantiate bunquin ëbi tantiaata —Esus qesho tantiashien Esus chiec ano tabadquido onquecuededpac caondash. Utsi-utsiec: —“Nuquin Papan chiaid chuiquidquo choendac,” quequin nuquin tsusedpa Moisesën chiampidien Esus nechitec —quenubien ⁴¹utsi-utsiec: —Nuquin Papa yacnuësh choquid Quidistu caidien Esus nechitec —quenubien utsi-utsiec: —¿Cadidia yacnuështa Nuquin Papa yacnuësh choquid chopadic? ⁴²Padenquio. Nuquin Papan chiaidquio naden dada uapampic. “Nuquin Papan chomiaid nuquin tsusedpa Dabidën tsyuecquid nendac. Dabid caniampicnoshon shubu daëdpactsëcquid Beden caid yacnoshon aidi tishendac,” quequin chuipampic. Ma Esus muequi neyoc. Beden yacnoshon tishaidpenquio nec —quepac caondash. ⁴³Adec dadpen: —Bëdambo icquid nec —quenubi aidtedbidi: —Icsambo iquec —quepac caondash. ⁴⁴Adnubien: —Icsambo iqueque. Cuesunemenuembien bedtiad —queuidpac caondash. Adshun Esus bedabi icpondash.

Isadaidbo chuiquid dapabon Esus chieshënaid

⁴⁵Adnubien: —Esus bedtan —caboedo sondado bedabi Esus chieshënquido chiec chopac caondash. Chosho: —¿Atotsi quiash bedabi cho? —caquien: ⁴⁶—Ma bëdamboenshë chuiboc. “Adomboen chuibanquid utsi nibëdec,” qeshun bedtiapimbo iccobi —qesho

⁴⁷tantiashien: —Aid muasho tantiashun: “Abimbo caic,” ¿cainda icco?

⁴⁸¿Adambi Esus muasho tantiadio?

¿Ada tsusiobon tantiadiosh? Padenquio iccosh. ⁴⁹Utsibombien tantiash.

Adquidon ëmbi bëdamboen tantiacpadomboen Nuquin Papan chiampid tantienquio iquec. Icsambo aido iquec. Aido cuidchitoshon. Esus icsambo iquec —quepac caondash con mates chuiquid padiseyobo Esus chieshë nec.

⁵⁰Adnubien inchëshën puduedash Esusbëd onquiondaid Nicodemo caid abitsen chuiquid yec nadpac caondash.

⁵¹—¿Abibi chuimiabida cuidpec?

Nuquin Papan chuipampid nad iquec. “‘Icsambo iquec,’ caidi abibi chuimequin: ‘¿Atotsi nao?’ cac chuisho tantiashun cuidquid yendac,” quepampic. Adoac bëdambo ictsiash. Chuimiabi cuidac icsambo ictsiash —quepac caondash Nicodemo abëdtan chuiquid utsibo chiec. ⁵²Adoaquien chuiquid: —Esus yacpadec Cadidia yacnuësh caniquid mibi nepanui. Aid tantiaquidien mibi nec. Nuquin Papan chiampid isbanta. Aid isbanshun: “Cadidia yacnuësh Nuquin Papan chiaid chuibanquidquo choenquio iquendac,” quequin mimbantiatsiac. Ma Esus muequi neyoc —quepac caondash chuiquid Nicodemo chushcaic. ⁵³—¿Chuimiabida cuidpec? —quetsëcsho aden Nicodemo chushcanec abitedi nidaniac caondash aton shubuno ushec nidec.

Bënëpenquio chudmequid cuënoten seshunetsenaid

8 ¹Nicodemo chushcabon Esus macuësh dapa Odibos caid yacno ushec nidondash. ²Adtanec choashic Nuquin Papa tabadte shubu uashunaid daquënë uaidën puduedpondash. Puduedsho isash mases dadpen

cho-choec abi datsidadsho Esusën chuipondash.

³Aden chuinubien con matses tsusiobon aton bënëpenquoio chudmesho istuidshun chido bëpondash. Moisesën dada uampid chuibanquidobëdtan tsusedpabon chiampid namequido padiseyobon Esus yacno bëshun chido nënantanquoio nitsimpondash.

⁴Adshumbien Esus chuipondash. —Aton bënëpenquoio chudmesho istuidshun nëid bëombi. ⁵Nuquin Papan chiaid Moisesën naden dada uapampic. “Aton bënëpenquoio chudmesho istuidshun cuënoten seshunequin unës uaquid,” quepampic. ¿Adembidida mimbi tantie? —quepondash chido bëquido.

⁶—¿Atotsi Esus quepatsiash? Nuquin Papan chiampidquoio chienquoio icsho: “Mimbi icsamboen chiec,” catiad —quiash adondash. —¿Adembidida mimbi tantie? —caquien Esusën ëcbedenquoio icquin shuebudshun mëdanten nidaid dada uapondash.

⁷Adshobien padpiden: —¿Adembidida tantie? —cado-cadoac nidtotanec: —Nuquin Papan chiaid niaquesambo icquin en mimbia cuënoten se —quetanec ⁸padpidec shuebudshun mëdanten nidaid dada uaoapondash.

⁹Adnubien: —Nuquin Papan chiaid niaquesambo icquin en mimbia cuënoten se —cac: —Nuquin Papan chiaid niaquesamboen nibëdchitec. Setiapimbo iquec —quetanec nidanepondash. Tsusioboba nidanebon caniabotsen tsyuec nidanepondash chidouditsëqui Esusbëd icnuc. ¹⁰Adec nidanian Esusën nidtoquin isquien nibëdec. Nidaniac. Abi bëboedo nidaniacsho istanquin: —¿Mitsimbo nidosh, champi? ¿Mibi cuënoten sequidta nibëdosh? —Esusën cac:

¹¹—Ai, nibëdosh —quesho tantiashien: —Ëmbimbo mibi cuënoten senquoio

iquembique. Mibi icsaid ënash bëdamboec tabadec nid, champi —capondash Esusën. Adoac chido nidondash.

Pabiate cuembo icnuc tantiamequid

¹²Yuec ictaniash Nuquin Papa tabadte shubu uashunaid daquënë uaidën Esus padpidec puduedoapondash. Puduedshumbien abi chieshënquido tantiamequin padpiden chuioapondash. —Pabiate cuembo icnuc con Pan bëdamboen iste matses tantiamequidquoio nebi. Ëmbi tantiamiac ëbi tantiaquido icsateuidi bunenquoio yanec bëdamboec tabadte buncuenendac. Adec ëbëd tabadtequid yanendac —quepondash Esus.

¹³Adsho tantiash abi chieshënquido: —Mibentsëqui: “Adquid nebi,” quesho tantiatiapimbo iquebi. Muequien mibi nechitec. Matses daëdshun chiac bëdambo ictsias —quepondash.

¹⁴Adsho tantiash Esus: —Ëbibi abimbo cadebi. “Con Pa yacnuësh chondash anobidi nidendabi,” quec muainquoio iquebi. “Aton papa yacnuësh choash anobidi Esus nidoaindac,” quequin ma mimbi ëbi tantienquoio icboc. ¹⁵Cadidia yacnuësh choquid matsesuidien mimbi ëbi danec. Adquid danquin mimbi icsamboen chiec. Ëmbien abimbo chiec. Abimbo chuiquid icquin: “Nëid icsambo iqueque. Cuidnuna. Nëid bëdambo iqueque. Cuidenquoio icnuna,” quequin nëbi chienquoio iquembi. ¹⁶Aden chuiquin abimbo chuitsiambi. Ëmbentsëqui chienquoio icquin ëbi chomiondaid Nuquin Papabëdtambi chuiquin abimboshë chuitsiambi. ¹⁷Nuquin Papan chiaidquoio Moisesën naden dada uapampic. “‘Icsaosh,’ quequin daëdshun chuisho tantiash: ‘Abimbo chiec,’ quequid yendac. Adecbidi: ‘Bëdambo iquec,’ quequin

daëdshumbidi chuisho tantiash:
 ‘Abimbo chiec,’ quequid yendac.
 Abentsëcshun chuishoen mua caquid
 yendac,” quequin Nuquin Papan
 chiaidquio Moisesën dada uapampic.
¹⁸Aden Moisesën dada uampid
 tantiashun ëmbentsëqui chienquio
 iquembi. Ëbi chomiondaid con
 Pabëdtantsëqui chiembi —quepondash
 Esus.

¹⁹Adsho tantiashun abi
 chieshënquidon: —¿Mitsimbo papa
 icpec? —capondash. Adoaquien: —Con
 Pa ëbëdta ma mimbi tantienquio icboc.
 Ëbi tantiaquimbien mimbi con Patsen
 tantiatsiac —quepondash Esus abi
 chieshënquido chiec. ²⁰Abi
 chieshënquido onquecuededec quënën
 tabadnubi aid quënë cachotsëqui
 Nuquin Papa tantiaquin piucquid
 menequin nauedte tabëcacoshon
 Esusën chuipondash. Adec Esus
 anoentsëqui tabadsho abi
 chieshënquidon bedabi icpondash.
 Nuquin Papa: —Ma ëmbi
 tantiacpadënquio matsesën unës uanu
 —quenuc Esus bedabi icpondash.

Utsibon Esus tantiauidaaid

²¹Adnubien Esusën abi chieshënquido
 padpiden chuiopondash. —Nidendabi.
 Ëbi nidan ëbi nibënquin mimbi ëbi
 istuidenquio iquendac. Ambi chiaid
 niac-niacquido icsho Nuquin Papan
 bëdamboen isambobi mibi unësendac.
 Adash ëbi nidacno mibi nidiapimbo
 iquendac —quequin chuipondash
 Esusën. ²²Adsho tantiash Esus
 chieshënquido: —¿Abibida Esus
 cuesuniadpec? Abibi cuesuniadash
 Nuquin Papan icsaido cuidacno
 nidtsiash. Ambo nuqui nidiapimbo
 iquéc. ¿Aden chiecta: “Ëbi nidacno mibi
 nidiapimbo iquéc,” quepec?
 —quepondash abi chieshënquido.

²³Adsho tantiash Esus: —Mibi matses
 nec. Ëbien con Pa yacnuësh
 chondaidquio nec. ²⁴“Adquid icsho ëbi
 tantienquio icquid unësacsho Nuquin
 Papan ambi icsaido cuidacno
 nidmendac,” quequin tantiaquin:
 “Nuquin Papan bëdamboen isabi mibi
 unësendac,” mibi caombi —quepondash
 Esus.

²⁵Adsho tantiash abi chieshënquido:
 —¿Mitsipadquid icquin ëbi aden chie?
 —quepondash Esus caic. Adoaquien:
 —Ëmbi chianeboedquiobi mabi neyoc
 —queoapondash Esus. ²⁶Adashic padpidec:
 —Mimbi naid dadpen chuiquin mibi
 cuidte chiendambi. Ëmbembi chienquio
 icquin ëbi chomiondaid muesanquio
 chiaidquio chiendambi. Aidën chiaiduidi
 matses abitedi chiendambi —quenubien
²⁷Esus chieshënquidon: —Abi
 chomiondaid Nuquin Papambo nec
 —quequin tantienquio icpondash. ²⁸Aden
 tantienquio icsho isun Esusën padpiden
 chuiopondash. —Matesmiaidquio
 icshobi ëbi cuesten dectanshumbic mimbi
 ëbi tantiabenendac. “Ambi
 chiacpadquidshenda nepadenec. Ambembi
 chiaid chienquio icquin aton Papan
 chiaidquio chuiquin aidën
 chiacpadomboenshenda napadenec,”
 quequin ëbimbo mimbi tantiendac
 —quepondash Esus. ²⁹Adashic padpidec:
 —Nëbi ëbi chomiondaid ëbëd iquéc. Aid
 bëdambo icmenuen ambi chiacpadomboen
 nasho isun ëbi nianenquio iquéc
 —quepondash Esus.

³⁰Adsho tantiashun: —Abimboen
 Esusën caic. Nuquin Papa yacnuësh
 choquidien nec —qeshun Esus
 tantiauidtsëccondash dadpenshun.

Satanasën yuabo nec, quequin Esusën chiaid

³¹Adsho isumbien Esusën abi
 bëdiactsëc tantiauidtsëcboedo

chuipondash. —Ëbi tantiaquidën ëmbi chiacpadomboen natiadquo iquendac. ³²Nuquin Papabëdta ëbi aden tantiasho icsamianquidën yua icboedi aidën yuapenquo mibi icmetsiambi —quepondash Esus abi tantiauidtsëcboedo chiec. ³³Adec Esus: —Yua —quesho tantiashien: —Abadauan yampidën tsyuecquido yec utsin yuacmaido nebi. Tantenquo icquin mimbi icsamboen chiec. ðAtotsieshun: “Mibi yuapenquo icmetsiambi,” quequin ëbi chio? —capondash abi tantiauidtsëcboedon Esus chuiquin.

³⁴Adoquien: —Tantia. Mibi abimbo chuinu. Uidën uacimboen icsambo icquidën ambembi abi icsaid ëntiapimbo iquec. Abembi bëdambo ictiapimbo iquec. ³⁵¿Mitsipadquid nuquin matsesën yuaid icpec? Aton madopen yec icsambo icsho icbon cuemequid. Aton madombo bëdamboen isquid. ³⁶Aden con Pan aton Madombo icsho ëbi bëdamboen isquin ëbi tantiaquidotsen bëdamboen isendac. Aden ëbi tantiaquido bëdamboen isquin bëdamboec tabadte bumequin abi yacno ëbëd tabadtequido icmendac —quepondash Esus.

Satanasën madobimboecquido chiaid

³⁷Adshumbic Esusën abi chieshënquido chuiopondash. —“Con tsusedpa Abadauan icpampic,” quequin mimbi abimbo chioc. Adboedëmbi ëbi cuesunetiadquo mibi iquec. Ëmbi abimbo chuisho tantiate bunenquo icquin ëbi cuesunetiadquo mibi icpec. ³⁸“Con Pabëd tabadquin isondambi,” quequin ëmbi bëdamboen chuisho tantienquo icquin min papabimboecquidën chiacpadomboen mimbi naindac —quepondash Esus abi chieshënquido chiec. ³⁹—Min

papabimboecquidën chiacpadomboen mimbi naindac —queshoben: —Con tsusedpa Abadauanën nacpadomboen mambi napaboc —capondash Esus chieshënquidon. Adoquien Esus: —Ma mimbi adoenquo yoc. Abadauanën nacpadomboen naquin mimbi bëdamboen natsiac. ⁴⁰Bëdamboen natiapimbo icquin mimbi ëbi cuesunetiadquo iquec. Nuquin Papan chiaidquo abimbo chuisho mimbi adotiadquo iquec. Nuquin Papan chiaid tantiec ma Abadauan cuesuniantiapimbo icpampiyoc. ⁴¹Min papabimboecquidën namiacpadomboen naquidien mibi nec —capondash Esusën abi chieshënquido chuiquin. Adoquien: —Mambi Nuquin Papauidsëqui tantieyoc. Utsi tantiatiapimbo icquin Nuquin Papauidsëqui con pa caimbi —quepondash Esus chieshënquido.

⁴²Adsho tantiashien Esus: —Nuquin Papambo tantiaquimbien mimbi ëbitsen tantiatsiac. Ëbembi choenquo iccondabi. Nuquin Papan: “Matsesbëd tabadec nid,” caquini chondac. Adoaid icsho Nuquin Papa tantiaquidën ëbitsen tantiatsiach. ⁴³¿Mitsipadquid yec ëmbi chiaid tantiash: “Tantiadenquien icpec,” quepe mibi? Ëmbi abimbo chuisho tantiate bunenquo yec pamumëdacbimboec mibi iquec. ⁴⁴Min papabimboecquid Satanás nec. Aid bunacpadenuidi mimbi natiadquo iquec. Ëndenquimboshë Nuquin Papan tauamboen matses uanubi min papabimboecquid cuesunianquidquo nepampic. Aton padibi nec. Nuquin Papan chiacpadomboen namenquo yec chieshë nec muaquidquo nec. Aton padibi icquid yec matses muamequidquo nec. Aidën madobimboecquin mimbi ëbi tantiatiapimbo icpec. ⁴⁵Ëmbi Nuquin Papan chiaidquo abimbo chuisho

mimbi tantiatiapimbo iquec. Icsambo icquidën ambembi chuisho mimbi tantienquo yaquien bëdambo ictsiash. Mabi icsambo icquidpenquo neyoc.
⁴⁶¿Tsuntsimbini: “Mibi icsaoc,” capatsiash? Mabi adotiapimbo yoc. Icsaisambo nebi. Adquid icquin Nuquin Papan chiaid ëmbi abimbo chuisho ¿atotsi quequin tantienquo mimbi icpe?
⁴⁷Nuquin Papa tantianuequidën Nuquin Papan chiaidquo chuisho tantiatsiash. Nuquin Papa tantiesabombo ma mibi neyoc. Adquid icquin Nuquin Papan chiaid abimbo chuisho mimbi tantiatiapimbo iquec —quepondash Esus abi chieshënquido chushcaic.

**Esus chieshënquido cuënoten
siantiadpambo yanaid**

⁴⁸—Nuquin Papa tantiesabombo ma mibi neyoc —Esus quescho tantiashien abi chieshënquido: —Ma mibi podobitsi icsa dapuduedash neyoc. Tantiadenquo yec mibi onquec. Samadia yacnocquidobimboec icsamboshë ma mibi iqueyoc —caquien ⁴⁹Esus: —Mabi podobitsi icsa dapuduedambo yoc. “Ma matsesën con Pa tantianu,” quequin mambi abimbo chuiboc. Adshobi: “Nuquin Papan chiaidquo abimbo mimbi chiec,” catiadquidi mimbi ëbi: “Muec nec,” capec. ⁵⁰“Mabi: ‘Bëdambo iquec,’ canu,” quenquo iccobi. Con Pambien: “Ma matsesën con Mado: ‘Bëdambo iquec,’ canu,” ëbi caindac. “Bëdambo iquec,” canesabotedi aidëmbi cuidendac. ⁵¹Tantia. Mibi bëdamboen chuinu. Ëmbi chiapadomboen naquidquo unësenquo ictsiash —quepondash Esus ompoacbimboen chiec. —Ëbi tantiaquido unësacsho uincuemeshun Nuquin Papa yacno ëbëdi tabadmendambi padpidec unëstiapimbo icnuc —quequin tantiec adondash.

⁵²—Unësenquo ictsiash —quescho tantiash Esus chieshënquido: —Ma mimbi tantiadenquo icnuc chuipayoc. Adsho: “Mayan icsa dapuduedashien nec,” mibi caombi. “Ëmbi chiapadomboen naquidquo unësenquo ictsiash,” quepequien mibi iquec. Nuquin tsusedpa Abadauan yec Nuquin Papan chiaid chuibanquido yec quequido Nuquin Papan bëdamboen isaidombo abitedi unëspampic. ⁵³¿Aido Nuquin Papan namiampidombo icnuc Nuquin Papan namequiaidquioda ne? ¿Mitsipadquid mibi nepe? Muequien mibi nechitec —quepondash.

⁵⁴Adoquien Esus: —Ëmbembi: “Mabi: ‘Bëdambo iquec,’ canu,” quequin ëmbi nac icsambo ictsiash. Mimbi: “Aiduidtsëqui tantiembi,” caboedëmbini: “Nëid con Mado Esus bëdambo iquec,” quequin ëbi comapenen tantiaquin namec. ⁵⁵“Tantiembi,” mimbi caboed Nuquin Papa ma mimbi tantienquo yoc. Ëmbien Nuquin Papa tantiaquiec. “Aid tantienquo iquembi,” quec mibi yacpade muatsiabi. Mambi con Pa tantiaquin ambi chiapadomboen nayoc. ⁵⁶Mimbi: “Con tsusedpan nacpadomboen naimbi,” caboed Abadauan: “Nuquin Papa yacnuësh choash bëdambo icmianquidquo matsesbëdi tabadendac,” quequin tantiec cuishonquepadene. Nuquin Papan tantiamiac ëbi aden tantiapadenec —quepondash Esus. ⁵⁷Adsho tantiashun Esus chieshënquidon: —Ma mimbi min seta 50tedi matamiambo yoc. Adash ma mibi tsusiobudabi iqueyoc. Abadauanën mibi tantiatiapimbo icpampic —caquien ⁵⁸Esus: —Abimbo caimbique. Tantiata. Abadauan tishabi icnubi ëndenquimboshë ictenebi. Nuquin Papapadquidquo nebi —quepondash Esus. ⁵⁹Adsho tantiash nëishtanequien:

—¿Icsamboenda chuipec? ¿Nuquin Papada muauapebac? —quetanquin cuënóte dapa bedtanequin: —Seshunenu —cac siadenquo yec ompodanec cuempondash Esus.

Esusën bëshuaid bédamiaid

9¹Yuecquo ictaniash chonoadenquo icte ushën capucuenequin Esusën dada bëshuaid istuidpondash. Anin bëshuacshobi tishnëdaid niondash.^{2,3}Aid istuidshumbimbi: —En chui, Icbo. Tantianu. ¿Atotsieshun Nuquin Papan bëshu uapanëdash? ¿Aton papabëd ani icsasho isun Nuquin Papan cuidquin bëshu uanëdaidta nepec? —caquien: —Padenquo. Utsi icsasho isun Nuquin Papan nambo icpanëdash —quepondash Esus. Adsho tantiaishun padpiden: —¿Tishabi icnubi: “Abibi icsaindac,” quequin tantiaishun Nuquin Papan bëshu uanëdaidta nepec? —caondambi. Adoaquien: —Padenquo. “Abibi icsaindac,” quequin tantiaishun Nuquin Papan bëshu uambo icpanëdash. “Ma con Madon comapenen tantiaquin ismenu,” quequin ambi tantiacpaden Nuquin Papan bëshu uapanëdash. Adoacsho anin tishnëdaid nec.⁴Nëbi ambi chiacpadomboen nanuna. “Nainabi inchëshmane,” quiaish comapenec chonoadnuna. Inchëshën mates chonoadesa —quepondash Esus. —“Con Pan tantiaidtedi nainabi unëshmane,” qeshun unëshabi icquin con Pan chiaidtedi nainendambi —quequin tantiec: —“Nainabi inchëshmane,” quiaish comapenec chonoadnuna —quiondash Esus.⁵Adashic: —Matsesbëd icquin Nuquin Papa bédamboen tantiaimequidquo nebique. Nèidtsen tantiamenu⁶—quetanquin nidaidën uicchun cuishtucatanquin nidaidbëdta uicchun cabiuntsëcshun bëshuaid bëbitaccapondash.

⁷Adotanquimbic: —Acte tiquidimbo icquid Sidoe caidën bëpamëdec nid —cac nidash bëpamëdtanec bédamboen isec aton shubuno nidpac caondash. Aid acte con onqueten Sidoe quequin buanaid caic.⁸Aton shubuno nidshobi aton shubu anoentsëcquidon bëshuacboed istuidpac caondash. Adembidi utsibon: —Bëshuaid nebique. Piucquid beccho —quedonetsec tsadtsëcsho isboedontsen istuidpac caondash. Istuidshun: —¿Nuqui isboedquiobida nepec? “Beccho,” ¿quedoneboedquiobida nepec? —cabededpac caondash.⁹Utsi-utsiec: —Ai, aidquiobi nec —quenubi utsibo: —Padenquo. Aidbimboecquidien nec —quesho tantiaish: —Aidi nebi —quepac caondash bëshuacboed.¹⁰Adsho tantiaishun: —¿Mitsipadec bédano? —caquien: ¹¹—Esus caidën bédamioshi. Nidaidën uicchun cuishtucashun nidaidbëdta uicchun cabiunshun bëbitaccashun: “Acte tiquidimbo icquid Sidoe caidën bëpamëdec nid,” cac nidash bëpamëdec bédanobi. Nëbi bédamboen isembi —quepac caondash bëshuacboed.¹²Adsho tantiaishun: —Mibi bédamequid ¿mitsimbo iquec? —cac: —Tsauid —quepac caondash bëshuacboed.

Bëshuaid bédameboed chuimiai

¹³—Bédamioshi —quesho tantiaishun: —¿Abimboda capec? Ma con chuiquidon chuimenu —quequin padiseyobo yacno bëshuacboed buampac caondash.¹⁴Buanacshoben padiseyobon: —Chonoadenquo icte ushën nac caosh —quequin tantiaquin:¹⁵—¿Mitsipadec bédano? —caquien: —Esusën nidaidbëdta uicchun cabiunshun bëbitaccac bëpamëdec bédanshun nëbi bédamboen isembi —quepac caondash bëshuacboed.

¹⁶—Bëpamëdec bëdanobi —quesho tantiasien chuiquido onquecuededpac caondash. Utsi-utsiec: —Nuquin Papa tantiaquid icquin Nuquin Papan chiaid niac-niaquenquo ictsiash. Chonoadenquo icte ushën nëid bédamequin ma Nuquin Papan chiaid niac-niacpayoc —quenubien utsibo: —¿Nuquin Papa tantiesanda aden bédamepatsiash? Ma comapenen tantiaquin nacnempaboc —quepac caondash. Adshumbic abitedishun: —Esus icsambo iquec —cainquo icquin ¹⁷bëshuacboed chuipac caondash. —Mibi bédamequid ¿tsutsi mimi cape? —caquien: —Nuquin Papan: “‘Yuecshun naden naindambi,’ quequin chiaidquo chuiquidien nec,” caimbi —quetanec bëshuacboed nidpac caondash.

¹⁸Aid nidnubien Esus chieshënquido: —Bëshupenquien niashe. Muequien niashe. Anibëdta amë chuimenun chomenuna —quetanquin ^{19,20}chomeshun bëshuacboed cain: —¿Min madoda niosh? —capac caondash. Adoac: —Ai, con mado niosh —queshobien: —¿Bëshuacshobida tishonda? —capac caondash. Adoaquien: —Ai, bëshuacshobi tishonaid nec —ani queshobien: —Bëshuaid ¿mitsipadec bëdanosh? —capac caondash.

²¹Adoaquien: —Tsaudi. Bëdansho isambo iccombi. ¿Tsundambien bédamechitash? Dada ënden caniaid neque. Aidi chuime —quepac caondash bëshuacboedën tita amëbëdi.

²²—“Nuquin Papa yacnuësh choquid Esus nec,” quequido Nuquin Papan chiaid chuibante shubun puduedmenquien ictiad —quequin chuiquidon chiaid tantiashe dacuëdec: ²³—Dada ënden caniaid neque. Aidi chuime —quepac caondash.

²⁴Adoac padpiden bëshuacboed chomeopac caondash padiseyobon.

Chomiash: —“Nuquin Papan bédamioshi. Nuquin Papa bédambo iquec,” ¿quecta icco? Ma Esus Nuquin Papan chiaid niac-niacquid neyoc. Ma icsamboshë icquid neyoc —quepac caondash. ²⁵Adsho tantiashe bëshuacboed: —Icsamboshë icquidien Esus nechitec. Aden tantienquo iquemi. Mabi bédameboc. Isenquo icboedëmbi mambi nëbi bédamboen iseyoc. Adenuidsëqui tantiemi —quepac caondash. ²⁶Adsho tantiashun: —¿Mitsipaden mibi bédamiosh? —caquien: ²⁷—Mambi mibi chuipaboc. Ma mimbimbobi tantienquo icboc. ¿Atotsi quequin padpiden: “Èbi chui,” cai? ¿Esus tantiatadquioda icti? —capac caondash bëshuacboedën.

²⁸Adsho tantiashe nëishtanquin chushcapac caondash. —Mibi Esus tantiaquidquo nec. Mibi icsambo iquec. Èbien nuquin tsusedpa Moises tantiaquidquo nec. ²⁹“Moisesien Nuquin Papan chuiquin namepampic,” quequin tantiemi. ¿Tsuntsin chiac mibi bédamequidën napash? Ma mibi bédamequid ëmbi tantiacmaidquo neyoc —quepac caondash chuiquido. ³⁰Adoaquien bëshuacboed: —¿Abida cai? “Dadpenquo tantiemi,” ma mibi quepaboc. Adboedi: “Èmbi tantiacmaidquo nec,” ¿quecta ique? Mimi tantiacmaidëmbini bédamiosh. Ma bédambo yoc. ³¹Abi icsaid ënabi icquidën chianesho Nuquin Papan tantienquo ictsiash. Abi tantiaquin ambi chiapadomboen naquidën chianiac tantiashun Nuquin Papan nashuntsiash. ³²Anin bëshuacshobi tishaid bédamenquo ictenec. Adquid bédamequid nibëdpadenec. ³³Nuquin Papa tantienquo icquin Esusën ëbi bédamenquo ictsenosh. Nuquin Papa tantiaquimbini bédamiosh. Ma Esus bédambo icquid neyoc —quepac

caondash bëshuacboed. ³⁴Adsho tantiash nëishquioshon: —Bëshuacsho tishaid yec mibi icsamboshë iquec. Icsactsëcquidën chuitiapimbo iquebique. Baded nidec nid. Nëmbo padpidec puduedenda —quequin cuemepac caondash. Aden Esus chieshënquidon bëshuacboed Nuquin Papan chiaid chuibante shubun padpiden puduedmenquio icpac caondash.

Ambi bédameboed istuidoashun Esusën chiaid

³⁵Adnubien: —Mimbi bédameboed cuemiac caosh —quesho tantiashun Esusën ambi bédameboed istuidpondash. Istuidshumbic: —Nuquin Papan matsesmiaidquio caic: “Nuquin Papa yacnuësh choquid nec,” ¿quequinda mimbi tantiap? —capondash Esusën ambi bëshuaid bédameboed chuiquin. ³⁶Adoaquien: —¿Tsutsi neque? Isnu —cac: ³⁷—Ëbi nec. Mibi bédameboedi nebi —caquien: ³⁸—Ai, Nuquin Papa yacnuësh choquid Quidistu caidien mibi nec. Comapenen tantiaquin nabanquidquio yec mibi bédamboshë iquec —quetanec ismenuec danëshën tinuebudpondash.

³⁹Adsho isumbic Esusën matses abi datsidadsho chuipondash. —Nuquin Papa matses bédamboen ismequid nebi —quiash matsesbéd tabadec Nuquin Papa yacnuësh chondabi. Ëmbi bëshuaid bédamiac tantiesa icboedëmbi ëbi tantiasho Nuquin Papan bédamboen isec. Utsibo: “Nuquin Papa tantiaquiemi,” quec muaquidon ëbi tantiatiapimbo icquin Nuquin Papa tantienquio iquec —quepondash Esus. ⁴⁰Adsho tantiash nëishtanec: —¿Nuquin Papa tantiesabodabi nedi? —quepondash Padiseyobo. ⁴¹Adsho tantiashien: —Nuquin Papa tantiesambo icsho ëmbi tantiamiac Nuquin

Papabëdta ëbi tantiasho Nuquin Papan mibi bédamboen istiasih. “Nuquin Papa tantiaquiemi,” quec muaquin ambi chiaid bédamboen tantienquio icsho Nuquin Papan mibi bédamboen istiapimbo iquec —quepondash Esus abi chieshënquido chieci.

Obecabimboecquido chiaid

10 ^{1,2}Adshumbic abi chieshënquido Esusën padpiden chuiopondash ompoacbimboen chuiquin. —Tantia. Mibitedi chuinu. ¿Mitsipaden nuquin matsesën aton yua obeca dadpen dayun uaqin napec? Obeca daquënë uaidën puduedte shëcuënquio obeca icbo puduedquid. Daquënë uaid mayadec puduedquidien ampequid nendac. ³Obeca icbon: “Puduednu. Shëcne,” cac ambi: “Con yua ista,” caidën shëcnequid. Adshumbic puduedtanquin ambi aton yua cuëmbanacpaden cuëmbanquin: “Cho,” caquid icbon. Adoac icbo tsibanquid obecan. ⁴Adshobic icbon daquënë uaidën tabadquid abitedi niecumeshun abi buanec bëyuc nidsho aton yuan tsibanquid. “Con icbon ëbi cuëmbocpadomboen cuënec. Con icbo nec,” quequin icbo tsibanquid obecan. ⁵Utsibon cuënaquien tsibanenquio yec dacuëdec cuenquid obeca. Icbouidsëqui tsibanquid obeca nec —Esus quesho tantiashien: ⁶—Tantiadenquio yec mibi onquec —quepondash Esus chieshënquido.

⁷Adsho tantiashun Esusën chuipondash. —Tantia. Mibi bédamboen chuinu. Obeca daquënë uaid puduedte shëcuëbimboecquid nebi. ⁸⁻¹⁰Shëcuënuidi obeca puduedquid. Adecbidi ëbiuidtsëqui tantiash Nuquin Papa yacno matses puduedtsiasih. Ëbi tantiesain Nuquin Papa yacno puduedtiapimbo iquendac. Ëbi

tantiaquido cain obeca caombi. Aido bēdamboen dayun uaqin bēdamboec tabadquid icmendambi. Aido unēsacsho uincuemeshun Nuquin Papa yacno ēbēdi tabadmendambi. Adec ēbi bēdambo icnuc ampebimboecquid abi iquec. Ēbi tantiaquido icsamete bunquido aido nendac. Ma adquido mibi neyoc. Nuquin Papan chiaid ma mimbi icsamboen chieyoc. Adoac mimbi chiaid tantiaquidon Nuquin Papa tantienquio iquec. Aido Nuquin Papan cuidtequidombo nendac. Padnuen ēbi tantiaquidon mimbi chiaid tantienquio icquimbi ėmbi chiaiduidtsēqui tantiendac —quepondash Esus abi chieshēnquido chiech.

**Ēbi tantiaquido dayun
uaimbi, quequin chiaid**

¹¹Adashic Esus padpidec onqueoapondash. —Obeca icbobimboecquid nebi. Icbo cudasacimboec ēbi tantiaquido cudasnuec ēbided cuidadec unēsendabi. ^{12,13}Utsiboen adenquio ictsias. Piucquid bednuen obeca isquidbimboec iquec. ¿Mitsipadopaid obeca isquidēn? Bēdi dapa chosho isun: “Con napenquio nec,” quetanquin badedi obeca nianquid. Obeca nianacsho bēdin acshun siaquid. Aden utsi acsho isash acshun secabi icquid niquequid obeca. Obeca isquidēn icbonpenquio nianacimboen ma mimbi icsamboen napayoc. Nuquin Papa tantiate bunquido ma mimbi Nuquin Papambo tantiamenquio iqueyoc —quepondash Esus abi chieshēnquido chiech.

^{14,15}Adashic abi onquec: —Ēmbien matses bēdamboen tantiamequin ēbi tantiaquido dayun uaindac. Nuquin Papabēd ēbi tantiananacpadquie ēbi tantiaquidobēdtsen tantiananquiebi. Aden ēbi tantiaquido tantiec Nuquin

Papa cuidmenquio icnuec ēbided cuidadec unēsendabi. ¹⁶¿Nēid matses isadaidboudtsēqui tantiectabi adec unēspadi? Padenquio. Matses utsibontsen Nuquin Papan tantiamiaido icquin ēbi tantiendac. Aidobēdta nēid matses con matses caquin abitedi bēdamboen dayun uaindambi. ¹⁷Con Pan tantiamiacpadec ēbided cuidadec unēsendabi. Aden ambi chiacpadomboen ėmbi nasho con Pan ēbi tantiaquie. Unēsash ėbembu uincuenendabi. ¹⁸Matsesēn ambembi ēbi unēs uatiapimbo ictsias. Ēmbi tantiacpadquiequi matsesēn unēs uadendabi. Adecbidi uincuentiadquio yec ėbembu uincuenendabi. Aden con Pan namiacpadomboen naindambi —quepondash Esus.

¹⁹Adsho tantiash con matses chuiquido nadec onquecuededpac caondash. ²⁰Esus chieshēnquido: —Podobitsi icsa dapuduedash tantiadempambo yec onquepec. ¿Atotsi quequin aid tantie? Aidquio tantiatiapimbo iquendabi —quenubien ²¹utsibo: —Podobitsi icsa dapuduedashta ¿adec onquepatsias? Bēdamboequien onquiosh. ¿Podobitsi icsa dapuduedaidēnda aden bēshuaid bēdamepatsias? Bēdambo icquidēmbien adotsias —quepac caondash.

¿Quidistu caidta ne? quequin chiaid

²²Yuec ictanec con matses cuēdēnuec Edusaden yacno cho-chopondash. “Nuquin Papa tabadte shubu uashunaidnoshon tsusedpabon icsa uaquido cuemenēdaid ushē tantiec cuēdēntanu,” quianec cho-chopondash. Ambo iquenuampamboec icpondash aton padibi. ²³Iquenuampamboec icnubien Esus Nuquin Papa tabadte shubu uashunaid daquēnē uaidēn

puuedash shubunquo puuedabi quënë cachoqui capupondash. Aid quënë cachoc: “Sadomonën nacnenaid nec,” caondash. ²⁴Ambo Esus capusho isashien con mates chuiquido Esus natia datsidadshun: —En sebadënquo chui. Tantienquo yec tsadtiapimbo iquebique. Mimbi cuembo chuisho tantiatiaquido iquebi. ¿Nuquin Papan chomiaid Quidistu caidta ne? —capondash con mates chuiquidon. ²⁵Adoquien Esus: —Mambi mibi chuipaboc. Ma mimbimbobi ëbi tantienquo icboc. Con Pan: “Adota,” cac comapenen tantiaquin nabandeniombi. Mibi bëdamboen tantiamenuen adodeniombi. ²⁶Adosho isash mibi: “Ai, Nuquin Papa yacnuësh choquidien nec,” quetiadquidëmbi mimbi ëbi tantienquo iccoc. Nuquin Papan tantiamiabi yaido icquin mimbi ëbi tantiatipimbo iquec. ²⁷Con Pan tantiamiaidien ëbi tantiaquid yanendac. Adshun obecan aton icbo tsibanacximboen ëmbi chiacpadomboen natiaquido yanendac. ²⁸Aido unësacsho uincuemeshun Nuquin Papa yacno ëbëdi tabadmendambi padpidec unëstiapimbo icnuc. Unësabi icsho: “Con na nec,” queshun bëdamboen dayun uaindambi. Ëmbi adoacsho bedshunacximboen icsambo icquidën yuaquin Nuquin Papan cuidtequido icmeoatiapimbo iquendac. ²⁹Con Patsen ëbi tantiaquido dayun uaindac. Abipadquid utsi nibëdquiecnic con Pan ëbi tantiaquido dayun uasho adembidi mënchictiapimbo iquendac. ³⁰Aden ëbi bedshuntiapimbo icquin con Patsen bedshuntiapimbo iquendac. Con Papadquidquido nebi —quepondash Esus.

Cuënoten seshunetiadpambo yanoaid

³¹—Nuquin Papapadquidquido nebi —Esus quesho tantiash nëishtanquin cuënote dapa bedshun abi

chieshënquidon Esus seshunetiadquido icoapondash. ³²Adsho isash: —Sianenda. Con Pan namiacpadomboen comapenen tantiaquin nabanombi. ¿Ëmbi adobansho isboedëmbidabi seshunepe? —quepondash Esus. ³³Adoquien: —¿Bëdamboen nabanshodambi: “Mibi seshunenu,” cadí? Padenquo. “Con Papadquidquido nebi,” quequin Nuquin Papa muauasho mambi mibi nayoc. Mates icquin mimbi aden icsamboen chuisho tantiashumbimbi mibi seshunec —quepondash abi chieshënquido.

³⁴Adshobien Esusën: —Nuquin Papan chiaidquido nuquin tsusedpan naden dada uapampic. “Nuquin Papa nadec onquec: ‘Min mattsesën ëmbi chiacpadomboen nasho: Ëbipadquid nec, caombi,’ queposh Nuquin Papa,” quequin dada uapampic. ³⁵Mates caic: “Ëbipadquid mibi nec,” quequin Nuquin Papan chuipampid isun mimbi: “Nuquin Papan icsamboen chiac,” quequin chiamo iquec. “Muesambo icquin Nuquin Papan icsamboen chuitiapimbo iquec,” queshun mimbi chushcambo iquec. Nuquin Papa adoambobi ¿ëbida chushcai? ³⁶Nuquin Papan namiacpadec abi yacnuësh chondaid nebi. Adquid yec: “Nuquin Papan Madombo nebi,” quiobi. Ëbi adsho tantiashun çatotsi quequin ëbi chushcai? ¿Nuquin Papadambi muauadio? Mambi abimbo caboc. ³⁷Ëmbi chiaidquido tantiatiapimbo icquimbi ëmbi naidquido tantiata. Ëmbi Nuquin Papan namiacpadomboen comapenen tantiaquin nabanenquo icsho isun mimbi ëbi mua catsiac. ³⁸Con Pan namiacpadomboen nasho isun: “Ai, ambi chuibocpadquidshenda nepes,” ëbi cata. Ëmbi chiaiduidtsëqui tantiatiapimbo icquin adota. Adshun: “Ai, Nuquin Papapadquidquibidien Esus nec,” quequin mimbi tantiabentsiac —quepondash Esus.

³⁹Adsho tantiash padpidec nëishtanquin abi chieshënkuidon: —Bedchitono —caqui bedadenquoio icpondash. ⁴⁰Adashic acte Odan caid potiash con shënision tauaquin matsu acten mentodenecno Esus nidoapondash. Ambo ëbi chedobëdi tabadpondash. ⁴¹Adshumbic Esusën comapenen tantiaquin ismequin ambo icquido chuibampondash. Adsho tantiashun: —Uan padon chuidenedshenda nëid nepec. Ambibi comapenen tantiaquin ismiambobi comapenen tantiaquin nabanquid chuipadenec. Esusën adobansho isun: “Nëid chuiquinshenda Uan padon abimbo capadenec,” caimbi —cabededpondash anocquidon. ⁴²Adshumbic: —Nuquin Papa yacnuësh choquidien Esus nec —quequin Esus tantiabempondash.

Dasado caid unësaid

11 ¹Udeya yacnuësh Esus cuembon Dasado Esusën utsibimboecquid unëstiadsëcquio yanac caondash. Shubu dadpen icquid Betania caid yacnocquid niondash. Aidbëd icquid aton chuchu daëd icpondash. Abentsëc Madta icnuc utsi Madia icpondash. ²Madian aton manëdaidën ucbanquin Esus tanoshcabi icnuc adec aton utsi unëstiadsëcquio yanac caondash. ³Adnubien aton chuchun: —Esus chuitan —cac aton matsuësën Esus chuituidpondash. —Mimbi con utsi caidquio unëstiadsëcquio yanoshe. En isec cho —catuidpondash. ⁴Adoaquien Esus: —Chiata. ¿Unësash chodquequionoshida Dasado nepadiash? Padenquien iquec. “Ma matsu: ‘Nuquin Papa bëdambo iquec. Ambi chomiondaid aton Madombotsen bëdambo iquec,’ quenu,” qeshun naindambi —quepondash. ⁵Adbosh

Dasado aton chuchubëdta tantiaquidquio yequi ⁶badedquio nidenquio yec anobi daëdec ushpondash Esus.

⁷Daëdec ushumbic Esusën: —Nuqui icbocno Udeya caidën padpidec nidnu. Nid —capondashi. ⁸Adoaquimbi: —Icbo, ma mibi anoshon cuënoten seshunetsempondac. ¿Anobidida nidtiad? ¿Ada: “Seshunequionoshe,” caded? —capondambi. ^{9,10}Adoaquien cuembo chienquio icquimbi: —Badiadën capuec tocoshquetanec uebudesas. Inchëshëmbien tocoshquetanec uebudquid —quequin Esusën chuipondashi. —Nëbi ëbi unës uatiapimbo iquec. Badiadën nidacximboen con Pan tantiaidtedi nainabi icsho ëbi unës uatiapimbo iquec. Inchëshën uebudacximboen ambi tantiaidtedi nainshobini ambi tantiacpadënquio matsuësën ëbi unës uaindac —quequin tantiec adondash Esus.

¹¹Adshumbic Esusën padpiden ompoacximboen chuiopondash. —Ëmbi con utsi caid Dasado ushtoaccoshe. Isucumec nidnu. Nid —quesho ¹²tantiashini: —Ma ushnu. Ushash isucunquid —quepondac. ¹³Esusën Dasado unësaid chuinubi Dasado ushe dantsëcondambi. ¹⁴Adnubien Esusën sebadënquio chuipondash. —Dasado unësaccosh. ¹⁵“Bëdamec nidtiadquidi niobi” ¿quepectabi ique? Padenquio. Mibi caic: “Ma nëidon ëbi bëdamboen tantianu,” qeshun Dasado unëso istanambo iccombique. Nëbi mibi ismec nidnu. Nid ¹⁶—caquien: —Ai, abëdquio bi unësec nidnu. Nid —quiampondash Tomas anin abi ushëmbi daëdpambo tishaid. Adanec abitedi nidondash.

Unësaid uincuemequidquio nebi, quiaid

¹⁷Adashic unësacno anoentsëqui Esus chopondash. Choshon: —Unësacsho

chococash daëd-daëdquieic ushobi
—quetsëcquieic onquecuededsho
tantiatuidpondash. ^{18,19}Esus choabi
icnuc con mates chuiquido Dasado
unësacnuësh sedenquenuec Edusaden
yacnuësh cho-chopac caondash. Unësaid
nëbi ictsëcnuc tedes quidometedos
tiontsëcquidën badedquio cho-chopac
caondash. Cho-choash unësaidën
chuchubëd sedenquec tabadpac
caondash. ²⁰Adnubien: —Esus choec
—quesho tantias Madta bëquedec
chopondash aton chibi Madia shubuno
sedenquec tsadnubi. ²¹Choequien Esus
bëquedec: —Mibi icnuc con utsi
unësenquo ictsenosh, Icbo. Con utsi
unësosh. ²²Mimbi chiacpadomboen
Nuquin Papan nëbi natsias
—quepondash Madta: —¿Ada con utsi
uincuemetia? —quequin chuitiadquio
yequi. ²³Adoquien Esusën: —Min utsi
uincuenendac —capondash. ²⁴Adsho
tantiash: —“Ai, yuecash unësaido
abitedimbo uincuemetie ushën con utsi
uincuenendac,” quequin tantiembi
—quepondash Madta. ²⁵Adsho
tantiashun Esusën: —Ëbibi mates
unësaid uincuemequidquio nebi. Ëmbi
tantiacpadënquo uincuenendac. Aden
ëbi tantiaquido unësacsho
uincuemendambi. ²⁶Ëmbi adoac Nuquin
Papa yacno ëbëdi tabadendac padpidec
unëstiapimbo yec. Ëmbi aden chuisho
tantiash: “Ai, abimbo mimbi caindac,”
¿quequina tantie? —capondash Esusën.
²⁷Adoquien Madta: —Ai, adembi
tantiembi. “Nuquin Papa yacnuësh
choquid Quidistu caidien mibi nec.
Nuquin Papan Madombo mibi nec. Con
tsusedpabon dada uaquin
chuiampidquien nec,” mibi caombi
—quetanec ²⁸nidpondash aton chibi
chiec. Nidshun: —Nëmbo cho, chibi.
Chuinu —cac aton chibi choshobien:
—Esus chosh. Mibi iste bunoshe. En isec

cho, chibi —caquien ²⁹Esus bëquednuec
badedi choquin istuidpondash. ³⁰Shubu
dadpen yacnombo choabi icsho Madtan
bëquedacnobi Esus tabadsho
Madiantsen istuidpondash. ³¹Adec
Madia nidsho isun chococacnobi
sedencaic nide danquin abëd
sedenquenequidon tsibanampac
caondash. ³²Adnubien Madia Esus
istuidtanec dayumbudec
sedenquiampondash aton utsi tantiec.
Adec shubitanec ënëdash: —Mibi
unësquo iccoc, Icbo. Bëdambo icquid
mibi nec. Mibi icnuc con utsi
unësenquo ictsenosh —quepondash
Madia Esus caic.

³³Adnubien Madia tsibanec cho-choec
con mates chuiquido
sedenquetuidpondash. Madiabëd
sedenquecuededsho istanec: —Ai,
unësquo icnuc nec —quias Esus
abitsen shubiantiadtsëcquio icpondash.
³⁴Adec shubiantiadtsëcquio
tsadacnuëshien Esus: —¿Mitsimbo
mimbi chococaye? En isnu. Nid
—quepondash. Adoac: —En isec cho
—quianec nidnubien ³⁵shubinidequi
nidpondash Esus. ³⁶Adec shubinidsho
isumbien: —Ma Dasado unësquo icnuc
shubieyoc —cabampondash con mates
chuiquidon. ³⁷Adnubien utsibo:
—¿Atotsieshun bëshuaid
bëdamiondaidëmbi Dasado unëso
bëdamenquo icposh? —quepondash.

Esusën Dasado uincuemiaid

³⁸Nidquimbi chococacno istuidequi
Esus shubiantiadtsëcquio yanoapondash.
Nidaid cuënoteuidpambo icquid
macuësh tsimpiduc shëcuë uaidën
unësaid nauedshun cuënote dapan
bëtinacnuësh shubiantiadtsëcquio
iccondash. ³⁹Adashien Esus: —Cuënote
bidiaquin shëcuë shëcne
—quepondash. Adsho tantiash

unësaidën chuchu Madta: —Padi. Ēnden pisenashe. Chococash mabi daēd-daēdquiec ushboc —quepondash.

⁴⁰Adoquien Esus: —Dacuēdenda.

Mambi mibi chuiboc. Mĩmbi: “Nuquin Papan Madombobien mibi nec,” ěbi casho: “Ēmbi comapenen tantiaquin nabansho mĩmbi isendac,” mambi mibi capaboc. En na. Baded bēcune —cac ⁴¹cuēnote shēcüē bētinaid shēcnequin bēcunepondash.

Adsho istanquimbien Esusēn abuc isquin Nuquin Papa chuipondash comapenec onquequin. —Papa, ěmbi nēbi chuisho mĩmbi tantiec. Ēmbi chuibocpadomboen mĩmbi naindac. Mibi bēdambo iquec, Papa. ⁴²Ēmbi otacquo chianiaid mĩmbi tantioc. Ēbi datsidadaido tantiamenuen nēbi comapenec onquequin mibi chiemi. “Mibi chuitanquin ěmbi comapenen tantiaquin nabansho isun: ‘Nuquin Papan chomiaidien nec,’ quequin ma nēidon ěbi tantianu,” qeshun comapenec onquequin mibi chiemi, Papa. Padi, aidtedtsēqui mibi chiombi, Papa —quepondash Esus.

⁴³Adtanquimbien comapenen cuēnquin: —Dasado, puduenec cho —capondash.

⁴⁴Adoquien Dasado badedquo puduenanec chopondash abi dashcute dataniacchobi. Unēsacsho uesquin dashcuten datanetanquin dashcuten abi bēpucacchobi chopondash. Adec chosho istanquin: —Baded dashcute dachic. Ma nidnu —capondash Esusēn.

Nēbien Esus unēs uametiad, quiaid
(*Mat. 26.1-5; Mad. 14.1-2; Duc. 22.1-2*)

⁴⁵Aden Esusēn ěnden unēsaidquiobi uincuemesho isashien Madia tsibanec sedenquec cho-choboedo abentse-abentsec: —Nuquin Papan chomiaidien Esus nec —quiampondash.

⁴⁶Adnubien utsin Edusaden yacno

nidshun Esus chieshēnquido padiseyobo chuituidpac caondash. —Esusēn unēsaid uincuemiosh —quepondash. ⁴⁷Adsho tantiatanquimbien chuiquid dapan abēdtan chuiquid utsibo cho-chomepac caondash padiseyobo yec tsusio dapabo yec quenuc. Aden cho-chomiash tabadec onquepac caondash.

—ĒMitsipadotiad? Nuquin matses ismequin comapenen tantiaquin dadpen nabampac caosh. ⁴⁸Aden Esusēn nabansho isun nuqui ěmiabi icsho nuquin matsesēn abitedishun abi chuiquid dapa Esus icmetsiash. Adnubien nuqui yuaquido Doma yacnocquidon ambi chuiquid icmiacmaidquo chuiquid yansho isun nēishun nuqui acshun siatsiash. Nuquitedi acshun siatanquin Nuquin Papa tabadte shubu uashunaid dapatsen uesquin chic-chictsiash. ĒMitsipadotiad Esus? —quepac caondash chieshēmēnquido.

⁴⁹Adnubien abēdtan chuiquido chuiquid dapambo aid setan icquin Caipas caidētsen chuipac caondash. —ĒMidapadotsēcquien mĩmbi chiendac? Tantiadentsēcquo icnuc ma mĩmbi chuiapaboc. ⁵⁰Tantia. Mibi bēdamboen chuinu. ĒAtotsi quec: “Abitedi unēs uaindac,” mibi quepe? Ma nuquin matses abitedi unēs uainquo icnueshun Esused unēs uamenuna —quepac caondash chuiquid dapambo abēdtan chuiquido chiec.

⁵¹Aden chuiquin ambembi chiambo Nuquin Papan oncamiaic Nuquin Papan chiaidquo aden chuipac caondash. —Nēid setan abēdtan chuiquido chuiquid dapambo nec —qeshun Nuquin Papan aden oncamiaqui Caipas onquepanēdash. —Matses cuidmenquo icnuc con Madoded cuidadec unēsendac —qeshun Nuquin Papan Caipas aden oncamepanēdash. ⁵²Aden

Caipasën chuinedaid tantiaquin
ëmbitsen chuinu. Tantia.
¿Isadaidboudtsëqui cuidmenquo
icnuecta Esus abided ciudadec
unëstiondash? Padenquo. —Matses
utsitsen abi tantiaquid yansho isun
abëdi tabadmenuec Esusded ciudadec
unëspondash —quequin tantiembi.
Nëbi Caipasën chuisho tantiaashun
tsusiobon chiaid chuinu. ⁵³Aden
Caipasën Esus unës uamete chuisho
tantiaashien Esus chieshënquido:
—Nëbimbobien Esus unës uametiad
—quecuededpac caondash.

⁵⁴—Tsusiobon mibi adosh —quesho
tantiatanequien chieshëmënquido
ismenquo yec Esus cuempondash.
Cuenequi nidaid utsin nidash masi dapa
yacno anoentsëqui shubu dadpen icquid
Epadain caid yacno nidpondash. Ambo
tabadquin ëbi chedo Esusën
chui bampondash. ⁵⁵Epadain caid yacno
tabadnubien Nuquin Papan con
tsusedpabo unës uainquo icquin
matamiampid inchësh tantiec
cuëdënuec Edusaden yacno con matses
nidanepac caondash. Cuëdënec taëabi
icnuc mishtemaid mishquidoba
Edusaden yacno nidanepac caondash.
—Mabi tsusion nesmenu. “Mishtemaid
mishquid tsusion nesmiabi icquid
cuëdëntemaid,” quedeneque —quianec
nidanepac caondash. ^{56,57}Adshumbien
Edusaden yacnoshon Nuquin Papa
tabadte shubu uashunaid daquënë
uaidën puduedtanquin Esus iste
bunquin nibëntuidpac caondash
mishtemaid mishquidon.
Nibëntuidshobien: —Nuqui chuiquido
nadpac caosh. “Esus istuidshun ëbi
chuita. Bedshun unës uamechitono,”
quepac caosh —quesho tantiaashien:
—¿Ada Esus chopeba? “Unës
uamenushe,” quiaish choenquien
icchitec —quecuededpac caondash.

Madia Dasadon chuchun Esus tanoshcaid
(Mat. 26.6-13; Mad. 14.3-9)

12 ¹Aden mishtemaid mishquidon
abi nibë nubien Edusaden
anoentsëqui ambi Dasado
uincuemiondacno Betania yacno Esus
chopondash. Seistedec ushash Nuquin
Papan matamiampid inchësh tantiec
cuëdënec taënushi niondash. ²Ambo
choshos isash: —Esus bëdambo iqueque.
Pemenu —queshun: —Pec cho —cac
puduedash tabadpondash nëidtedi.
Nëidic Esus. Nëidic Dasado. Nëidic
shubu icbo. Nëidic Esusbëd icquid ëbi
chedobi. Nëidic Dasadon chuchu daëd.
Aidtedi icpondash. Adec penuec
tabadsho Madtan pete
menebampondash. ³Adnubien Madian:
—Esus bëdamboshë iquec. Ismenu
—quetanquin bëdamboshë nuadquidën
Esus tanoshcapondash.
Tanoshcatanquin aton manëdaidën
taucpondash. Aden tanoshcaid shubu
anuestsëcquiec comapenec
nuadpondash. Piucquid dadpenquo
menequin bedaid niondash. Sedunten
cushtoaid bëdambo nuadquid nado caid
niondash. ⁴Adsho isun Esus
bedmequidën Udasën Madia
chushcapondash. ⁵—Padi. Mimbi
uesquieque. Utsi uain nata. Nëid
danoshcate meneshun piucquid
dadpenquo seta abentsëc matamec
chonoadaidtedquiobien bedtiad.
Adoshombien piucquid nibëdquido aid
piucquid menetiad —capondash
Udasën. ⁶Adomboen chuisho tantiaashun
Udas bëdambo icquidquo danondambi.
Esusbëd icquido ëbitedishun piucquid
bedshun sauedten sauedshun dayun
uaquidquiembi danondac. Piucquid
bëdamboec dayun uashumënenquo
yequi abibi ampeshumënashi adondash
Udas. Aden ambi ampiaid tantiequi:

—Piucquid nibëdquidoen menetiad
 —quequin muaquin Madia
 chushcapondash. ⁷Adshobien Esusën:
 —Padi. Chushcainda. Ma nanu. Ma
 nuquin matesën unësaid bëdambo
 nuadnuc danoshcapaid yoc. “Nëbi con
 Mado unësendac,” quequin Nuquin
 Papan tantiamiacpadomboen ëbi unëso
 chococate tantiaquin Madian ëbi
 tanoshcaquin naic. ⁸Piucquid
 nibëdquido dadpen iquec. Nibëdenquio
 iquendac. Ëbien mibëd icboedi nëbi
 nibëdquio yanendac. Ëbi tantiec Madia
 bëdambo iquec —quepondash Esus
 Udas chiec aidi: —Abi chieshënquido
 Esus bedmenu —quepanuda.

Dasadotsen cuesunetiadquio yaid

⁹Adnubien: —Betania yacno Esus
 choaccosh —cac Edusaden yacnuësh
 mases dadpen Esus isec
 cho-chopondash. Ambobidi Dasado
 Esusën uincuemiondaic icsho aidtsen
 isnuec cho-chopondash.
^{10,11}Cho-choshon Dasado
 uincuemiondaic isumbien abentsëcshun
 abentsëcshunquien: —Comapenen
 tantiaquin nabanquidquio yec Nuquin
 Papapadquidquibidien Esus nec.
 Nuquin Papan chomiaidien nec
 —quequin Esus tantiabempondash. Esus
 tantiabenshumbic abi chuiquidon chiaid
 tantienquio yampondash. Adsho isash
 nëishtanequien chuiquid dapabo:
 —“Uincuemiaid Dasado isun Esus
 tantiabenosh,” quioshe. Dasadotsembien
 unës uatiad —quianac caondash
 chieshëmëndash.

Chuiquid daba ismiacbimboen

Esus ismiaid

(*Mat. 21.1-11; Mad. 11.1-11; Duc. 19.28-40*)

¹²Madian tanoshcaboc ushash Esus
 Edusaden yacno puđuanec nidondash.
 Nidshobien Edusaden yacnuësh

cuëdënuec cho-choboedon: —Esus
 choec —quesho tantiatanquin ¹³niste
 podobiequid bedbëtsenec Esus
 bëquedec cho-chopondash. Esus
 bëquedshumbien: —Chuiquid daba nec
 —quequin ismequin ambi
 bedbëtsemboed uic-uiccabededpondash.
 Aden uic-uiccaiqui:

“Mibi bëdamboshë iqueque. Ëbi
 bëdamboen ista.

Nuquin Papan chomiaid yec mibi
 bëdamboshë iquec.

Con mases isadaidbo chuiquid
 dapambo mibi nendac,”

quecuededpondash Esus caic. ¹⁴Ambi
 podquedën choquin bedbëtsemboed
 cabayobitsecquidëmpi catsadtoanec
 Esus chosho isash adcuëdedpondash.
 Adec aid catsadte Nuquin Papan
 tantiamiacpadomboen con tsusedpan
 dada uaquin naden chuiampic.

¹⁵“Edusaden yacnocquido chiec:

‘Dacuëdenda, Edusaden
 yacnocquido.

Is. Cabayobitsecquidëmpi
 catsadtoanec mibi chuiquid
 dapambo choeque,’ quepec,”

quequin Nuquin Papan chiaid dada
 uapampic. ¹⁶Adec Esus catsadtoanec
 chosho isun aden chuiampid
 tantienquio iccondambi. Esus abuc
 nidambimbi ëbitedishun
 tantiabenondac. —Esus chuiquinshenda
 nuquin tsusedpan dada uapampic.
 Aidën chiacpadomboen niste podo
 uic-uiccaquin: “Bëdambo iquec,”
 quequin nuquin matesën Esus
 ismebededpondash —quequin
 tantiabenondambi.

¹⁷Esus cabayobitsecquidëmpi
 catsadtoanec choabi icnuc Esusën
 Dasado uincuemesho isboedon:
 —Uincuemesho isombi —quequin
 mases dadpen chuibenepanëdash.

¹⁸Adsho tantiashun: —Unësaid

uincuemequid Nuquin Papan
chomiaidien neque. Istanu —quianec
Esus bëquedec cho-choshon aden niste
podo uic-uiccaquin ismepondash.
19—Esus bëdambohë iquec. Nuqui
chuiquid dapa nendac —quecuededsho
tantiashien Esus chieshënkuido
padiseyobo: —¿Midapadoendac nuqui?
Tantia. Abitedishun: “Nuqui chuiquid
dapa nendac,” cabededpeque.
¿Mitsipaden Esus cuesunetiad?
—quepac caondash.

Matses utsibo: Esus isnu, quiaid

20Edusaden yacno cuëdë nec
cho-choboedo matses utsibo
isadaidpembotsen icpondash.
21Adnubien adquido matses utsibon
Esus iste bunquin shubu dadpen icquid
Betsaida caid yacnuësh caniquid
Esusbëd icquid Uedipe chuituidpac
caondash. —Esus istiadquio iquebi
—quesho tantiashien: —Chiata.
Chuitambono —quianec nidshun
22Esusbëd icquid utsi Andedesba
chuibëtsenec Andedesbëd choequi
Uedipe Esus chiec chopondash.
—Matses utsibon mibi istiadquio iquec
—caquien 23aid matses utsibo
isadaidpembo tantiamenuc Esus
comapenec onquepondash. —Nuquin
Papan matsesmiondaidquio icquin
nëbimbobimbi ambi chiaidtedi
nainendac. Ëmbi adoacsho Nuquin
Papan: “Mibi bëdambo iquec,” ëbi
caindac —quepondash Esus abi unës
uate chiequi. 24Adshumbien
ompoacbimboen chuipondash. —Tantia.
Mibi chuinu. ¿Mitsipadquio pete ëshë
chococaid icpec? Chococac canias
bacuëc bëdambo icpaid yoc. Chococabi
bëdambo ictiapimbo iquec.
Adoacbimboen chococabi yac matses
bëdambo icmetiapimbo iquendabi.
Unësacsho chococac matses bëdambo

icmequid nendabi —quepondash Esus.
25Adashic padpidec: —Ambi naiduidi
naquin ëmbi chiaid niacquido Nuquin
Papan cuidtequido nendac. Ambi
naiduidi nainquio icquin ëmbi
chiacpadomboen naquido ëbëdi
tabadtequido yanendac. 26Adquid ëmbi
chiacpadomboen natiadquio yec ëbi
yacpadec chieshtoenquio ictsias.
Adquidquio unësash uincuenash ëbëdi
tabadsho Nuquin Papan: “Nëid con
Mado tantiaquid bëdambo iquec,”
capendac —quepondash Esus.

Esusën abi unës uate chiaid

27Adashic abi unës uate tantiec Esus
nadpondash. —Unësquioshë yanuc:
“Mimbi tantiacpadomboen natiapimbo
iquebi, Papa,” ¿quectabi icti? Mabi con
Pan chiacpadomboen nanuec chondac.
Aden nanuec nebi —quepondash Esus.
28Adtanequien Nuquin Papa chiec:
—Nuqui tantiacpadomboen nëbi
nainembi, Papa. Ëmbi aden nainacsho:
“Nuquin Papa bëdambo iquec,” matses
cameta, Papa —quenubien
abucuëshquio Nuquin Papa comapenec
onquepondash. —Ai, ëmbi namiaid mibi
icsho: “Nuquin Papan namiaid nec.
Nuquin Papa bëdambo iquec,” matses
camepombi. Nëbi padpiden
adomeoaindambi —quepondash Nuquin
Papa.
29Abucuësh onquesho bëdamboen
tantiabi yec utsibo: —Abu cuëdtoec nec
—quenubien utsibo: —Nuquin Papan
abi yacnoshon uaid mayan bëdan Esus
chuiplash —quecuededpondash. 30Adsho
tantiash Esus: —¿Ëbi tantiamenuecta
onquediosh? Padenquio. Mibi
tantiamenuequien niosh. Aden
tantiashun ëmbi bëdamboen chuisho
tantiata. 31Nuquin Papa chieshënkuid
Satanasën yuaido matses dadpenquioshë
iquec. Nëbi Nuquin Papan

tantiacpadomboen aido utsi-utsien
Satanas bedshunendambi: “Chën. Con
na neque,” quequin. ³²Ëbi abuc
dectanac aden matses ëbi tantiaquid
icmendambi —quepondash Esus.

³³—Ëbi cuesten dectanquin unës
uaindac —quequin tantiec: —Ëbi abuc
dectanendac —quepondash Esus.

³⁴Adsho tantiash abi datsidadquido:
—“Ëbi dectanendac,” quiosh. “Unësebi,”
quepequien iccosh —quiashien Esus
chiec: —“Nuquin Papa yacnuësh
choquid Quidistu caid unësesambo
nendac,” quequin Nuquin Papan chiaid
nuquin matsesën chuinubi: “Unësebi,”
¿quecta icco? “Unësebi,” quequid
Nuquin Papa yacnuësh choquid
ictiapimbo mibi iquec. “Nuquin Papan
matsesmiaid nebi,” quequid ðtsutsi mibi
nepe? —quepondash Esus
datsidadquido. ³⁵Adoaquien Esusën:
—Nadquid nebi —quenquio icquin
ompoacbimboen naden chuipondash.
—Mibi bëdamboen tantiaquid nëbi
isadenquio iquendac. Aid nibëdnuc
bëdamboen mimbi tantienquio
iquendac. Nidabi aidën chuisho
bëdamboen tantiata. ³⁶Nuquin Papan
bëdamboen iste tantiaquid tantiata.
Adsho bëdambo icmequin Nuquin
Papan cuidtiapimbo icquid mibi
icmendac —quepondash Esus abibi
cadequi. Adtanec nidpondash aidon
istiapimbo icnuc.

Isadaidbon Esus tantienquio yaid

³⁷Ëmbi dadpen chuiquin dada
uabanacpadomboembi Esusën
comapenen tantiaquin dadpen nabansho
isun con matses isadaidbon Esus
tantiatiadquidi Esus tantienquio
icpondash. ³⁸Aden Esus tantienquio icte
con tsusedpa Isayasën Nuquin Papan
tantiamicpadomboen chuiquin dada
uapampic.

“Nuquin Papa yacnuësh choash
nadec onquendac.

‘Mimbi chiaidquio chuibansho
tantiashun: Muequien mibi nec,
ëbi caindac, Papa.

Mimbi namiacpadomboen
comapenen tantiaquin dadpen
nabansho isash: Nuquin Papa
yacnuësh choquidien nec,
quetiadquidi adenquio iquendac,
Papa,’ quependac,”

quequin Esusën chuite Isayasën dada
uapampic.

³⁹Nuquin Papan
pamumëdacbimboecnuc icmiac con
matsesën Esus tantienquio icpondash.
Aden chuiquin Isayasën padpiden dada
uapampic.

⁴⁰“Isadaidbon ëbi tantiatiapimbo
icsho isun
‘Ma adembi tantienquio icpanuna,’
caimbi.

Ma adequi pabiate shëcuë
nibëdacbimboec icchitono.

Ëbi tantiasho abi icsaid
bëpiscudquin bëdamboen
ismane,”

quequin Nuquin Papan ambi con matses
caido nëishëshun chushcaid Isayasën
dada uapampic. ⁴¹Nuquin Papambo
Esusbëd uinsadpambo yec tabadsho
isondaid icquin Isayasën aden Esus
tantienquio icte chuiampic.

⁴²Con matses dadpenshun Esus
tantienquio icnubi con matses
chuiquidon abentsëcshun
abentsëcshunquien Esus tantiauidpac
caondash. Adoboedi: —“Nuquin Papan
chiaid chuibante shubun puduedenda,”
canushe —quiash dacuëdquin: —Esus
tantiaquid nebi —quequin chuitiadquidi
utsibo chienquio icpac caondash.

⁴³—Ma con matsesëmbi ëbi bëdamboen
isnu —quequinnuidtsëqui tantiaquin aton
matses chuitiapimbo icpac caondash.

—Ma Nuquin Papan ëbi bēdamboen isnu. Aton Mado tantiaquid nebique —quetiadquidi adenquio yac caondash.

Cuidenquio icte chiec nebi, quiaid

⁴⁴Abi tantiauidboedo Nuquin Papan chiaid isbanquido cho-choash abi datsidadacsho chuinuec Esus padpidec comapenec onquepondash. —ĒĒbi tantianuequidēn ēbiuidtsēquida tantiaquidic? Padenquio. Ēbi tantiaquidēn ēbi chomiondaidsen tantiatsiash. ⁴⁵Adembidi con Papadquibidi ēbi icsho isun: “Ai, adquibidien Nuquin Papa iquec,” quequin tantiatsiash. ⁴⁶Nuquin Papan matses bēdamboen iste tantiamenuc matsesbēd tabadec chondabi. Adec matsesash: “Ēbi tantiaquido ma Nuquin Papan bēdamboen isquin bēdamboen tabadmenu,” quiaish nebi. ⁴⁷“Ēmbi aden chuisho tantiatiapimbo icquido nēbi cuidnu,” ėquectabi icti? Padenquio. Nēbi Nuquin Papan bēdamboen isquin cuidenquio icte chuinuequini nec. ⁴⁸Nuquin Papan cuidte ushēmbien ēbi tantiesabon: “Nuquin Papan chiaidshenda chuipadenec. Aid tantienquio yec icsabudquiopobi,” quequin ambibi tantiendac. Adsho Nuquin Papan cuidendac. ⁴⁹ĒĒmbembi chuiquindambi nadi? Padenquio. Ēbi chomiondaid con Pan chiaidquio chiequini nec. ⁵⁰“Ēbi tantiaquid ēbēdi tabadendac padpidec unēsenquio yec,” queshun Nuquin Papan chiaiduidtsēqui chiequini nec —quepondash Esus.

Esusēn abēd icquido tapanaid

13 ^{1,2}Esusēn comapenen tantiaquin nabanaid chuiquin aidtedi chiombi. Nēbi abi tantiaquido tantiaquieac abided ciudadec unēsaid chuiquin unēsash abi uincuenaidtsen chuinu. Tanta. Nuquin Papan con

tsusedpabo unēs uainquio icquin matamiampid inchēsh tantiaquin pec tabadte ushē nēbi yanuc inchēshēn Esusbēd pec bēdamboec tabadondabi. Padnuen Udas Simon Iscadioten mado Satanasēn tantiamiacpadomboen Esus bedmete tantiec tsadpanēdash. Adnubien Esus: —Nēbi con Pa yacno nidebi nēido nianec. ³Con Pabēd tabadec ambi tantiaquid padēdi abitedishun Icbombo iccondaiddi nēbi anobidi nidoash adquibidi icoaindabi. Adquid icquin nēido bēdamboec tantianante ismenu —quequin tantiaquin ⁴yuan nacbimboen nadopondash. Uequin peboedi nidtotanec dashcute bēntse icquid dachiquidtanec daucudte tsibidiquepondash. ⁵Tsibidiquetanquin pada-padaid dapan acte cushtotanquin abēd icquido tapambampondash. Daucudten tauchbanquin tapambanondash.

⁶Aden tapambanquimbi: —Mibitsen tapanu —cac Petedon: —ĒIcbonda yua tapampaid? Ēbi tapanenda, Icbo. Padi —capondash. ⁷Adoquien Esusēn: —Ēmbi nasho nēbi mimbi tantienquio iquec. Yuecshun mimbi tantiendac. En tapanu —caquien: ⁸—Padi. Mibi bēdamboshē icquid nec. Ēbien icsaquid nec. Yua namiacimboen mibi tapametiapimbo iquebique. Padi —caoapondash Petedon. Adoquien: —Ēmbi tapanabi yac con yuambo mibi ictiapimbo ictsiac —capondash Esusēn. ⁹Adsho tantiashun Petedon: —En na, Icbo. Tapantanquimbi mapinobēdtabi ēbi mēpanta —caquien: ¹⁰—Padi. Nesboed mibi nec. Taēnouidtsēqui bēchishacsho tapanembi. Ēmbi bēchish ucac mibi bēdambo iquec. Abentsēc icsambo iquec —quepondash Esus. —Bēchish ucacimboen ēmbi nasho Nuquin Papan mibi bēdamboen isendac

icsaid ucudacbmboecnuc —quequin tantiec: —Ëmbi bëchish ucac mibi bëdambo iquec —quepondash Esus.

¹¹—Udasën ëbi unës uamenuen bedmendac —quequin tantiec: —Abentsëc icsambo iquec —quepondash Esus.

¹²Aden tapambanash dasiuidash samëdquin pebededquin abëd icquido Esusën chuipondash. —Ëmbi naboad çada tantie? Tantia. Mibi chuinu. ¹³“Ëbi chuiquidquio mibi nec,” mimbi ëbi capec. Adembidi: “Con Icbo mibi nec,” mimbi ëbi capec. Bëdamboen mimbi chiec. Adquid nebique. ¹⁴Ëmbi nabocpadomboen mimbitsen nata. “Ëbëd icquid tantiaquiquin tapanquin nashunu,” qeshun naombique. Adecbidi nashunanta. Naden tantiashun nata. “Esus tantiaquido tantiaquiemi. Con buchibimboecnuc nashunu,” quiash nashunanta. ¹⁵Ëmbi nabocpadomboen namenuen adombique. Mimbitsen nata. ¹⁶En chuinu. Tantia. ¿Icbon chiacia chieshpadic? ¿“Nid,” cacta nidenquio icpadic? Icbon chiacpadomboen yuan naquid yendac. Adomboen tantiaquin ëmbi chiacpadomboen nata. ¹⁷Ëmbi aden chuisho tantiashun ëmbi chiacpadomboen naic mibi bëdambo iquendac —quepondash Esus.

¹⁸Adashic padpidec: —Mibitedi caic: “Bëdambo iquec,” quetiapimbo iquendabi. Tauamboen: “Nuquibi icnu. Cho,” ëmbi caondaido con yuabotedi tantiemi. Abentsëc icsambo iquec. “Aid con yuapenquio nec,” quequin ëmbi tantiaidi nec. Nuquin Papan tantiamiac aidën icsamboen nate chuiquin nuquin tsusedpan dada uapampic naden. “Ëbëdtan planeboedëmbi ëbi unës uamenuen bedmendac,” quequin dada uapampic. ¹⁹“ ‘Abi unës uamete bi chioshi. Nuquin Papapadquidquibi icquimbien naosh,’ quequin ma

tantianu,” qeshun mibi chiombi.

²⁰Mibipadquidën nate mibi chuinu. Tantia. Mibipadquidën ëbi chuibansho tantiash: “Ai, abimbo caic,” qeshun utsibon ëbi tantiatsiash. Adembidi ëbi tantiashun ëbi chomiondaid Nuquin Papatsen tantiatsiash —quepondash Esus.

Abi bedmequid Esusën chiaid

(Mat. 26.20-25; Mad. 14.17-21; Duc. 22.21-23)

²¹Adshumbien abi bedmequid Udas tantiac unësquio icnuc Esusën chuipondash. —Tantia. Mibitedi chuinu. Ëbëd icquidëmbi ëbi chieshënquido ëbi bedmendac —quesho ²²tantiash abëd icquidobëd bëisanec: —¿Tsutsi capec? Nëdien cachitec —quecuededpondabi otacquio tantiec.

²³Ëbi tantiaquidquio yec con cachotsëqui Esus uepondash. ²⁴Adec Esusën dayuntsëqui ueshobini: —“¿Tsutsi cai?” ca —capondash Petedon mëdquin onquenquio icquin. ²⁵Adoaquimbi cachoc isquin: —¿Tsutsi cai, Icbo? —capondac. ²⁶Adoaquien Esus: —En istac. Pete cuëshën ënë puntanquin menequin mibi ismenu —quetanquin pete cuëshën ënë puntanquin Udas Simon Iscadioten mado menepondash. ²⁷Adoac penubi Satanasquio Udas dapuduedquipanëdash ambi tantiaidquio namenuc. Adshobien Esusën: —Mimbi tantiacpadomboen baded nëbimbobi naic nid, Udas —capondash.

²⁸Adsho tantiashini ëbitedi: —Tantiadenquio yec onquepec. ¿Atotsi quia sh: “Baded naic nid,” quepec? —quepondac. ²⁹Utsi: —Udas nuqui piucquid dayun uashunquid nec. “Piucquid buanshun pete bedtan,” quepequien iccosh —quenubien utsi:

—“Piucquid nibëdquido piucquid menetan,” quepequien iccosh
—quecuededpondash. ³⁰Pete cuëshëmpi pesho: —Nëbimbobi baded naic nid
—caquien Udas nidpondash.
Inchëshëmbi nidpondash Esus
bedmenuen chiec nidec.

Tantiananquiota, quequin chiaid

³¹Abi bedmenuen chiec Udas nidbombien Esus: —Nuquin Papan masesmiaidquio icquin ambi tantiaidtedi nëbimbobimbi nainendac. Ëmbi nainsho isash con Pa bëdambo iquendac. ³²Ëbitsen bëdambo icmenuen con Pan comapenen tantiaquin ismendac. ¿Yuecshun quectabi icti? Nëbimbobimbi caindac —quepondash Esus. Abi unës uatebëdta abi unësash uincuenash Nuquin Papa yacno nidte chiec adpondash. ³³Adashic ëbi chedo padpiden chiec: —Nëbimbobi nidebique. Chuiquid dapabo ëmbi chiondacpadomboen mibi chuiöanu. Tantia, mado. Ëbi nidacsho mimbi ëbi istuidenquio iquendac. Ëbi nidacno mibi nidtiapimbo iquendac. ³⁴Aden tantiaquin Nuquin Papan chiaid utsi mibi chuinu. Ëbi nidan ëmbi chiapadomboen nata. Ëmbi mibi tantiaquiapadquieq tantiananquiota. ³⁵Ëbi tantiaquido tantianansho isun: “Adec tantiananquido Esus tantiaquidombo nec,” quequin utsibon tantiansiash —quepondash Esus.

Petedo: Ëmbi isacmaid nec, quete chiaid

(Mat. 26.31-35; Mad. 14.27-31;
Duc. 22.31-34)

³⁶Adec —Nidebi —quesho tantiashun Petedon: —¿Mitsimbo nide, Icbo? —capondash. Adoquien Esus: —Nëbi mibi nidtiapimbo yacno nidebi. Yuecash ambo mibitsen nidendac —quepondash Esus. ³⁷Adsho tantiash Petedo: —¿Atotsi

quetiadquio yec: “Nëbi ëbëdi nidtiapimbo mibi iquec,” quepo mibi? Mibëd nidec dacuëdenquio ictsiabi. Mibi chieshënquidon: “Unës uanu,” mibi casho tantiash: “Ëbien natiad,” quetsiandabi —quepondash Petedo.

³⁸Adsho tantiashien Esus: —“Ëbien natiad,” ¿quecta icpatsia? Padenquio mibi ictsiac. Cachina bënë cuëdanabi icnuc mibi chieshtouidendac. “Ëmbi isacmaid Esus nec,” mibi quendac. Adashic padpidec adecbidi. Adashic padpidec adecbidi. Cachina bënë cuëdanabi icnuc mibi adendac —quepondash Esus. Adsho tantiashini Esusbëd icquido ëbitedi dacuëdcuededpondac.

Nuquin Papabëd tabadmendambi, quiaid

14 ¹Ëbitedi dacuëdcuededsho isashien Esus: —Dacuëdenda. “Ëbi dayun uaquid nec,” quequin mimbi Nuquin Papa tantiacpadomboen ëbitsen tantiaquiota. ²Mimbi tantiacpadquio Nuquin Papan shubu iquec. Quënë dadpenquioshë iquec. Tsucustiapimbo iquec. Adpenquio icsho mibi aden chienquio ictsiambi. Adquid tantiaquin: “Ëbi tantiaquido ëbëdi tabadmendambi,” quequin chiombi. ³“Adquid iquec,” quiaish ëbia nidshun con Pa chiendambi. “Ëbi tantiaquido neque. Nuquibëdi tabadmenuna,” quequin chiendambi. Adashic ëbi yacno mibi buanuec choaindabi. ⁴Ëbi nidan ëbi nidacno nidte mimbi tantiec —quepondash Esus.

⁵Adsho tantiashun Tomasëtsen: —¿Mitsimbo nide, Icbo? Tantiambo iccombi. Podqued tantienquio iquembique. Ëbi chui —caquien ⁶Esus: —Nuquin Papa yacno nidte tantamequidquio nebi. Nuquin Papan chiaiduidtsëqui chiec muesambo nebi. Adquid icquin ëbi tantiaquid Nuquin

Papabëd tabadmendambi. Ëbi tantiesan Nuquin Papa tantiatiapimbo ictsiash. Ëbi tantiaquidënuidtsëqui Nuquin Papa tantiatsiash. ⁷Ëbi caic: “Nuquin Papan Mado nec,” quequin mimbi Nuquin Papatsen tantiendac. Nëbi abipadquid ëbi icsho isun Nuquin Papambo isac bimboen mimbi tantiendac —quepondash Esus.

⁸Adshoben Uedipentsen: —Nuquin Papa ëbi isme, Icbo. Nuquin Papa iste bunebique. Aid isash bëdambo ictsiabi —caquien ⁹aidtsen Esusën: —¿Tantienquioda ique, Uedipe? Yuec mibëdi tabadobi. ¿Mimbi isacmaidtabi nedi? ¿Mibi chianenquiodambi ictio? Nuquin Papapadquidquiodidini nec. Ëbi adquid icsho isun: “‘Adquidquiodidi Nuquin Papa iquec,’ quequin Nuquin Papatsen mimbi tantiendac,” quequin mibi chiombi. ¿Atotsi quequimbini: “Nuquin Papa ëbi isme,” cai? ¹⁰“Nuquin Papapadquidquio nebi,” ëbi qesho tantiash: “Ai, abimbo caic,” ¿quenquioda icco? Ëmbembi chienquio iccombi. Con Pan chiaidquio chiequini nec. Adembidi ëmbembi nabanenquio iccombi. Ëbëd tëshnanenquio icquin con Pan namiaquimbi naoc. Ëmbembi nainquio iccombi. ¹¹“Con Papadquidquio nebi,” ëbi qesho tantiashun: “Ai, abimbo caic,” cata. Ëmbi chiaid tantiatiapimbo icquin ëmbi comapenen tantiaquin dadpen nabamboedquio tantiata. Aden ëmbi nabamboed tantiaquin: “Nuquin Papan chomiaidënuidtsëquien adotsiash,” quequin tantiata. ¹²Tantia. Mibi chuinu. Ëmbi nacpadomboen ëbi tantiaquidontsen comapenen tantiaquin nabanendac. Ëmbi chuibanac daëdpactsëcshun ëbi tantiabentsëccosh. Con Pa yacno nidshun ëmbi chomiaidën con Mayanën namiac mibipadquidën ëbi chuibanac dadpenshun ëbi

tantiabenendac. ¹³Ëmbi chiacpadomboen naquidën: “Ëbi nashunta, Icbo,” qesho tantiashun ambi chiacpadomboen nashunendambi. “Nuquin Papa bëdamboshë iquec,” camenuen ¹⁴ëbi tantiaquidën chiacpadomboen nashunendambi —quepondash Esus abëd icquido chiec.

Nuquin Papan Mayan tabadte chiaid

¹⁵Adashic abëd icquido padpiden chiec Esus: —Ëbi abimbo tantiaquidën ëmbi chiacpadomboen natiaquio iquendac. ¹⁶Adotiadquio icsho isun con Pabëd icquin con Pa chiendambi naden. “Nuqui tantiaquido bëdamboen tantiamenuen nuquin Mayan aidobëd tabadmenuna, Papa,” ëmbi cac Nuquin Papan con Mayan mibëdi tabadmendac. ¹⁷Adoac mibi nianenquio yec mibëdi tëshnanenquio iquendac. Mibëd icquin ëbi chuiquin mibi abimbo tantiamendac. Aid isadenquio icsho ëbi tantiesabon aid tantiatiapimbo iquec. Mimbien aid tantiec. Con Pan ëbëd icmiaidquio nec. Ambi namiaid ëbi icsho aid tantiashumbimboen mimbi tantiec. Ëbi nidan choash mibëdi tëshnanenquio yec tabadendac con Mayan. ¹⁸¿Shiadimpi mëyadacbitsec icnudambi mibi niampe? Padenquio. Nuquin Papan Mayan con Mayambi nec. Mibëd aid icnuc ëbëd yac bimboequi con Mayan tantiadendac. ¹⁹Nëbi ëbi nidacsho ëbi tantiesabon ëbi isenquio icnuc mimbi ëbi isendac uincuenacsho. Adec uincuenaid icquin con Mayan mibëd tabadmequin mibi unësacsho uincuemeshun ëbëdi tabadmendambi. ²⁰Ëbi uincuenaid ushëmbi mimbi naden tantiendac. “Esusën Nuquin Papa tantiaquiec aidbëd tëshnanenquio icquin aidën chiacpadomboenuidi naindac. Adecbidi Esusbëd tantiananquiec aidbëd tëshnanenquio icquin aidën

chiacpadomboen natiadquo yec tabadebi,” quequin mimbi tantiendac.
²¹Ëmbi chiacpadomboen naquid ëbi tantiaquidquo nec. Ëbi tantiaquidquo mibi icsho con Pabëdtan mibi tantiaquiquin: “Adquo aton Papabëd Esus iquec,” camequin mibi bëdamboen tantiamendambi —quepondash Esus.

²²Adsho tantiashun Udas utsin abi bedmequidënpenuio: —“Nuquin Papa yacnuësh choash con matses chuiquidquo yanshun abitedi ismequin tantiamendac,” quequin Nuquin Papan chiaid nuquin tsusedpabon dada uapampic. Nuquin Papa yacnuësh choquid icquin ðatotsieshun ëbiuidtsëqui tantieme, Icho? —caquien
²³Esus padpidec: —Ëbi tantiaquiduidtsëqui naden tantiamendambi. Ëbi tantiaquid ëmbi chiacpadomboen naquid nec. Aden nasho con Pabëdtan tantiaquiquin aidbëdi con Mayan tabadmendambi. Adoac con Mayanën tantiamiac ëbëd iquec con Pabëd iquec quiacbimboec tantiadendac. ²⁴Ëbi tantienquo icquidoen ëmbi chiaid niac-niacquido nendac. ðËmbiuidtsëqui chiaidta adquidën niac-niacpadic? Mambi Nuquin Papan chiaidquio chuiboc. Aidën chiaidquio adquidën niac-niaquec —quepondash Esus abëd icquido chiec.

²⁵Adashic padpidec Esus onquiondash. —Mibi bëdiactsëc tantiemequin mibëd icquin con Pan chiaid chuibanombi.

²⁶Con Pa yacno nidshun ëmbi: “Nuquin Mayan aidobëdi tabadmenuna, Papa,” cac con Pan con Mayan matsesbëd tabadmendac. Adoac ëmbi naidbëdta ëmbi chiondaidtedimbo mibi bëdamboen tantiamendac. ²⁷Con Pa yacno nidshun con Mayan mibëdi tabadmequin dacuëdenquo icquid mibi icmendambi. Adoac dacuëdenquo yec bëdamboec tabadta. Ëbi tantiesabo

dacuëdacbimboec dacuëdenda. Comapenec dacuëdtanec uinte paëdtanec aido tabadnubi mibi dacuëdenquo yec bëdamboec tabadta. ²⁸“Nëbimbobini con Pa yacno nidendac. Adtanequic choaindabi,” quepobi mibi chiec. Ëbi adsho tantiash ëbi tantiaquidombo cuishonquetsiash. “Esus abi namequid aton Papabëd tabadec nidec,” quiaash ëbi tantiec cuishonquetsiash. ²⁹Nidnumbi mibi chiec nebi. “Unësash uincuenendabi. Adashic con Pa yacno nidendabi,” quiobi. “Ëmbi chiacpadec ëbi adsho isun ma nëidon: ‘Esusën abimboshenda capondash. Ambi chiondacpadquid Nuquin Papan Madombo nec,’ quequin tantianu,” quiaash adobi. ³⁰Nëbi ënquimbi chuinu. Ëbi tantiesabon icbo Satanas ëbi unës uamenuec choec. Ambembi aidën ëbi unës uametiapimbo iquec. ³¹Con Pan tantiacpadequini unësendac. Ëbi adec unëso isash: “ ‘Nuquin Papa tantiaquin ambi chiacpadomboen naic abided cuidadec Esus unësac,’ quequin ma matses abitedishun tantianu,” quiaash adebi. Nëbimbobimbi naique. Nidec nidnu. Nid —quepondash Esus.

Shancuinbiecquid uba caid chiaid

15 ¹—Nidec nidnu. Nid —quetanquimbi padpiden chuipondashi ompoacbimboen chuiquin. —ðMitsipadquo shancuinbiecquid uba caid icpec? Mapictsëc ictsequi cuidi-cuidipambo yanquid. Adquidic shancuin bacuëbimboec didiquequid. Uba dadan aton cuidi canimequin bëdambo icmequid. Adomboembidi ëbi tantiaquido bëdambo icmendambi. Nuquin Papain uba icbobimboecquid nec. ²Uba aton icbon cuidi utsiuc bacuëesa icsho pateshunepaid yoc. Adoacbimboen ëbi tantiauidtsëcboedon

ambi icsamboen naid ëntiapimbo icsho con Pan ambi icsaido cuidacno nënendac. Uba icbombidi bēdamboen bacuēmenuen dadpen cuidi icquid cuidi dadpen pateshun siaquid.

Adomboembidi ëbi tantiaquido bēdamboshē icmenuen Nuquin Papan aidon icsamboen naid ëmetsiash. ³Ëmbi chiacpadomboen naic mibi bēdambo iquec. Aden ëbi tantiasho Nuquin Papan mibi bēdamboen isec. ⁴Ëbi adembidi tantiaquin ëmbi chiacpadomboen nata. Adsho isash mibi bēdamboen tabadmec mibēd iquendabi. Uba cuidi padquēdaid bacuētiapimbo iquendac. ⁵Adecbidi ëbēdi tēshnanash matses bēdambo ictiapimbo iqueque. Ëbēd tēshnanenquio yec bēdamboec tabadta. Bēdamboec tabadquin mimbi utsibo ëbi tantiametsiac. ⁶Uba icbon cuidi utsiuc bacuēesa icsho pateshun tsindoshon nēdēncapaid yoc. Adoac bimboen ëbi tantiesabo unēsacsho Nuquin Papan ambi icsaido cuidacno nēsēcaindac —quepondash Esus.

⁷Adshumbic Esusēn padpiden chuipondash. —Ëbi tantiaquin ëmbi chiacpadomboen naquidēn: “Ëbi nashunta, Papa,” cac ambi chiacpadomboen Nuquin Papan nashuntsiash. ⁸Nuquin Papan adoshonac: “Nuquin Papa bēdambo iquec,” mimbi catsiac. Adembidi utsibotsen: “Nuquin Papa bēdambo iquec,” camenuen bēdamboec tabadquin ëbi tantiameta. Mimbi adosho: “Ai, ëbi tantiaquidquio nec,” caindambi. ⁹Con Pan ëbi tantiaquiacpadomboembi mibi tantiaquiembi. Adoaid icquin ëbitsen tantiaquioquin ëmbi chiacpadomboen nata. ¹⁰Abi tantiaquioquin ambi chiacpadomboen nashobini con Pan tantiaquiec. Adembidi ëbi tantiaquidēn ëmbi chiacpadomboen nasho ëmbitsen aid tantiaquiendambi. ¹¹“Ëbi

cuishonquiacpadquiecbidi ma ëbi tantiaquiec cuishonquequiono,” queshun aden mibi chiembi —quepondash Esus abēd icquido chiec.

Tantiananta, quequin Esusēn chiaid

¹²Adashic abēd icquido padpiden chiec Esus: —Ëmbi mibi tantiaquiacpadquiec tantiananta.

¹³Nadquiec caimbi. “Min utsi cuesnu,” cashunac: “Ëbien natiad,” quiacbimboec tantiananta. Aden mibi tantiec ëbided cuidadec unēsēndabi. ¹⁴Ëmbi chiacpadomboen nasho mibi con utsi caimbi. ¹⁵Ëmbi con yua caboedobi mibi con utsi caimbi. Icbon: “Tantia. Chuinu. Nadono. ¿Ada bēda icpec?” quequin aton yua chienquio icquin aton utsien aden chuipaid. Con Pan: “Ma abi tantiaquido chuinu,” caidtedi mibi chiombique. Mibi con utsi caimbi. ¹⁶“Esusbēd iquec nidnu,” ¿quequina mimbembi tantiadionda? Ëmbien mibi: “Nuquibi icnu. Cho,” caondac. “Utsibo tantiaquiequin ma nēidon ëbi chuibenenu. Adoac utsibotsen ëbēd tabadtequid yanendac,” queshun mibi cho caondambi. Aden ëmbi chiacpadomboen naquidēn Nuquin Papa chuiquin: “Min Mado Esus tantiaquid ëbi icsho ëmbi chiacpadomboen ëbi nashunta, Papa,” mimbi cac mimbi chiacpadomboen Nuquin Papan mibi nashuntsiash. ¹⁷Ëbi adsho tantiashe ëmbi chiacpadquiec tantiananta —quepondash Esus.

Esus tantiaquido chieshēntē chiaid

¹⁸Adashic padpidec Esus onquepondash. —Ëbi tantienquio icquidon chieshēnac: “Aden Esusba chieshēnondash,” quequin tantiata. ¹⁹Ëbi tantiesabo icsho ëbi chieshēnquidon mibi bēdamboen istsiandac. Adquid iccondaidi ëmbi:

“Cho,” cac ëbi tantiaquid mibi yanondac. Adec ëbi tantiaquid icsho mibitsen chieshënoaindac. ²⁰“Yuan icbon chiacpadomboen napaid yoc,” quequin ëmbi ÷chuiboedta tantie? Aden ëmbi chiacpadomboen nasho ëbi chieshënnquidon mibitsen chieshënoaindac. Adembidi ëmbi chiaid tantiatiapimbo icquidën mimbi chiaidsen tantiatiapimbo icoaindac. Padnuen ëmbi chiaid tantiaquidën mimbi chiaidsen tantiendac. ²¹Ëbi chieshënnquidombi ëbi chomiondaidquio tantiaquin ëbi chieshënnquio ictsiash. Ma ëbi chomiondaid Nuquin Papa tantienquio icquin aidon ëbi chieshëmpayoc. Adomboembidi ëbi tantiaquidotsen chieshënoaindac. ^{22,23}Ëbi chieshënnquidon ëbiuidtsëquida chieshëmpadic? Ma ëbi chieshënnquin Nuquin Papatsen chieshëneyoc. Adquid icsamboshë iquec. Nuquin Papa yacnuësh choshon ambi chiaid ëmbi chiabi icnuc ëbi chieshënnquido ëbi chieshënc icsainquio ictsenash. Nuquin Papa yacnuësh choshon mambi Nuquin Papan chiaidquio chuibamboc. Adnuc Nuquin Papan ëbi chieshënnquido: “Mibi icsamboshë iquec,” caindac. ²⁴Adembidi Nuquin Papa yacnuësh choshon ëmbi comapenen tantiaquin nabanquin ismiabi icnuc Nuquin Papan: “Con Mado chieshënc mibi icsambo iquec,” cainquio ictsenosh. Utsibon nabanacmaidquio comapenen tantiaquin mambi nabamboc. Adosho isash ëbi chieshënnquido: “Icsapenquio iquebi,” quetiapiambo iquendac. Ëmbi nabansho isun ëbi chieshënnquin con Patsen chieshënc. ²⁵“Aden matsesën ambembi ëbi chieshëmpac,” caimbi. Ëmbi aden chuite chuiquin Nuquin Papan nuquin tsusedpa dada uamepampid ëbi chieshënnquidon isbanaidi nec —quepondash Esus.

²⁶Adashic padpidec: —Ëmbi con Pa yacno nidshun: “Nuquin Mayan ëbi tantiaquidobëd tabadmenuna, Papa,” cac: “Ai,” qeshun Nuquin Papan chomiac mibëdi tabadquin abimbo chuiquin ëbi tantiamequiendac. ²⁷Adoac mibitsen ëbi chuibanendac. “Yuec aidbëd tabadondashun Esus tantiembi,” qeshun mimbi ëbi chuibanendac. Aden mimbi chuisho ëbi chieshënnquidon mibitsen chieshënnac. Adoac dacuëndenda.

16 ¹“Chieshtonoshe,” qeshun mibi aden chiombi. Mibitsen chieshënc dacuëndenda. Mibëd con Mayan tabadmembique. ²Ëbi tantiaquido caquin: “Isenda. Esus tantiaquid neque. Nuquin Papan chiaid chuibante shubun puduedmenda,” caindac. Shubu utsi-utsiec yacnuësh adendac. Adomboembidi mibi chieshënnquin utsi-utsien cuesun secash: “Nuquin Papa tantiaquidquio icquin Esus tantiaquido cuesun secaombi,” quependac. ³Aden Nuquin Papa ëbëdta tantienquio icquidon ëbi tantiaquidotsen chieshënnendac. ⁴Mibi chieshënc: “‘Ai, adenshenda Esusën chuipondash. Ëbi tantiaquido cuesun secaindac, quepondash,’ ma nëido quenu,” qeshun nëbi mibi chiembi. “Ëbi icnuc ëbi tantiaquido cuesun secadenquio iquec. Ëbi nidambien aido cuesun secabenendac,” quequin tantiaquin ënden aden mibi chienquio iccondambi. “Nëbi nidebi,” qeshun nëbi mibi chiembi —quepondash Esus.

Nuquin Papan Mayan chote chiaid

⁵Adashic: —Nëbi ëbi chomiondaidbëd tabadec nidendabi —quepondash Esus. Adsho tantiash padequimbo tabadpondabi. Adec ëbi padequimbo tabadsho isash Esus padpidec onquepondash. —“Ëmitsimbo nide?”

¿quenquioda ique? ⁶Ai, ëmbi chuiboed tantiac unësquo icnuen mimbi ëbi chienquo icchitec. ⁷Ëbi nibëdnuc mibi bëdambo iquendac. Ëbi nidenquo icnuc con Mayan mibi bëdamboen tantiamenuec choenquo ictsiash. Nidshumbimbi mibëdi tabadmenuen chomendac. ⁸Adoac matses ambi icsamboen naid tantiamequin ëbitsen tantiamendac. Adomboembidi Nuquin Papan cuidtetsen tantiamendac. ⁹Aden Nuquin Papan Mayanën tantiamiac: “Esus tantienquo yec icsambo icchitebi,” quendac matses. ¹⁰Adembidi ëbi bëdamboshë icquid tantiamiac: “Nuquin Papan Madombo yec Esus bëdamboshë icquid nec. Aid abentsëqui tantishoeni Nuquin Papan bëdamboen istsiash,” quendac matses. Ëbi isadenquo yec con Pa yacno nidan con Mayanën tantiamiac matses adendac. ¹¹Adembidi Nuquin Papan cuidte tantiamiac: “Matses yuaquid Satanas ambi yuaido Esus tantienquo icquidobëdta Nuquin Papan cuidendac,” quendac matses. Con Mayanën tantiamiac adec matses onquendac —quepondash Esus.

¹²Adashic abëd icquido chiec Esus: —Mibi dadpenquo chuitiadquo icquimbi nëbi dadpen chienquo iquembi. Nëbi ëmbi chuisho mimbi tantiatipimbo iquec. ¹³Nuquin Papan Mayan choshombien mibi abimbo chuiquin ëbi tantiamendac. Ambembi chienquo icquin Nuquin Papan chiaiduidi chierendac. “Nadquo iquendac. Adecbidi nadquid choendac,” quequin mibi dadpen tantiamendac.

¹⁴Adembidi ëmbi naidbëdta ëmbi chiaidtedi tantiamequin: “Esus bëdamboshë iquec,” camendac.

¹⁵¿Ëbiuidtsëqui tantiamenuenda con Mayanën adopec? Padenquo. Ëmbembi chiaid mambi chiambo yoc. Nuquin

Papan chiacpadomboenuidi naquin ambi chiaiduidtsëquimbi chuibandenioc. “Con Mayanën ëbëdta con Pa tantiamendac,” quequin tantiec: “Ëmbi naidbëdta ëmbi chiaidtedi tantiamendac,” quobi —quepondash Esus abëd icquido chiec.

Abi nidte Esusën chiaid

¹⁶Adashic padpidec: —Nëbi isadenquo yanebi. Adashic yuecpactsëc yash isadcuenendabi —quepondash Esus. —Nëbi unësash uincuenash padpidec isadebi —quequin tantiec adondash. ¹⁷Adsho tantishini ëbitedi: —¿Atotsi quepec? Tantiadenquo yec onquepec. “Con Pa yacno nidash ëbi nibëdnuc mibi tabadendac,” ma quepaboc. ¿Atotsi chuitiadquo yec: “Nëbi isadenquo ictanec yuecpactsëc yash isadcuenendabi,” queposh? ¹⁸¿Atotsi quepec nec? —quepondabi Esusbëd icquidobëd onquec. Esus tantiamenquo yec

sho-shoshquetsëcquiec onquepondabi.

¹⁹Adsho ambembi tantias: —Ëbëd icquidon ëbi chuitiadquo iquec —qeshun Esusën: —“¿Atotsi chuitiadquo yec nio?” quequin ëbi chuite mibi buneque. ²⁰Tantia. Mibi Chuinu. Ëbi unëso isash mibi sedenquenubi ëbi tantienquo icquido cuishonquendac. Adec sedenqueboedobi mibitsen cuishonquianendac.

²¹¿Mitsipadquo bacuë tishec chido icpec? Bacuë cuididiquenuc natiamboshë icboedi bacuë tishash cuishonquepaid yoc. ²²Adecbidi nëbimbobi ëbi unëso isash mibi natiaquiendac. Adboedi

yuecpactsëcshun ëbi padpiden isash mibi cuishonquendac ënëdenquo yec.

²³Adnubini con Pa yacno nidendac. Ëbi adnuc mibi bëdambo iquendac. Ëbi nidan: “Ëbi nashunta,” ëbi catiapimbo

icquimbi Nuquin Papa mimbi chianendac. Ëbi tantiaquidën: “Min Mado Esus tantiaquiembique. Ëbi nashunta, Papa,” cac ëbi tantiaquin con Pan mibi nashunendac. ²⁴Aden mimbi Nuquin Papa chianenquio iccoc. Nëbi adomboen chianeta. “Min Mado Esus tantiaquid icsho ëbi nashunta, Papa,” quequin chianeta. Mimbi adoac mimbi chiapadomboen mibi nashunquin Nuquin Papan mibi cuishoncamendac —quepondash Esus abëd icquido chiec.

Esusën abëd icquido ënquimbi chiaid

²⁵Adashic abëd icquido padpiden chiec: —Ompoacimboen dadpen chuibanombi. Yuecpactsëcshun: “Con Pa nadquio iquec,” quequin mibi sebadënquio chiendambi —quepondash Esus. —Uincuenshun aden chiendambi —quequin tantiec adondash Esus.

²⁶Adashic padpidec: —Con Pa yacno ëbi nidan mimbi: “Min Mado Esus tantiaquid nebique. Ëbi nashunta, Papa,” quequin Nuquin Papa mimbi chianendac. “Ëbiuidtsëqui: ‘Ëbi tantiaquid nashunta, Papa,’ cac ëbiuidtsëqui tantiaquin Nuquin Papan mibi nashuntsiash,” ¿quectabi ique? Padenquio. ²⁷Mibitsen tantiaquin Nuquin Papan mimbi chianiac mibi nashunendac. “Nuquin Papa yacnuësh choquid Esus nec,” quequin ëbi tantiaquid mibi icsho con Pan mibitsen tantiaquiquin mibi nashunendac. ²⁸Matsesbëdi tabadec Nuquin Papa yacnuësh chondash nëbi con Pa yacnobidi nidendabi —quepondash Esus.

²⁹Adsho tantiashini ëbitedi: —Adquidshenda mibi nepec. Ma nëbi mimbi sebadënquio chieyoc. ³⁰Mibi: “Nëbi isadenquio yanebi,” quioc. Adashic: “Yuecpactsëc yash isadcuenendabi,” mibi qesho tantiash

mibi tantiamenquio yec sho-shoshquetsëcquiec: “¿Atotsi quepec?” quecuededpobi. Mibi chuimetiadquio iccobi. Ëmbi chiambobi ma mimbi tantiapaboc. Comapenen tantiaquidquio icquin ma mimbi abitedimbo tantiapayoc. Aden tantiaquid yec Nuquin Papa yacnuësh choquid mibi nec —quepondabi ëbitedi. ³¹Adsho tantiash Esus: —Ai, nëbi mimbi ëbi tantiaquiec. ³²Aden ëbi tantiaquidquio bi ëbi chieshënquin bedsho isanec mibi niquendac ëbi nianec. Mimbi niamënubi con Pan ëbi nianenquio iquendac. ³³“Ëbi nidan Nuquin Papan Mayan mibëd tabadendac. Ëbi tantiaquid Con Pan tantiaquiec,” quequin dadpen chuibanombi. “Ëbi tantiec dacuëdenquio yec ma tabadnu,” qeshun mibi aden chuibanombi. Ëmbi chiaid tantiashun chieshëmënquido dacuëdënenda. Satanasën: “Icsamenu,” cac icsainquio iccondabi. Aden Satanas yuametiapimbo icquid icquin mibi cudasquin yuametiapimbo iquebique. Dacuëdenda —quepondash Esus abëd icquido chiec.

Esusën Nuquin Papa chiaid

17 ¹—Dacuëdenda —qeshumbic ëbi tantiamenuen abuc isquin Esusën Nuquin Papa chuipondash. —Nuqui tantiactedi ëbi naimeta, Papa. Ëbi naimetanquin comapenen tantiaquin ëbi bëdambo icmeta. Aden mimbi bëdambo icmiac mibitsen bëdambo icmendambi, Papa. ²Ëndenquimboshë mimbi ëbi chiondac naden chuiquin. “Nuqui matses uaidon abitedishun Icbo mibi nec, Mado,” quequin mimbi ëbi chiondac. Mimbi adondaic icquin mimbi tantiactedi matses nuquibëd tabadtequido icmendambi, Papa. ³Matsesën nadosho

adoendambi. “Abipadquid utsi nibëdnuc Nuquin Papa iquec. Ambí chomiondaidquío Esus nec,” quequin tantiasho nuquibëd tabadtequido icmendambi, Papa. ⁴Mimbi chiacpadomboen naquin nëbimbobimbi nainec. Ëmbi adoacsho isash matses: “Ambi chomiaid tantiasho Nuquin Papan nuqui bëdamboen isec. Nuquin Papa bëdamboshë iquec,” quependac, Papa. ⁵Nuqui tantiactedi ëmbi nainacsho mibi yacno nidmeshun mibëdi ëbi tabadmeoata nuqui matses uabi tabadtenecpadembi. “Nuquibi abitedimbo namenuna,” ëbi cata, Papa —quepondash Esus Nuquin Papa chiec.

Esusën abëd icquido Nuquin Papa chiaid

⁶Adshumbic Esusën abëd icquido ëbitedi chuiquin aton Papa chuiopondash. —Mimbi tantiactedi mimbi ëbi tantiaquid icmiacsho mimbi bëdamboen iste chuiabanombi. Aden mimbi chiaidquío chiac: “Ai, adotiadquío iquebi,” quíosh, Papa. ⁷Adembidi aidon: “Nuquin Papan namiaidquío nec. Ambembi nainquío iquec,” quequin ëbi tantiaposh. ⁸Mimbi chiaid ëmbi chuisho tantiashun mimbi comapenen tantiaquin nabamiaid nasho isun: “Ma Nuquin Papan chomiaidquío nepayoc,” caposhi ëbëd icquidon, Papa. ⁹Ëbi tantienquío icquido mibi chienquío iquembi, Papa. Ëbi tantiaquiduidtsëqui mibi chiec nebi. Mibi tantiaquido icsho mimbi tantiamiac ëbitsen tantiec aidon. ¹⁰Adsho isun: “Nuqui tantiaquido nec,” caimbi, Papa. Aidon: “Mibi bëdambo iqueque. Con Icbo mibi canu. Mimbi chiacpadec bëdamboec tabadtiaquío iquebi,” quequin bëdambo icmioshi, Papa. ¹¹Mibi bëdamboshë iqueque. Ëbi mibi yacno nidan ëbi tantiaquido dayun uata, Papa. Ëbi chieshënnquidon chieshtomenushe. Nëido bëdamboen

dayun uata. Mimbi ëbi icmiacpadquidbidi comapenen tantiaquid mibi neque. Ma nuqui tantiananquiacpadquiec ma ëbi tantiaquido tantiananu. Nëido bëdamboen dayun uata, Papa. ¹²Aidobëd icquin mimbi chiaidquío bëdamboen chuiabanquin chieshtomiambo iccombi. Aden bëdamboen dayun uaqin ëbi tantiaquido cudasënnquin Satanas yuamiambo iccombi. Udas abentsëquien Satanasën yuatsaccosh. Mimbi chiaid matsesën dada uapampicpadomboen ëbi bedmenuen Satanasën Udas yuaccosh. Adoac ëbi bedmequid yanash mimbi cuidotheidquid iquendac.

¹³Nëbi mibi yacno nidendabi, Papa. “Ëbi nidan dacuëdec ëbi tantiaquido chieshtonoshe,” queshun mibi otacquío chienquío iquembi. “Ëmbi abi dayun uate chuisho tantiashe ëbi yacpadec ma cuishonquenu,” quequin mibi otacquío chienquío iquembi, Papa. ¹⁴Mimbi chiaidquío nëido chuiabanombi. Adoac ëbi tantiaquido yansho ëbi chieshënnquidon nëidotsen chieshëmpec. Ëbi yacpadec mimbi chiaid niac-niacte bunenquío icshobidi nëido chieshënnquiec, Papa. ¹⁵Aden tantiashe: “Ëbi tantienquío icquidobëdi ëbi tantiaquido tabadmenda,” ¿quectabi ique? Padenquío. “Ëbi tantiaquido chieshtomenda,” caimbi, Papa. Satanasën yuanushe. Bëdamboen dayun uaqin chieshtomenda, Papa. ¹⁶Ëbi tantiesabo tabadacpadec tabadenquío icquin ëmbi nabocpadomboen natiadquío iqueque. ¹⁷Mimbi chiaidquío pausunquíoquin bëdamboen tabadme, Papa. ¹⁸Mimbi ëbi: “Matses chiec nid,” caondacpadomboen aido: “Ëbi chuiabeneta,” caindambi. Adoac nëidon ëbi chuiabenendac, Papa. ¹⁹Nëido tantiaquiec nëbimbobini mimbi

chiacpadec ëbided cuidadec unësendac. “Adomboembidi ëbi tantiaquidon ma Nuquin Papan chiacpadomboen nanu,” quiaish ëbi tantiaquido min yuabombo icmenuec adebi, Papa —quepondash Esus aton Papa chiec.

**Esusën abi tantiaquid utsibo
Nuquin Papa chiaid**

²⁰Adashic padpiden Nuquin Papa chiec Esus: —Ëbëd icquido mibi chuishumbic nëbi aidobëdta ëbi tantiaquid utsibotsen mibi chuinu, Papa. Ëmbi chiaidbëdta ëmbi naidtedi ëbëd icquidon utsibo chuibanac aidotsen ëbi tantiaquido yanendac. Adec ëbi tantiaquido dadpenquio yanendac. Ëbi tantiaquidotedi tantiaquin mibi chiec nebi, Papa. ²¹Nuqui tëshnanenquio yacpadequi nuquibëd tëshnanenquio icquid icmeta, Papa. Nuqui tantiananquiacpadec ëbi tantiaquidotedi shubu abentsëquën tabadac bimboecnuc tantianameta, Papa. Adsho isash nuqui tantienquio icquido nadtsiash. “Esus tantiec bëdambo iquec. Aden Nuquin Papanuidtsëqui bëdambo icmetsiash. Nuquin Papan chomiaidquien Esus nechitec,” quetsiash. ²²“Mibëd ëbi tantiananquiacpadquiec ma ëbi tantiaquido tantiananquiono. Ma chieshënanenquio icnu,” quequin mimbi ëbi namiacpadomboen ëbi tantiaquido namiombi, Papa. ²³Nuqui tëshnanenquio yacpadec aidobëd tëshnanenquio iquendabi. “Chieshënanenquio yec tantiananquiec ma bëdamboec tabadnu,” quec aidobëd tëshnanenquio iquendabi, Papa. Adec ëbi tantiaquido bëdamboec tantianansho isun matsesën naden tantiatsiash. “Ambi chiacpadquid Nuquin Papan chomenëdaid icquin Esusën abi tantiaquido aden bëdamboen tabadmec. Ambi chomenëdaid aton Mado tantiaquiacpadomboen Nuquin

Papan aid tantiaquido tantiaquiec,” quequin matsesën tantiatsiash, Papa. ²⁴Mimbi ëbi tantiaquido icmiaido nuqui tabadacnombo tabadmeta. “Nuqui matses uabi icquin mimbi: ‘Ëmbi tantiaidquio mibi neque. Nuquibi nanuna, Mado,’ cac nuqui bëdamboshë yec tabadtenecpadequi nuqui tabadsho ma ëbi tantiaquidon isnu,” qeshun mibi: “Nuqui yacno tabadmeta, Papa,” caimbi. ²⁵Icsaisambo mibi icsho icsambo icquidon mibi tantiatiapimbo icnubimbi mibi tantiaquiec. Mibi yacnuësh choquid icshobini ëbëd icquidon: “Ai, Nuquin Papa yacnuësh choquidien nec,” quequin tantiaposh, Papa. ²⁶Aden tantiamenuen yuec ëbëd icquidobëd tabadquin mimbi naid chuibanombi. Ëbi nidan ëmbi chomiaidën con Mayanën adembi ëbëd icquido tantiamendac. “Mimbi ëbi tantiaquiacpadomboen ma nuqui daëdi tantiaquiash ma tantiananquiono,” qeshun con Mayan aidobëd tabadmendambi. Adoac ëbëd icac bimboec con Mayan tantiadendac, Papa —quepondash Esus Nuquin Papa chiec.

Esus bedmiaid

(*Mat. 26.47-56; Mad. 14.43-50;
Duc. 22.47-53*)

18 ¹Aden Nuquin Papa yuen chianec Esus nidpondash. Ëbi chedobëd nidquin acte Sededon caid potiash tiedno cuëte odibos caid nitsinacno ëbitedi chiec tabadtenebocnombo chopondash. ²Ambo tabadnubien Udas: —Ëbi abëd tabadtenebocno tiednoen nidchitash —quianec Esus bedmenuec ³chopondash. Aden chieshëmënquido chuiquid dapabo chuitanshun matses dadpen bëpondash nëidtedi. Nëidic con matses chuiquid dapabobëd tan padiseyobon namiaido sondado chedo. Nëidic con matses

yuaquido Doma yacnoquido sondado dadpen. Nëidic aid sondado chuiquid. Aidedi Udasën bëpondash. Tabotebëdta cueste sanambededtsëcquieic cho-chopondash. Utsibombic chështe.

⁴Adec cho-chosho isash bëquedbanec nidquin: —Ëbi unës uamec —quequin tantiaquin Esusën: —¿Atotsi quec ne? ¿Tsutsi nibëne? —cac ⁵—Nasaded yacnuësh caniquid Esus bednuec nebi —quepondash sondado chuiquid. Adshun isac aibdëd Esus bedmequid Udas icpondash.

⁶Adshobien Esusën: —Në iquebi —capondash. Nuquin Papapadquidquiobi icquin adoac dacuëdec: —Aucbidi cuenu —quec uebudcuededpondash bednuequidotedi. ⁷Adshobien padpiden Esusën: —¿Tsutsi nibëne? —cac: —Nasaded yacnuësh caniquid Esus bednuec nebi —queoasho tantiasun: ⁸—“Në iquebi,” caombi. Ëbiuidtsëqui bedta. Ëbëd icquido bedenda —capondash Esusën. ⁹—“Mimbi ëbi tantiaquid icmiaido Satanas chieshtomiambo iccombi, Papa,” quequin ëmbi Nuquin Papa chuibocpadomboen nëido chieshtometiapimbo iquebi —quequin tantiec: —Nëid bedenda —quepondash Esus.

¹⁰Adnubien Petedon abi tsidiadaid chështe chictanquin chuiquid dapan yua abiucquio pateshunepondash. Aid yua Madco niondash. ¹¹Adosho isashien Esus: —Padi. Chën. Min chështe naued. Nuquin Papan chiapadec paëmbo icnuc unësendabi —quepondash Esus.

Anasën shubuno Esus buanaid

(Mat. 26.57-58; Mad. 14.53-54; Duc. 22.54)

¹²Adshobien sondado chedon Esus bedpondash. Aden bedshun: —Cuidmenun chuiquid dapa yacno mibi buanu —catanquin catanepondash.

^{13,14}Aden cataneshun buanquin con matses chuiquid dapambo Caipas caidën cucun shubunoba buanondash. Aid setambi chuiquid dapambo Caipas iccondash. Esus chieshëne: —Nuquin matsestedi unës uamenquio icnuen Esusded unës uamenuna —queboed Caipas niondash. Aton cucu chuiquid dapabidi niondash. Aidi Anas niondash. Anasën shubunoba Esus buampondash. Ashunquio Caipas ismenuen buampondash.

Petedon: Ëmbi isacmaid Esus nec, quequin chiaid

(Mat. 26.69-70; Mad. 14.66-68; Duc. 22.55-57)

¹⁵Esus buansho isun Petedobëd tan chinunondambi. Chinuntuidash nidequi Caipasën shubuno choash daquënë uaidën puduednuesho tantiasun shëcuë isquid chidon puduedmiondashi. Ambi isondaic icsho aden puduedmiondashi. ¹⁶Ëbi puduedmequin Petedo ambi isacmaid icsho puduedmenquio icpondash. Adsho istanquin: —Ëbëd icquid neque. Shëcneshun. Ma puduednu —capondambi. ¹⁷Adoac puduedmeshun shëcuë isquid chidon: —¿Në bedboed Esusbëd icquidta mibi ne? —capondash Petedo chuiquin. Adoquien Petedo dacuëdec: —Padenquio —quepondash muequi. ¹⁸Adnubien iquendoshon daquënë uacnoshon cuëte dëtsiadoshon sondado chedobëd anocquido yuabo cuëte cuëc tabadpondash. Adsho isashien Petedotsen cuëte cuënuec nidpondash ëbi shubunquio puduednuc.

Caipasën Esus chuimiaid

(Mat. 26.59-66; Mad. 14.55-64; Duc. 22.66-71)

¹⁹Adec ëbi puduednubien Caipasën Esus chuimepondash. —Mibëd icquid

¿tedtsi iquec? ¿Ēbēd icquido
dēniaquecta icpec? Mibēd icquido
¿mitsipaden chuibano? —capondash.
²⁰Adoaquien Esusēn chuipondash.
—¿Ompoquindambi chuibandio?
Nuquin Papa tabadte shubu uashunaid
daquēnē uaidēn puduedshun mambi
chuibandeneboc. Nuquin Papan chiaid
chuiabante shubun-shubunquiec
puduedcuenequin mambi chuibeneboc.
Ompoquin chiambo iccombi. ²¹Mimbi:
“Icsamboen naosh,” caid ēbiuidtsēqui
chuienda. Ēbēd icboedotsen chuime.
Ēmbi chiaid abitedi tantiashun aidombi
mibi chuitsiashe. Aidotsen chuime
—quepondash Esus.

²²Adsho tantiashun: —¿Chuiquid
dapada adopaidd? —quetanquin
sondado chuiquidēn mēdanten
bēcuespondash Esus. ²³Adoaquien:
—¿Icsamboendambi chuidio?
¿Atotsimbi icsa uaoque? En chui.
Mambi abimbo chuiboc. ¿Abimbo
chuiquidta cuespaid? —quepondash
Esus. ²⁴Adondash Esus Anasēn abi
cataniacchobi Caipasēn shubuno bēac.

**Petedon: Ēmbi isacmaid Esus nec,
quequin chuioida**
(*Mat. 26.71-75; Mad. 14.69-72;
Duc. 22.58-62*)

²⁵Adnubien Petedo abi cuēte cuēec
tsadsho abēdtan cuēte cuēec
tabadquidon: —Esusbēd icquidien mibi
nechitec —capondash. Adoaquien
Petedo: —Padenquio. Mabi aidbēd
icambo yoc —quepac caondash.
²⁶Adshobien chuiquid dapan yua utsin
Petedon pateshuneboedēn matsesēn:
—Esus bedacnobimbi mibi ischitoc
—caquien ²⁷padpidec: —Padenquio.
Mabi ano nidambo yoc. Ēmbi
isacmaidquio ma Esus neyoc
—quenubien Esusēn chuiboedquio
cachina bēnē cuēdampac caondash.

Pidato caidēn shubuno Esus buanaid
(*Mat. 27.1-2; Mad. 15.1-5; Duc. 23.1-5*)

²⁸Adnubien Caipas aton chuiquid
utsibobēd: —Nuquin matses yuaquido
ancaquid Pidato caid ismenuembien
Esus buantiad. Aid Esus unēs
uamenuembien natiad
—quecuededpondash. Badiadnubi
Pidaton shubuno Esus buampondash.
Buanashic: —Matses utsin shubun
puduedshun mishtemaid mishash
Nuquin Papan matamiampid inchēsh
tantiec con matsesbēd pec
tabadtiapimbo icchitomane —quiash
Pidaton shubun puduedenquio
icpondash. ²⁹Adnubien Pidaton aton
shubunuēsh puduantanquin Esus
bēquido chuipondash. —¿Atotsi
quequin nēid bēo? ¿Icsamboen naquidta
nepc? —caquien ³⁰—¿Bēdambo
icquidtambi mibi ismenuen bēdio? Con
matses chuiquid dapa ictiadquio icquin
icsamboen naoshe. Cuidquiota
—quepondash chieshēmēnquido.
³¹Adoaquien Pidaton: —Mimbi cuidta.
Min matsesēn: “Icsamboshē icquid
naden cuidquid yendac,” cacpadomboen
nata —caquien: —Padi. Ēmbi cuidquin
unēs uacsho isash min matses
chieshtonoshe. Min matsesēn: “Con
matsesēnuidtsēqui unēs uaquin
cuidaquien bēdambo ictsiash,” qeshun
ēbitedi chieshēnushe —quepondash
Esus chieshēnquido Pidatombo Esus
unēs uametiadquio yec. ³²Ēnden abi
chieshēnquidon bedabi icnuc: —Ēbi
cuesten dectanquin unēs uaindac
—quequin Esusēn chiacpadomboen
namenuc adpondash.

³³Adnubien aton shubun
puduedtanquin Pidaton Esus
chuimeoapondash. —Cho. Chuinu. ¿Min
matses isadaidbo chuiquid dapada ne?
—caquien ³⁴Esusēn: —¿Mitsipadquid

chuiquid cai? ¿Utsibon tantiacpadquidta cai? ¿Mibipadquidta cai? —capondash. ³⁵Adoquien Pidaton: —¿Isadaidbodabi nedi? Padenquio. Ĕmbi tantiacpadquid caimbi. ¿Atotsieshun min matses chuiquid dapabon mibi bëosh? ¿Atotsi icsa uasho naosh? —caquien ³⁶Esusën Pidaton bëyuc chuiboed tantiaquin: —Mibipadquid chuiquid dapapenquio nebi. Nidaidën con yua sondado nibëdec. Nidaidënuësh mibipadquid icquin con yuabo ëbi bedquido cuesun siametsenombi. Aden ëbi bedenquio ictsenosh. Mibipadquidpenquio nebi. Abucshun chuiquid dapambo nebi —quepondash Esus.

³⁷Adsho tantiashun Pidaton: —Chuiquid dapambo nebi ¿quecta ique? —caquien: —Ai, adquid nebi. Chuiquid dapambo icnuéc matsespondabi. Chuiquid icquin matses uaquid tantiamenuen abimbo chuiabanombi. Adoac abimbo chuisho tantiate bunquidon ëbi tantiatsiandac —quepondash Esus.

³⁸Adsho tantiash Pidato: —¿Tsuntsin matses uaquid quequin abimbo chuiatsiash? —quetanec puduëshun Esus chieshënquido chuioapondash. —¿Icsambo icquidta Esus nedic? Ma icsapenquio icquid neyoc. ³⁹Nëid cuidtiapimbo icquin chuinu. Nuquin Papan matamiampid inchësh tantiate ushën min matses quënën naudedaid abentsëc cuemedeniandambi. Adembidi abentsëc cuemembi. ¿Mitsicquidimbi cueme? ¿Nëid mibi chuiquid dapa Esustambi cuemepe? —caquien: ⁴⁰—Padenquio. Esus nainda. Utsibi cuemeta. Badabas caid cuemeta —quecuededpondash. Badabas caid Doma yacnocquido cuesun siaquin cuemete bunquidquid icnuc adcuededpondash Esus chieshënquido Esus unës uamete bunquieç.

Esus cueshcaid

(Mat. 27.27-31; Mad. 15.16-20)

19 ¹—Badabasquio cuemeta —quesho tantiatanquin Pidaton: —Në Esus cueshcanuen buan —capondash. Adoquien buanshun sondadon canite cuëshë dëdectanquin nacnenaid cueshcanten Esus comapenen cueshcapac caondash. ²Cueshcatanquin pinchuc-pinchucpambo icquid mauete nacnenaid Esus mauemepac caondash. Adotanquimbic chuiquid dapan dashcutebimboecquid umucquid dasiuintanquin: ³—Adec dasiuidquid chuiquid dapambo nec —quequin sondadon Esus mamëshunmpac caondash. Aden mamëshunquimbi: —Isadaidbo matses chuiquid dapambo Esus neque. Is —quetanquin mëdanten bëcuesbanepac caondash. Adotanquin Pidato yacnobidi buanoapac caondash.

Esus unës ua, quiaid

(Mat. 27.15-26; Mad. 15.6-15; Duc. 23.13-25)

⁴Buanoacsho istanequien Pidato padpidec puduenoash Esus bëquido chieç: —Mimbi bëboed Esus icsapenquio iquec. Icsambo icquid icsho: “Unës uata,” catsiambi badedi. Icsapenquio icquid icsho adotiapimbo iquebi. Padi. Cueshcaquin cuidombique —quepondash Pidato. Adnubien ⁵Esus puduempondash. Pinchuc-pinchucpambo icquid mauemetanquin dashcute umucquid dasiuiac dasiuidpamboec puduëshobien Pidaton: —Is. Mimbi bëboed choeque —cac ⁶choshos istanequien: —Cuesten dectanquin unës uata. Cuesten dectanquin unës uata —quecuededpondash Esus chieshënquido comapenec cuëdec. Adoquien Pidaton: —Mimbi cuesten dectanquin unës uatan. Ĕmbimbo

adotiapimbo iquebi. Icsapenquo icquid icscho Esus unës uatiapimbo iquebi —capondash Pidaton.

⁷Adoaquien Esus chieshënkuidon: —Con matsesën: “Nuquin Papa muauaquid unës uaquid yendac,” cacpadomboen natiadquo iquebi. Esusën: “Nuquin Papan Madombo nebi,” quequin Nuquin Papa muauaoshe. Unës uaquimbien ictiad —quepondash. ⁸—“Nuquin Papan Madombo nebi,” quiosh —quesho tantiashien Pidato dacuëdquiec yampac caondash. ⁹Adash aton shubun Esusbëdi puduedoashun Pidaton Esus chuioapondash. —¿Tsutsimbo ne? ¿Mitsiuëshquio chonda? —caqui Esusën ëcbedenquo icpondash.

¹⁰Aden ëcbedenquo yac nëishashien Pidato: —¿Chuitiapimboda ique? ¿Tantienquioda ique? Ëmbi: “Cueme,” cac mibi cuemetsiashe. Ëmbi: “Cuesten dectanquin unës ua,” cac mibi adotsiashe. En chui —caquien Esus: ¹¹—¿Mibembida chuiquid yano? Nuquin Papan chuiquid icmiac mibi nec. Nuquin Papan chuiquid icmiabi adquid ictiapimbo mibi ictsiac. Chuiquidpenquo icquin mimbi ëbi cuesten dectanquin unës uametiapimbo ictsiac. Ëbi cuesten dectanquin unës uamenuec mibi icsambo icnuc ëbi bëboedo chuiquid dapabo icsamboshë iquec —quepondash Esus.

¹²Adsho tantiashien Pidato: —Esus unës uatiapimbo icchitebi. Cuemetiadquo iquebi —quetanquin padpiden Esus chieshënkuido chuitanoapondash. —Esus cuemenu —caquien: —Icsambo iquec. Min matses abitedimbo chuiquid dapambo Sesad caid: “Ëbentsëqui chuiquid dapambo nebi,” quiac caosh. Aid dëniaquec Esus chuiquid dapa icte bunquiec. Esus cuemequin mibi chuiquid dapambo

mimbi nëishmeque. Esus cuesten dectanquin unës ua —quecuededpondash. ¹³Adsho tantiashun Esus puduemooatanec cuënote nacnenaid abuc tsadunaidën cuidte chuinuec tsadten tsadtopondash Pidato. Aid cuënote nacnenaid con onqueten Cabata capondash. ¹⁴Nuquin Papan matamiampid inchësh tantiate ushë badiadash icnuc niondash. Aid tsadten tsadtoshon Pidaton: —Në mibi chuiquid dapa iquec —capondash iccuededquido chuiquin. ¹⁵Adoaquien: —Cuesten dectanquin unës ua. Nëbimbobi buanshun cuesten dectanquin unës ua —quecuededpondash Esus chieshënkuido. Adoaquien: —¿Mibi chuiquid dapadambi cuesten dectanquin unës uape? —Pidaton caquien Esus chieshënkuido: —Mibi chuiquid dapambo Sesad caid aiduidtsëqui chuiquid dapa caimbique. Esus cuesten dectanquin unës ua —quecuededpondash Esus chieshënkuido. —Nuquin Papa yacnuësh choshon nuqui yuaquido cuemepashun —queboedobi adondash abi yuaquidi chiequi.

¹⁶Adoaquien Esus chieshënkuidon chiacpadomboen: —Esus cuesten dectanquin unës uatan —capondash Pidaton aton sondado chuiquin.

Cuesten dectanquin Esus unës uaid
(*Mat. 27.32-56; Mad. 15.21-41;*
Duc. 23.26-49)

¹⁷Adoac buanquin: —Nëidën dectanu —qeshun sondadon cueste daëd napotiaid Esus chiadtomebidampondash. Abi dectantebi Esus chiadtomebidanec nidquimbi macuësh mapi canite caid yacno buampondash. Aid macuësh mapi canite cain con onqueten Cocata

capondash. ¹⁸Ambo nidshun aton dashcute dachictanquin bëchun shuin mëtoccaquinc tatoccaquinc catanquin cüeste daëd napotiaid ambi bëboedëmbi Esus dectampondash. Icsambo icquid daëdpambo cüesten dectanaid uquë diadbudcuenec diadnuc Esusquio nënantanquio dectampondash.

^{19,20}Adnubien Pidaton: —Nasaded yacnuësh caniquid yec Esus isadaidbo chuiquid dapa nec —quequin cüeste pada uaidën dada uapac caondash. Aton matses Doma yacnocquidon onqueten dada uauquinc con onqueten dada uauquinc matses utsi Quidieco matsesën onqueten dada uauquinc catanquin Esus dectanaid cüesten dectampac caondash. —Ëmbi dada uaboed isash: “Isadaidbo chuiquid dapa icsho Esus cuidac,” ma abitedi quenu —queshun Pidaton adopac caondash. Aden dada uashun dectanaid isashien Esus chieshënquido nëishquiopac caondash. —Shubu dadpen icquid Edusaden caid anoentsëqui Esus dectanaid icnuc matses utsin onqueten-onquetenquien dada uaid matses dadpenshun isnushe —quiash ²¹Pidato chiec nidpac caondash. —Icsamboen chuiquin ma mimi dada uapac boc. ¿Con matses chuiquid dapada Esus nedic? Adquidpenquio nec. Utsi uain dada uata. “ ‘Isadaidbo matses chuiquid dapa nebi,’ quequid Esus nec,” quequin cüeste cuëshë utsin dada uata —caquien ²²—Padi. Mambi ëmbi tantiaboedquio dada uaboc. Utsi uain dada uaoatiapimbo iquebi —quepac caondash Pidato.

²³Adnubien Esus dectanquido sondado daëd-daëdquieic icpondash. Esusën dashcute 5ted icsho sondadon bedbanquin abentse-abentsen bedbededpondash abentsëc abi icnuc. Aid abucshun bedanquin abichobi

daëdcaid tuscabi icquid niondash.

²⁴Adquid icsho isun: —Canchenquio icquin ¿tsundanquio bedequé? Isnuna —queshun abi cuëmëdquidtedi dada uabanshun tëchun sandoshon cadotanequin dada uaidëmpi abia puduemiaid isun aid dashcute bedondash. Aidon nate Nuquin Papan tantiamiac con tsusedpan naden dada uapampic. “ ‘Abentse-abentsen con dashcute bedosh. Con dashcute utsi bednu, quequin dada uaidëmpi abia puduemiaid isnuen naosh,’ quependac,” quequin dada uapampic.

²⁵Adnubien Esus dectanaid cüeste tayun nëidtedi icpondash. Nëidic Esusën tita. Nëidic Esusën tita utsi. Nëidic Madia Codopasën chido. Nëidic Madia utsi Mactada yacnuësh choquid. Aidtedi chido icpondash. ²⁶Në chido tabadnuc ambobi uquëtsëc tabadondabi. Adec ambi tantiaidquio ëbi icsho isun Esusën aniba chuipondash. —Nëid con mado cata, tita. Ma mibi bëdamboen dayun uanu —capondash Esusën. ²⁷Adshumbic ëbitsen chuiquin: —Con ta tita cata. Adshun bëdamboen ëbi dayun uashunta —cac con shubunobi buanondambi bëdamboen Esus dayun uashunuen.

²⁸Adboshien unësquionoshi Esus: —Con Pan chiacpadomboen nainembi. Matses tantiec ëbided cuidadec unësebi —quequin tantiec con tsusedpan dada uauquin chuipampicpadec: —Acte bundobi —quepondash Esus. ²⁹Adsho tantiaishun matsun acte mucambo icquid anidquid shapu-shapupactsëcquidën punshun cüeste dëdectanshun abuc sananquin ëccuëscadonetsëcquin chishmepondash. ³⁰Adoac acte mucambo icquid chishtanequien: —Con Pan chiacpadomboen nainquiombi —quepondash. Adtanequi tëdquëdbudpondash Esus unësequi.

Esus uinte masiaid

³¹Adnubien Esus chieshënkuido: —Badiadash Nuquin Papan matamiampid inchësh tantiante ushë iquec. Chonoadenquio icte ushë nec. Aidën cuesten dectanquin unës uaid chococac icsambo ictsiashe. Nëbimbobi chococamenu —queshun Pidato chuitampac caondash. —Baded nidte podquënkun unës uame. Inchëshequ —cac ³²Pidaton aden chiac sondadon nidte podquëntanondash. Esusbëdta dectanaid ëquë diadquidba nidte podquënsumbic utsiuc diadquidtsen. ³³Adotanquin isquien Esus ënden unësac. Adshobien nidte podquënenquio icpondash.

³⁴Adotanquimbic: —Unësabi icnushe —queshun: —Unës uaquiobono —quetanquin sondadon cudan podo ansequin Esus uinte masepondash. Adoac nua intac chididiquiondash actebëdi. ³⁵—Adosho ëmbimbo isondambi —caimbi. —Ëmbi dada uaid isun ma Esus tantianu —queshun abimbo chuiquin dada uaombi nëid dada uaqin. ³⁶Nuquin Papan tantiamiac con tsusedpan: “Canite podquënenquio iquendac,” quequin dada uapampicpadomboen canite podquënenquio icpondash Esus. ³⁷Adembidi podo ansete dada uapampic. “Ambi podo anseboed isec tabadendac,” quequin dada uapampic.

Esus unësacsho chococaid

(Mat. 27.57-61; Mad. 15.42-47; Duc. 23.50-56)

³⁸Adnubien shubu dadpen icquid Adimateya yacnocquid Ose chopondash. Esus tantiaquid aid niondash. Esus chieshënkuido dacuëdënkun: —Esus tantiaquid nebi —quequin utsibo chienquio icboedëmbi Pidato

chuitampac caondash. —Esus chococanun buanendambi —cac: —Ai —cac Esus buampondash. ³⁹Aidbëdi Nicodemo inchëshën Esusbëd onquiondaid nidpac caondash. Bëdambo nuadquid mida adoebëdta cabiunaid unësaid dabiunte bëac caondash. Nuamboshë. Yuëmbi icnuc ³⁵quidostembi icnuc bëac caondash. ⁴⁰Adshumbien Osebëdtambi Esus nua dabiunkun uesquin dataniac caondash dashcuten. Adshumbic padpiden dabiunoquin. Adshumbic padpiden dataneoquin. Adshumbic padpiden dabiunoquin. Adshumbic padpiden dataneoquin. Chococanun con matsesën adoquid. ^{41,42}Adashic: —Badiadash Nuquin Papan matamiampid inchësh tantiante ushën unësaid chococac icsambo ictsiashe. Badedquio chococanu —queshun tied nëbi ictsëcquidën Esus buampac caondash. Buansumbic cuënote dapa shëcuë uaid chucan matses chococabi icquidën Esus nauedpac caondash. Shëcuën nauedtanquin bëtimpac caondash cuënote dapambidi.

Esus uincuenaid

(Mat. 28.1-10; Mad. 16.1-8; Duc. 24.1-12)

20 ¹Esus chococan daëdec ushash badiadnuc dominco caid ushën ënden inchëshquio icnobi Mactada yacnocquid Madia chedo Esus chococacnuësh sedenquec nidpac caondash. Nidshun isquien shëcuë bëtinaid cuënote dapa bëcunepamboen shëcniac. ²Cuënote dapa bëcunepamboen shëcniacsho istanec titinquier nec choquin chuituidpondashi. —Esus padoen buanchitaccosh. ¿Mitsimbo buampash? —quepondash Madia Petedobëdta ëbi chuituidec.

³Adoquini: —Istanu —quianec ⁴titinquier nec chococacno Petedobëdi

nidpondac. Petedo nianec ëbia
nidpondabi. ⁵Adshumbimbi
puduedenquo icquin shëcuë
anshuebudshun anispondac. Adshun
isquien dashcute dataniaiduidtsëqui uec.
⁶Aden ëmbi anisnubien Petedo choequi
badedi shëcuën puduedpondash.
Aidëntsen dashcute dataniaiduidtsëqui
istuidondash. Esus nibëdondash. ⁷Në
dataniaid uenubi udictsëc dashcutempi
bëpucaid bëdamboen shëbunaid
uiondash. ⁸Aid puduedsho istanec
tsyuec puduedshun ëmbitsen isondambi.
Adash: —Uincuenac. Nuquin Papan
Madombobi nec —quepondabi
Petedobëdtsëqui onquec. ⁹—Nuquin
Papan tantiamiac con tsusedpabon aden
Esus uincuenta chuiquin dada uapampic
—quequin tantienquo icboedi
adondabi. ¹⁰Aden istanec ëbi
ushbocnobidi chiec choapondabi.

**Esusën Madia Mactada
yacnocquid ismiaid
(Mad. 16.9-11)**

¹¹Adnubien ëbi chuiuamboed Madia
chococacnobidi isec nidoapac caondash.
Nidash shëcuë cuëmano tsadec
sedenquetuidpac caondash. Adec shëcuë
cuëmano tsadec sedenquetanec shëcuë
anshuebudshun isaquien ¹²Nuquin
Papan abi yacnoshon uaido mayan bëda
daëd ushumbo icquid dasiuidquid Esus
uebocno tabadpec. Esus nibëdec. Mapi
icbocno abentsëc tsadnuc utsi taë
icbocno tsadpac caondash. ¹³Adshumbic
aidën: —Ëtotsi quiash sedenque,
champi? —caquien: —Con Icbo pado
ëmidambo buanac? Istiadquo iquebi.
ëMitsimbo buampashba? Unësquio
iquec —quetanec ¹⁴aucbidi nidnuec
bidiadshun isquien Esusquo icpec. Utsi
dansho ¹⁵Esusëntsen: —Ëtotsi quiash
sedenque, champi? ËTutsi nibëne?
—caquien Madian tied neshcaquid

danquin: —ËCon Icbo padoda buano?
ëMitsimbo buano? Ëbi isme. Shëcuë
utsin chococanun buanu —capac
caondash Madian Esusquibobi
chuiquimbi.

¹⁶Abi adoshobien Esusën: —Ëbi nebi,
Madia —cac bëisquotanequien: —Esus
nec. Ëbi chuiquidquo nec —quetanquin
con onqueten cuënnquin: —Dabi —capac
caondash. Adotanquimbien Esus
dayumbudpac caondash unësquio icsho.
¹⁷Aden abi dayumbudshobien Esusën:
—Ëbi dayunenda. Padpidec nidenquo
icte danquin ëbi dayunenda. Ëmbi
chuibocpadec con Pa yacno nidabi
yuec-yuecpactsec tabadtanec nidebique.
Ëbëd icboedo ëmbi con utsibo caboedo
ëmbi chuiboedquo chuitan. “ ‘Nuquin
Papa yacno nidendabi,’ quiosh,” catan
—quepac caondash Esus. ¹⁸Adoaquien
ëbi chiec Madia chopondash. —Nuquin
Icbo Esus isombi. Uincuenaccosh. Ambi
chuiboed chuinu. Tantia —quequin
Esusën abi chiaidquo chuituidpondashi
Madian Mactada yacnocquidën.

**Uincuenshun Esusën abëd icquido ismiaid
(Mat. 28.16-20; Mad. 16.14-18;
Duc. 24.36-49)**

¹⁹Madian aden chuituidboed
inchëshbudtsëqui shubun tabadpondabi
Esusbëd icboedobëdi. Esus
chieshënnquido dacuëdënnquin
umanucuësh utsi puduedtiapimbo icnuc
bëdamboen bëtashash tabadnubien
shëcuënnuësh puduedenquo icboedi
nuntanquibobi Esus isadcuempondash.
Adtanequien: —Dacuëdenda
—quepondash. ²⁰Adtanquin abi bëchun
shuin mëtoaccaid abi podo ansiadibëdta
ismiaquini cuishonquiampondac:
—Nuquin Icbo uincuenac —quiash.
²¹Adec cuishonquesho isashien ambi
chuibocpadecbidi: —Dacuëdenda
—quetanec: —Tantia. Mibi chuinu. Con

Pan: “Matses chiec nid,” ëbi caondacpadomboebidi: “Ëbi chuibeneta,” mibi caimbi —quepondash Esus. ²²Adtanquin ëbi chedo dabushcabampondash.

Dabushcabanashic: —Nuquin Papan Mayan mibëd tabadendac. ²³Mibëd icquin Nuquin Papan tantiaidquio tantiaimequin Nuquin Papan Mayanë mibi utsibo chuibamendac. Adoac mimbi aden chuibanaido caic: “Nuquin Papan chiaid niaquec icsambo icboedi Esus tantiaquid yansho Nuquin Papan nëid bëdamboen isec,” quequin mimbi chiacpadomboen Nuquin Papan bëdamboen istsiash. Utsien: “Nuquin Papan chiaid niaquec icsauidequi icsho nëid Nuquin Papan bëdamboen istiapimbo iquec,” quequin mimbi chiacpadomboebidi Nuquin Papan bëdamboen istiapimbo ictsiash —quepondash Esus ëbi chedo chiec. Adtanequi isadenquio yanoaondash.

Esusën Tomas ismiaid

²⁴Adec Esus isadenquio yanoanubien Esusbëd icboed utsi Tomas abi ushëmbi anin daëd tishaid chopondash.

²⁵Choshobi: —Esus isombi —cac: —¿Aidquiobida nepash? Utsien nechitash. Bëchun shuin mëtoccaid shëcuë isun aid shëcuë mëdanten bëmishquinc podo ansiaid bëmishquinc caquioshombimbi: “Ai, nuquin Ico uincuenac,” quequin tantiatsiac. Padambobi: “Con Icobien niash,” quetiapiimbo iquebi —quepondash Tomas. ²⁶Tomas adbon 7tedec ushash shubu nuntambidi tabadoapondabi. Tomas chedobëdi tabadondabi. Puduedtiapimbo icnuc padpiden bëtashoash tabadnubien shëcuë shëcniabi Esus isadcuenoapondash. Adashic: —Dacuëdenda —queopondash. ²⁷Adtanequien: —Is

con mëdante, Tomas. Shëcuë bëmishhec cho. Në podo ansiaid iqueque. Aidsen bëmishhec cho. Adshun: “Uincuenabien icchitash,” queboedëmbi: “Uincuenaccosh,” quequin tantiata —caquien ²⁸mishenquio yec badedi: —Tso. Con Icbombo ma mibi neyoc. Nuquin Papapadquidquibidi ma mibi neyoc —quepondash Tomas. ²⁹Adsho tantiashien Esus: —Ëbi isun: “Nuquin Papapadquidquibidi mibi nec,” quequin mimbi ëbi tantiec. Utsibombien ëbi isabi: “Ai, Esus Nuquin Papapadquidquibidien nec,” quequin ëbi tantiasho Nuquin Papan bëdambo icmendac —quepondash Esus Tomas chiec. Adtanec isadenquio yanoapondash.

³⁰Comapenen tantiaquidquio yec abembi uincuenash Esus adpondash. Ënden unësabi icquin ademibidi comapenen tantiaquin nabampondash. Aden ambi comapenen tantiaquin nabanaidtedi uesquin chiambo iccombi. ³¹Padi, aiddedi chiombi. —“Nuquin Papan chomiaidquio yec Nuquin Papan Madombobien Esus nec,” quequin aid tantiash ma Nuquin Papa yacno abëd tabadtequido icpanu —quequin aiddedi dada uaombi.

Chian cuëmanuësh Esus isadoaid

21 ¹Tantia. —Edusaden yacnuësh isadboshic chian Tibedias caid cuëmanuështsen Esus isadpondash —quequin mibi chuinu. ²Esus uincuenash daëdec isadan con nidaid Cadidia caid yacno nidanepondabi. Nidaniash nëidtedi tabadpondabi. Nëidic Petedo. Nëidic Tomas anin abi ushëmbi daëd tishaid ëmbi caboed. Nëidic Cana yacnocquid Natanaid. Nëidic ëbëdta tishaidquio. Nëidic ëbi. Nëidic Esusbëd icboed utsi daëd. Aiddedi icpondabi. ³Adnubien Petedo:

—Ëmbi bedtenecpaden nëshaidën nuëcquid bedtanu —quepondash. Adshobimbi: —Nid. Nuquitedi nanu —capondac. Adash chian yacno nidash cano antabëdtoanec nënantan nidpondabi. Adshun nëshaid dapa nëneshun yuecshun cadoshon isac nibëdec. Adshumbic padpiden nëneoashun cadoshon isac nibëdoaic. Inchëshbudtsëc tauash nuëcquid bedambobi ambi badiadpondabi.

⁴Badiadquionobi acte cuëman masi dapan Esus nidsho istuidpondambi. Utsiambi dampondac. ⁵Adshobini Esusën cuëmpondash. —Con utsibo çtedtsi bedo? —cac: —Padambo. Nibëdosh —capondambi. ⁶Adsho tantiashun: —Mimbi nëniauc nënenquoio icquin cano utsiuc nëshaid nëne. Adoac nuëcquid bedadec —cac ambi chiauc nëshaid nënetanquin: —Indono —cac nëshaid indotiapimbo yuëmboshë icpondash. Nuëcquid dadpen bedac.

⁷Adsho isumbimbi: —Ma Esus neyoc, Petedo. Nuquin Icbo nec —capondac. Adoacquien aton tsitsumi icquiduidtsëqui icnuc abi dachiquidboed aton dashcute utsi dasiuidtanec acte nëpudunash Petedo tan-tanidec nidpondash Esus isnuec. ⁸Ëbien utsibobëd canombi tsyuec nidondac nëshaid shoyombanec. Cuëma anoentsëqui nuëcquid bedash 100 metedos cactiontsëc nidondabi. ⁹Tsyuec choash pudundoshon isquien pambëdi nuëcquid cuëten shëadtsec. ¹⁰Adnubien Esusën: —Mimbi bedboed daëdpactsëc beccho. Penu —cac ¹¹Petedo: —Ai, bedtanu —quianec nidash cano anidtoashon nëshaid cubu-cubuctsëcquoio icquid indopondash. Acte cuëmano tsindoshon isac dadpenquioshë 153tedi nuëcquid icpondash. Nua-nuaic tsadquido icpondash. Nëshaid tësëdtiadtsëcquoio icnuc indondambi.

^{12,13}Adshumbic ambi: —Pec cho —cac cho-choash tabadsho pamba menebantanquin nuëcquidtsen Esusën menebampondashi. Adoac: —çTsutsi ne? —quenquoio icquin: —Esus nec. Comapenen tantiaquin nuëcquid nuqui bedmiosh —quequin tantiondambi ëbitedishun. ¹⁴Adec uincuenash shubu nuntan tabadnuc daëdec isadondashic chian cuëmanuështsen isadoapondash Esus.

Esusën Petedo chiaid

¹⁵Aden chian dapa cuëmashun Esusbëdtan piondambi. Adshumbic Onas caidën mado Petedo Esusën chuipondash. —Tantia. Mibi chuinu, Petedo. Nëidon ëbi bëdiactsëc tantianuc çada ëbi tantiaquie? —caquien: —Ai, mibi tantiembi. Aden ëmbi tantiaid mimbi tantiec —quepondash Petedo. Adsho tantiash: —Ëbi tantiaquin con obecabimboecquido ëbi dayun uashunta —quepondash Esus. —Obeca icbon aton yua dayun uacximboen ëbi tantiaquido ëbi dayun uashunquin ëmbi chiaidbëdta ëmbi naidtedi chuibanta —quequin tantiec adpondash. ¹⁶Adshumbic padpiden: —çAda ëbi tantiaquie, Petedo? —cac: —Ai, mambi mibi tantieyoc —quesho tantiashien padpidec: —Ëbi tantiaquin con obecabimboecquido ëbi dayun uashunta —queoapondash Esus. ¹⁷Aden daëden chuishumbic padpiden Esusën: —çAda ëbi tantiaquie, Petedo? —cac shubiantiadtsëcquoio yanondash Petedo. —Unës uabi icnuc: “Ëmbi isacmaid Esus nec,” quequin ëmbi chuiboctedembidi Esusën chiebi —quiaish shubiantiadtsëcquoio yanondash. Adashic: —Mibi con Icbo nec. Ma mimbi abitedimbo tantieyoc. “Petedon ëbi tantiaquie,” quequin ma mimbi tantieyoc —quepondash Petedo. Adsho

tantiash Esus padpidec: —Ëbi tantiaquin con obecabimboecquido ëbi dayun uashunta —queoapondash Esus.

¹⁸Adashic Petedobidi chuiuaic: —Tantia. Utsien chuinu. Cania yec mibibi tsiuidondac. Adanec mibi bunacno mibi nidtedniondac. Tsiuibudtsacshoen tsiureshun utsibon ëquë mëdimbudcuentsëcshun mibi nidte bunacmanombo mibi buanendac —quepondash Esus. ¹⁹—Aden mimbtsen Nuquin Papan chiapadomboenuidi nabansho ëbi chieshënquidon mibi unës uaindac —quequin tantiec adpondash Esus. Adashic: —Ënenquio icquin ëbi tantiata —quetanquimbic: —Cho. Nidnu —cac ëbitedi puuanec nidondabi.

²⁰Tsyuec nidshobini Petedon bidiadquin ispondash. Adshumbic: —Nëid Esusën tantiaidquio nec. Esus bedmiaid inchëshën Esus aton cachoctsëqui uesho aidën: “¿Tsutsi cao, Icho?” capondash. ²¹¿Mitsipadec aid unëspsatiash? —queshun: —Ma nëid. ¿Mitsipadec unësperc? —capondash Petedon ëbi unëste Esus chuimequin. ²²Adoaquien Esus: —Ëbi bunacpadequi aidi unësendac. “Ëbi Nuquin Papa yacnuësh choabi yacpadec ma

unësenuio icnu,” ëbi quiacpadec unësenuio ictsiash. Adecbidi: “Ëbi choabi icnuc ma unësenu,” ëbi quiacpadec unësenuio. “Nadec unësenu,” quequin mibi chienquio iquembique. Ënenquio icquin ëbi tantiata —quepondash Esus. ²³Adec: —Unësenuio ictsiash —Esus quesho tantiash ëbi caic: —Esusën tantiaidquio yec Uan unësenuio iquendac —quecuededpondash Esus tantiaquido. ¿Adenda Esusën chuidiondash? Ma padenuio iccondac. —Ëbi bunacpadequi aidi unësenuio. “Ëbi Nuquin Papa yacnuësh choabi yacpadec ma unësenuio icnu,” ëbi quiacpadequien unësenuio ictsiash. “Adecbidi ëbi choabi icnuc ma unësnu,” ëbi quiacpadec unësenuio —quequien iccondash.

²⁴Aden Esusën nabanondaid ënquin chiombi. Ëmbi isondaidquio chuiquin abimbo chuiquin aidtedi dada uaombi. ²⁵Esusën naidtedimbo chuiquin dada uambo iccombi. Ëmbi tantiaidtedi naombi. Ambi naidtedimbo ambi chuibanaidtedimbo chuiquin dada uauquin dada uate dadpenquioshë naimbudnetsiambi. Padi. Aidtedi dada uaombi.